

ПЕТӖ 1926 ВОСЯНЬ

ЛЭДЗӖНЫ: КОМИ РЕСПУБЛИКАСА ГИЖЫСЬ КОТЫР, ПЕЧАТЬ ДА ЮӖР
СЕТАН КОМИ РЕСПУБЛИКАСА АГЕНТСТВО

ВОЙВЫВ КОДЗУВ



ISSN 0134-4323

БЫД ТӖЛЫССЯ ЛИТЕРАТУРНО-ХУДОЖЕСТВЕННОЙ ЖУРНАЛ

1

ТӖВ ШӖР (ЯНВАРЬ)

2013

ТАЙӖ НОМЕРЫН:

Василий ЛОДЫГИН. Выль кывбурьяс	3
Андрей ВЛАСОВ. ГӖгыля чибӖ да мукӖд. Выльвося мойд	6
Александр УЛЬЯНОВ. ОлӖмыдлӖн пыдӖсыс оз тыдав. Повесът	15

ТОМ ГИЖЫСЬЯСЛӖН СЕМИНАР

Наталия ИВАШЕВА. Муса шондӗ, дона мамӖ! Кывбур. Наталья ДӖМИНА. Кывбурьяс. Василий ЧУПРОВ. Кывбурьяс. Ана- толий ЛАДАНОВ. Дженъидик висътьяс	43
Николай ГОНЕВ. Шудыс вӖлӖм дженъид. Висът	50
Валерий МАРТЫНОВ. КомиясӖс дорйысъяс йылысь	69
Аркадий КАЛИМОВ-УЛЯШЕВ. Кызди чужис «Катшасинъяс» сыланкыв	76
Василий ЧУПРОВ. Изъваса Ванга	78

6+

Обложка вылын снимокыс Ирина ВанеевалӖн.

© «Войвыв кодзув» («Северная звезда»), 2013 г.

СЫКТЫВКАР

СЕВЕРНАЯ ЗВЕЗДА



*Ежемесячный
литературно-художественный
журнал*



Учредители:

СОЮЗ ПИСАТЕЛЕЙ РЕСПУБЛИКИ КОМИ

АГЕНТСТВО РЕСПУБЛИКИ КОМИ ПО ПЕЧАТИ
И МАССОВЫМ КОММУНИКАЦИЯМ



АУ РК «ИЗДАТЕЛЬСКИЙ ДОМ КОМИ»



ДИРЕКТОР: БЫКОВСКАЯ Н.Н.



РЕДАКЦИОННАЯ КОЛЛЕГИЯ:

Главный редактор

ЕЛЬКИН М.А.

Ответственный
секретарь

КИЧИГИН И.Н.

ПОЛУТРУДОВ А.В.

УЛЯШЕВ О.И.


ЛИМЕРОВА В.А.

ТИМИН В.В.

УЛЬЯНОВ А.В.



Василий ЛОДЫГИН



Выль кывбуръяс

Асланым олӧм

Комиын чужим, Комиын олам,
Пармалӧн шыысь кыпалӧ лов.
Дзоридза юркытш радпырысь новлам,
Чужанін кындзи нинӧм оз ков.

Вежӧрын олӧ керка да карта,
Дзиръя да потшӧс, чибльӧг да ёль.
Юсьяса кельӧб енэжын гартчӧ,
Пелысьыс ӧшлӧ сикӧтшӧ моль.

Пӧльӧс да пӧчӧс сьӧлӧмным видзӧ,
Батьным да мамным сэнӧсь жӧ пыр.
Асланым олӧм медся на мича,
Мед эськӧ сійӧ некор оз быр.

Ӧкмыс пелысь

Ӧшинь улын визьын ӧкмыс пелысь.
Мыйла ӧкмыс? Мыйла абу дас?
Синъяс улам рӧдвуж менам келіс,
Татшӧм лоис налы ловъя пас.

Сәні ыджыд батьӧ, ыджыд мамӧ,
Пӧльӧ-пӧчӧ, ичинь, дона вок.
Ставныс аттӧ зільӧсь, шаньӧсь, рамӧсь,
Дасӧдыс мед оз на эськӧ лок.

Тулысьяснас ӧшинь улӧй еджыд,
Аръявылыс ӧшинь улӧй гӧрд.
Вежӧртӧ код, и код оз на вежӧрт,
Радлӧ ӧшинь улын, а оз бӧрд.

Өшинь улын визьын өкмыс пелысь —
Татшөм менам дона йөзлы пас.
Коркө ачым татчө жө ме кела,
Мед и лоас пелысьяса рас.

Миян мич

Эз усь, а сапкис гырысь лым,
Лун джыйнйөн собавмөн нин тыртис,
Дзик еджыд йөрө арнас пыртис,
Көть муртса на и ланьтис гым.

Лым улын му, лым улын видз,
Дзик ставыс еджыд эшкын улын.
Ме ачым на и коркө шулі,
Мый тайö медся миян мич.

Ме лымсö весала вель дыр,
Шань кывъяс корсяла да сыыла.
Кор тулыс воас, лымйыс сылас
Да эськө гортад көть он пыр.

А сэсся дзоридзалас видз,
И арнас лымйыс бара усяс
Да менам нимкодъпырысь шусяс,
Мый тайö медся миян мич.

* * *

Төвъяс чегъялісны бара
Пипу коддьөмъяслысь чаль.
Ёна жö и бөрдис арыс,
Весиг меным лоис жаль.

Бөрын васөд, сиктын ыркыд,
Пачъяс ломтытөг он ов.
Куим моздор пессö пырті,
Мед эз кынмы өтка лов.

Грездын отпускала-ола,
Арнас тані дзик быд во.
Тайö меным ёна колö,
Татөг гижөдöй оз ло.

Лыда позйын лыда олысь,
А мен накод медся бур.
Лолö керка помö воысь,
И ме йөзö суйла юр.

Тадзи кувтөдз, көнкө, ола,
Шонта лолös, чужи көн.
Арыс зэв на-й мича лолö,
Юргылö тар койтъясөн.

* * *

Сулалöны зэв на мича лунъяс,
Яндзим босьтас, он кө нинöм пан.
Козьналісны тунъяс ли, эз тунъяс,
Зэв и лосьыд олыштнысö тан.

Абу йöзын — муса чужанінын,
Кöні ставыс дона — выль көть важ,
Кöні дзик-джик ставыс сьölöм дінын,
Кöні-й чужö морöспытшса гаж.

Тöлысь кыкөдз шойчигъясөн ола,
Некод öгыр синъясөн оз сот.
Китыр йöз да, пöшти быдөн волö,
Быдөн ас, көть садь, көть сулик код.

Оlöны да, Габö грездöй ловъя,
Уджсö тöдны водзö сійö дась.
Миян орчча Перымланьысь овъяс
Мед эз некор эськö бырны тась.

Асланым сад

Шедас кө — шедас, а оз кө и — оз,
Вöрас ме радлыны пыри.
Дыр нин эг ветлы да, бур понлөн моз,
Буракодь гажöй нин бырис.

Сьöла ли дозмөр кө быттьö оз сюр,
Пувйыс ли, тшакыс ли сюрас.
Меным да гортсалы ныма век нур,
Вердöны ягыс да нюрыс.

Бипур на пестыла — сьölöмлы рай,
Мыйкö на-й сёрнитам ськөд.
Лосьыда шонтас и сэтöра чай —
Кияслы-кокъяслы пыкөд.

Кодлыкö Греция, кодлыкö Чад,
Корсян мый, сійö и усьö.
Шудыс да бурыс мен — асланым сад,
Нэмсö код пармаён шусьö.

❖ ❖ ❖

Андрей ВЛАСОВ



Гöгыля чибö да мукöд

ВЫЛЬВОСЯ МОЙД

ВОРСÖНЫ:

ГÖГЫЛЯ ЧИБÖ — пу чача.

ПУ САЛДАТ — пу чача.

БАЛЕРИНА — акань.

КЫРНЫШ — лэбач.

КÖДЗЫД ПÖЛЬ.

ЛЫМ НЫВ.

СЬÖД КÖИН — нырщик.

РЫЖÖЙ КÖИН — öчкиа.

1

Керкаын. Вильвося коз. Гырысь часі. Öшинь. Коз улас Гöгыля чибö да Пу салдат, коз вылас Балерина. Рöмьд. Часі петкöдлö вит минут-тöм дас кык вой. Кодкö шаркöдчö-тотшкöдчö öшиняс. Воссö öшинь — пырö Кырныш. Курксö, югъялö синнас.

КЫРНЫШ. Курк! Курк! Виль воыд таво оз ло! Курк! Курк! Кöдзыд пöль оз лок! Курк! Курк! Куим кöра нортнас петіс! Кöинъяс вöтчöны! Курк! Курк! Öти кöрсö начкисны! Бара вöтчöны! Курк! Курк! Кык кöра нортыс оз лэб! Виль воыд оз ло! Оз ло! (Муніг.) Оз ло... Оз ло...

Кырныш мунö — öшинь пöдласьö. Чöв. Кылö синва тёпкöм.

ПУ САЛДАТ. Кодкö бöрдö. Сола ва киссьö.

ГÖГЫЛЯ ЧИБÖ. Врpp! Врpp! Выліас! Выліас! Врpp! Врpp!

Дзоргöны коз вылас.

ПУ САЛДАТ. Балерина, тэ бöрдан?

БАЛЕРИНА. Ме.
ПУ САЛДАТ. Мыйла бөрдан?
БАЛЕРИНА. Кырныш шуис, Выйь во оз ло-о!..
ГӨГЫЛЯ ЧИБӨ. Но и мед! Медтыкө зөр вөлі! Вррр! Вррр!
БАЛЕРИНА. Да-а! Выйьвося гажтөгыс нө кызди-и?.. Ме ог
вермы-ы!..
ПУ САЛДАТ. Выйь вотөг оз позы! Выйь вотөг важ во оз помась!
Важ воыд оз кө помась — мем служитны дырджык лоө! Тадзи
оз позы!
БАЛЕРИНА. Оз позы! Оз позы! Көдзыд пөльтөг оз позы! Гаж
оз ло! Миянөс картон көрөбө бөр сюясны дзонь во кезлө-ө!
Ө-ө-ө... (*Бөргө.*) Сэні пемыд! Ө-ө-ө!.. Ме пола-а-а! А-а-а!..
ГӨГЫЛЯ ЧИБӨ. Вррр! Вррр! Медтыкө зөр вөлі! Вррр! Вррр!
Медтыкө зөр вөлі!
ПУ САЛДАТ. Балерина, эн бөрд! Колө кызкө отсавны Кө-
дзыд пөльы!
БАЛЕРИНА. Кы-ы-дзи-и?
ПУ САЛДАТ. Ог төд! Но кызкө колө!
ГӨГЫЛЯ ЧИБӨ. Вррр! Вррр! Колө отсавны! Вррр! Вррр!
Колө отсавны!
ПУ САЛДАТ. Балерина, лэччы сэтысь! Тырмас бөрдны!
БАЛЕРИНА (*көсий лэччыны, но оз вермы*). Ме ог вермы. От-
сыштөй!

**Пу салдат лэчкөдө Балеринаөс. Лэчкөдөмөн кутө ки вылас. Балеринылы
кажитчө тайө: сийө пуктө юрсө Пу салдатлы морөсас.**

ПУ САЛДАТ. Но, но! Эн ышмы! (*Лэгзө джоджас.*)
БАЛЕРИНА. Тэ збой, ён..
ПУ САЛДАТ. Ме салдат!
БАЛЕРИНА. Төда... Тэ мен кажитчан..
ПУ САЛДАТ. А тэ меным..
ГӨГЫЛЯ ЧИБӨ. Вррр! Вррр! Медтыкө зөр вөлі!.. Вррр! Вррр!
Зөр вөлі!..

2

Бара шаркөдчөны-тотшкөдчөны өшиняс.

БАЛЕРИНА. Ой! Бара кодкө локтө! Ме пола! Пола!
ПУ САЛДАТ. Эн пов! Киө кутчысь!
БАЛЕРИНА. Вай, кутчыся!
ПУ САЛДАТ. На! (*Сетө кисө.*)
БАЛЕРИНА. Пу салдат, ме пола!
ПУ САЛДАТ. Балерина, эн пов, мися. Ме тэнө киөдыд кута.
БАЛЕРИНА. Кутан эськө да... Но ме пола!
ПУ САЛДАТ. Мыйла ме ог пов?
БАЛЕРИНА. Тэ полан жө!
ПУ САЛДАТ. Ме пола? Ме некор ог пов!
БАЛЕРИНА. Мыйла нө кыд тірзё?
ПУ САЛДАТ. Менам тірзё?! Тайө тэнад тірзё!
БАЛЕРИНА. Ог төд, менам — оз...

ПУ САЛДАТ. Эн пов, мися, тайö тöv.

БАЛЕРИНА. Абу! Абу тöv! Абу!.. Видзöд! Видзöд! Öшинь саяс мыйкö сьöд!

ПУ САЛДАТ. Мый бара татшöмыс?.. Энлы, öшиньсö восьта.

БАЛЕРИНА. Эн! Эн восьт! Ме пола!..

ПУ САЛДАТ. Эн пов!

БАЛЕРИНА. Киöс эн лэдз! Эн лэдз!..

ПУ САЛДАТ. Аттö, полысь кöч! Гöгыля чибöыслы бурысяс кутчысь! *(Босьтö Балеринысь кисö и пуктö бурысяс.)* Кут!

БАЛЕРИНА. Но.

**Пу салдат мöдö мунны öшинь дорö, но öшиныс ачыс восьтö —
пырö Кырныш.**

КЫРНЫШ. Курк! Курк! Вых вояд таво оз ло! Кöдзыд пöль пöгибö веськалiс! Кöинъяс вöтчöны! Мöд кöрсö нин начкисны! Нортис öдва кыссьö! Рөгид и коймöдсö начкасны! Курк! Курк! Вых вояд оз ло! Оз ло! Курк! Курк! Оз ло! Оз ло!

ПУ САЛДАТ. Кырныш! Вай эн курксы, а бурджык висытав, мый миянлы вöчны, медым Вых вояс воис?

КЫРНЫШ. Курк! Курк! Кöдзыд пöльöс колö татчö вайны! Выхвося коз дорас! Дас кык час войöдз колö вайны! Сэки Вых во лоас!

ПУ САЛДАТ. Кытчö мунны?

КЫРНЫШ. Войвылö! Веськыда!

ПУ САЛДАТ. Ми сийöс адзам?

КЫРНЫШ. Адзаннуд! Ме петкöдла!

ПУ САЛДАТ. Тэ муна миянкöд?

КЫРНЫШ. Муна! Курк! Курк! Муна! Тэрмасьöй!

ПУ САЛДАТ. Удитам огö, вой шöрöдзыс сöмын вит минут и колис да?

КЫРНЫШ. Колö сувтöдны кадсö!

БАЛЕРИНА. Сувтöдны кадсö? Но кыдзи??

КЫРНЫШ. Куимысь гөгортöй выльвося козсö — и кадыс сувтас! Курк! Курк! Гөгортöй! И сувтас!

БАЛЕРИНА. Мен тшöтш?

КЫРНЫШ. Ставныдлы!

БАЛЕРИНА. Ой! Пола! Миянкöд нинöм оз ло?

КЫРНЫШ. Нинöм! Сöмын вынсяланнуд! Ёнманныд!

ГÖГЫЛЯ ЧИБÖ. Медтыкö зөр вöлi! Вррр! Вррр! Сölöй ме вылö! Öдйöджыка нуа!

Балерина и Пу салдат сölöны Гöгыля чибö вылö. Чибö пөрö.

ГÖГЫЛЯ ЧИБÖ. Вррр! Вррр! Вывтi сьöкыдöсь! Вывтi сьöкы-дöсь! Кокöй оз кут! Вррр! Вррр! Подөн мунöй!

КЫРНЫШ. Тэрмасьöй, тэрмасьöй! Кадыс кольö! Кадыс кольö! Курк! Курк! Гөгортöй, а ме кута курксыны!

Кырныш курксö — мукöдыс куимысь гөгортöны козсö. Быд гөгортöмөн пыр вынаджык лоöны. Медбөръя гөгортöм бöрын Гöгыля чибö коз сайысь петö багатырөн, а Балерина тövся паськөмөн.

ГÖГЫЛЯ ЧИБÖ. Врр! Врр! Ук, кутшöм ён ме лои! Багатыр! (Видлалö асьсö.) Кучик тасмаа да тильгуна ставыс! Ук! Багатыр!.. Зөр сёйöмөн, дерт, багатырасян!.. Врр! Врр!

ПУ САЛДАТ. Балерина пасясьöма! Чибö ёнмис! Сöмын ме важ моз коли пу салдатөн!

БАЛЕРИНА. Кутшöм мичаник да небыдик пасьöй! Ой, кутшöм мичаник!

КЫРНЫШ. Курк! Курк! Кадыс сувтис! Кадыс сувтис! Но, тэрмасьöй! Тэрмасьöй! Эз дыр кежлö кадыс сувт! Регыд бара вөрзяс да суödас асьсö! Суödас асьсö!.. Курк! Курк! Суödас! Суödас! Курк! Курк! Курк!

ПУ САЛДАТ. Ми дасьсöсь! Мöдам Кöдзыд пöльöс паныдавны! Петам!

Кырныш петö öшиньöд. Мукöдыс сы бöрся.

3

Вöрын. Гöгыля чибö, Пу салдат да Балерина восьлалöны.

ГÖГЫЛЯ ЧИБÖ. Врр! Врр! Мича вöрас!

ПУ САЛДАТ. Мича, но миянлы некор нимкодясны — колö Кöдзыд пöльöс корсьны.

БАЛЕРИНА. Ме мудзи. Вайö сувтлам.

ПУ САЛДАТ. Сувтлам. (Видзöдö енэжас.) Кодзувъясыс веськыда войвылö петкöдлöны.

ГÖГЫЛЯ ЧИБÖ. Балерина, ме вылö сöv! Ме ён!

БАЛЕРИНА. Аттьö, чибукöй! (Кавшасьö мышкуас.) Ме недыр кежлö.

ГÖГЫЛЯ ЧИБÖ. Да кöть век кежлö! Ме ён! Медтыкö зөр вöлі! Врр! Врр! Ме ён!

БАЛЕРИНА. Аттьö, донаöй, аттьö!..

ПУ САЛДАТ. Кырныш кытчöкö вошис, дыр абу.

ГÖГЫЛЯ ЧИБÖ. Врр! Врр! Ме кыла! Кыла! Кодкö локтö!

Кылö бордөн шенасьöм шы. Мыр вылö пуксьö Кырныш. Курксö, югъялö синнас.

КЫРНЫШ. Курк! Курк! Кöдзыд пöль да Лым ныв öтнасөн колисны! Медбөръя көрсö кöинъяс начкисны! Сёйöны нин! Курк! Курк! Виль воыд оз ло! Оз ло!

ПУ САЛДАТ. Кырныш! Эн горзы! Вай висьтав, кöні Кöдзыд пöль да Лым ныв?

ГÖГЫЛЯ ЧИБÖ. Врр! Врр! Висьтав! Висьтав!

КЫРНЫШ. Курк! Курк! Дзик матын! Дзик матын!

ПУ САЛДАТ. Нуöд!

КЫРНЫШ. Мунам! Мунам! Но, тэрмасьöй! Тэрмасьöй! Кадыс регыд вөрзяс и суödас асьсö! Курк! Курк! Суödас асьсö! Суödас асьсö! Курк! Курк!

Кырныш мунö. Сы бöрся мунöны мукöд.

Сцена би ыпъялө. Кылө кӱинъяслӱн омлялӱм. Сцена ыылӱ петӱны Кӱдзыд пӱль да Лым ныв. Найӱ кыскӱны норт. Норт ылас гырысь мешӱк. Сувтӱны сцена шӱрас.

КӱДЗЫД ПӱЛЬ. Уп! Лым ныв, уп! Шойччыштам! Зӱв сьӱкыд мешӱкыс! *(Пуксьӱ норт ыылӱ. Лым ныв пуксьӱ орчӱн.)*

ЛЫМ НЫВ. Шойччышт, пӱльӱ! Тӱд пӱсявны оз позь, а то сылан. *(Лымнас чышкалӱ Кӱдзыд пӱльысь чужӱмсӱ.)*

КӱДЗЫД ПӱЛЬ. Аттьӱ, нылукӱй, аттьӱ! Муртса шойччыштам да вӱрзям водзӱ! Челядь виччысьӱны миянӱс ыльвоя коз дорын!

ЛЫМ НЫВ. Козинъяс ваям! Дзонь мешӱк!

КӱДЗЫД ПӱЛЬ. Ваям, нылукӱй, ваям! Мед гажӱдчӱны бура! Мед бать-мамныслысь кывзысьӱны да мед оз висьны! Мед быдмӱны тыр-бур йӱзӱн!

ЛЫМ НЫВ. Эн шогсьы, пӱльӱ! Кыдзи шуин, сӱдзи и лоӱ! Ставныслы козинъяссӱ ваям! *(Малалӱ пельпомӱдыс.)* Шойччы, пӱльӱ, шойччы!

КӱДЗЫД ПӱЛЬ. Шойччыштам...

Кост.

КӱДЗЫД ПӱЛЬ. Но, нылукӱй, мунам водзӱ! *(Чеччӱны.)* Миянӱс виччысьӱны. Оз позь нюжмасьны. Доддясам... И мунам... Пыр водзӱ и водзӱ...

Мунӱны.

Петӱны кӱинъяс. Кыкнанныс зӱв кыз рушкуаӱсь. Ӗдва-ӱдва осьлалӱны. Сувтлӱны.

РЫЖӱЙ КӱИН. Уп! Уп! Кынӱмӱй висьӱ! Куим кӱр сӱйим да! Уп! Уп!

СЬӱД КӱИН. Эн бӱрд! Тӱнад пыр мыйкӱ абу лючки-ладнӱ! Со менам кынӱмӱй ньӱти оз вись да? Нӱшта куимӱс верма сӱйны!

РЫЖӱЙ КӱИН. Тӱ горш, а ме абу!

СЬӱД КӱИН. Абу кӱ горш, мыйла сы мында сӱйин?

РЫЖӱЙ КӱИН. Шуӱны, кодӱ пӱ уна сӱйӱ, школаас бура велӱдчӱ!

СЬӱД КӱИН. А-ха-ха-ха! Школьникыд тай тӱысь бур жӱ лоӱ! А-ха-ха-ха! А-ха-ха-ха!

РЫЖӱЙ КӱИН *(ӱчки чышкалӱг)*. Мый сералан?

СЬӱД КӱИН. А-ха-ха-ха! Отличникавны кутан да, сӱмын сы вӱсна! А-ха-ха-ха!

РЫЖӱЙ КӱИН. Мыйла отличникавны? Зӱв вежӱра, да сыысь?

СЬӱД КӱИН. О-хо-хо-хо! Зӱв вежӱра пӱ! О-хо-хо-хо! Абу вежӱра, а лӱчыд пиня! А-ха-ха-ха! Велӱдысьыд кутас повны пуктыны «кыктӱ»! А-ха-ха-ха! Сӱян ӱд сӱйӱс! Сӱян! А-ха-ха-ха!

РЫЖӱЙ КӱИН. Менам со мый эм! *(Перӱӱ питшӱгсьыс ни-га, суйӱ Сьӱд кӱинлы ныр улас.)* Со мый эм!

СЬÖД КÖИН. Тайö мый татшöмыс?

РЫЖÖЙ КÖИН. Тайö со! Аддзан? Со! Татчö гижöма — азь, азь, азь-бука! Азьбука пö!

СЬÖД КÖИН. А-ха-ха-ха! Азьбука! А-ха-ха-ха! Но и но! (Пөрö мыш вылö, сералö, тракйöглö кокнас.) А-ха-ха-ха! Азьбука пö! А-ха-ха-ха! Азь-бука! А-ха-ха-ха!..

РЫЖÖЙ КÖИН. Тайö медся колана нига! Та бöрын сэсся позьö ставсö лыддыны!

СЬÖД КÖИН (чеччö). Лыддыны?.. Вай татчö! (Босьтö нигасö, шыбитö толаö.) Кöинлы некутшöм нига оз ков!

РЫЖÖЙ КÖИН (уськöдчö корсьны, агдзö, дзебö питшöгас). Менам азьбука... Менам...

СЬÖД КÖИН. Вай татчö!

РЫЖÖЙ КÖИН. Ог сет!

СЬÖД КÖИН. Вай, мися! (Кучкö.)

РЫЖÖЙ КÖИН. Ог сет!

СЬÖД КÖИН. Он сет?! (Уськöдчö, пөрöдö.)

Кöинъяс дыркодь тышкасьöны, мудзöны.

СЬÖД КÖИН. Тыпу тэныд!

РЫЖÖЙ КÖИН. Ог сет!

СЬÖД КÖИН. А-а!.. Оз и ков!

РЫЖÖЙ КÖИН. Оз кö ков, мыйла тышкасян?

СЬÖД КÖИН. Ме кöин, со и тышкася!

РЫЖÖЙ КÖИН. Ме кöин жö! (Тшана.) Но рыжöй! И öчкиа!

СЬÖД КÖИН. Рыжöй и öчкиа! Чеччы вай! Мöдiм, Кöдзыд пöльöс начкыны!

РЫЖÖЙ КÖИН. Гашкö, оз ков начкыны?

СЬÖД КÖИН (петкöдлö кабырсö). Колö!

РЫЖÖЙ КÖИН. Но, колö кö, начкам...

Сьöрсьөн-бöрсьөн мунöны. Кост.

6

Петöны Пу салдат, Гöгыля чибö да Балерина. Сувтöны. Гöгыля чибö лэдзö Балеринаöс му вылö. Пу салдат дзоргö енэжö.

ПУ САЛДАТ. Кодзувъяс петкöдлöны войвывсö! Но Кöдзыд пöль абу на!

ГÖГЫЛЯ ЧИБÖ. Врр! Врр! Ме кыла — норт дзуртö! Врр! Врр!

БАЛЕРИНА. Тайö Кöдзыд пöль локтö! Кöдзыд пöль!

ГÖГЫЛЯ ЧИБÖ. Нöшта кыла — кöинъяс матын! Врр! Врр! Дзик матын!

БАЛЕРИНА. Чибö, ме пола! (Уськöдчö Гöгыля чибöлань.)

ГÖГЫЛЯ ЧИБÖ. Врр! Врр! Ме ён! Доръя! Врр! Врр!

ПУ САЛДАТ. Ёртъяс! Вай дзебсям! А кор кöинъяс татчö локтасны — уськöдчам на вылö!

Мыччысьö Кырныш.

КЫРНЫШ. Курк! Курк! Дзебсьой! Дзебсьой! Көдзыд пөль локтө! Көинъяс и! Курк! Курк!

Дзебсьоны, коді кытчө. Пу салдат лэптө Балеринаос коз вылө.

ПУ САЛДАТ. Татөн пукав. Эн шыась. Чөв!

БАЛЕРИНА. Ме пола!

ПУ САЛДАТ. Чөв, мися!

ГӨГЫЛЯ ЧИБӨ. Врр! Врр! Эн пов! Ме матын лоа! Коз улас! Врр! Доръя! Врр!

БАЛЕРИНА. Но... Ой, пола!..

7

Петöны Көдзыд пөль и Лым ныв, кыскöны норт. Дзик пыр мыччысьöны көинъяс. Сьöд көин перйö питшөгсьыс кыз гез.

СЬÖД КÖИН. Көдзыд пөль! Сувт!

РЫЖÖЙ КÖИН. Сувт!

СЬÖД КÖИН. У-у-у! Со и помныд воис!.. Ноко!

РЫЖÖЙ КÖИН. У-у-у!..

Гезсö нюжөдöмөн көинъяс уськөдчöны Көдзыд пөль да Лым ныв
былө.

КЫРНЫШ. Курк! Курк! Курк!

БАЛЕРИНА (*чилөстө*). А-а!..

Пу салдат да Гөгыля чибө уськөдчöны көинъяс былө. Көинъяс повзёны, конъясьöны гезъяс, усьöны. Пу салдат, Гөгыля чибө да Көдзыд пөль гартöны, көрталöны көинъяссö гезнас. Лэччөдöны Балеринаос.
Сывъясьöны-окасьöны.

КЫРНЫШ. Курк! Курк! Тэрмасьой! Тэрмасьой! Кадыс вөрзяс да суөдас асьсö! Выхь во оз ло! Оз ло! Курк! Курк!

КÖДЗЫД ПÖЛЬ. Но, ёртъяс, ыджыд аттё тиянлы! Мездінныд миянөс! Öнi колö тэрмасьны!

ПУ САЛДАТ (*ингö көинъяс былө*). Этiяскөд мый вöчам, Көдзыд пөль?

КÖДЗЫД ПÖЛЬ. Этiяскөд?!

РЫЖÖЙ КÖИН. Энö виöй! Энö виöй! Менам со мый эм!
(*Петкөдлө нигасö.*)

КÖДЗЫД ПÖЛЬ. Ноко? Мый тайö? (*Виглалö.*) Азбука?

СЬÖД КÖИН. Азь, азь, азьбука!

РЫЖÖЙ КÖИН. Ми велөдчыны көсьям! Бурөн овны!

СЬÖД КÖИН. Бурөн овны и некодос не сёйны! Да, да.

КÖДЗЫД ПÖЛЬ. Тайö збыль?

СЬÖД КÖИН. Збыль, збыль, збыль!

РЫЖÖЙ КÖИН. Збыль, збыль, збыль!

КÖДЗЫД ПÖЛЬ. Но мый, ёртъяс, эскам көинъяслы?

ГӨГЫЛЯ ЧИБӨ. Врр! Врр! Ылөдлöны!

ПУ САЛДАТ. А ме чайта, колö видлыны эскыны!

КÖДЗЫД ПÖЛЬ. Видлам?.. Видлам.

КЫРНЫШ. Курк! Курк! Тэрмасьёй! Тэрмасьёй!
КӨДЗЫД ПӨЛЬ (*кёиньяслы*). Ноко, чеччөй! Доддясьёй нортас
да кыскөй көръяс пыдди!
СЬӨД КӨИН. Кыскам, кыскам!
РЫЖОЙ КӨИН. Здукөн ваям! Сөмын энё виёй!
КӨДЗЫД ПӨЛЬ. Доддясьёй!

Кёиньяс доддясёны. Ставён сёлөны нортё.

КӨДЗЫД ПӨЛЬ (*кёиньяслы*). Но! Мунёй!
ГӨГЫЛЯ ЧИБЁ. Врр! Врр!
КӨИНЪЯС. Да, да... (*Ноксьёны.*)
ПУ САЛДАТ. Но, мися! Мунёй! Мый шуёма!

**Кёиньяс бара ноксьёны. Пу салдат лыйё ружйёсьыс. Кёиньяс повзьёны
да котөрөн мөдөдчөны.**

8

**Сцена вылын некод абу. Сцена би ыпъялө. Кылө кёиньясөс вөтлан
горөдчөмъяс. Кыкысь лыйёны. Бара вөтлөм могысь горөдөны.**

9

Керкаын. Котөрөн петёны кёиньяс, кыскёны норт. Нортас пукалёны
Көдзыд пөль, Лым ныв, Балерина. Пу салдат да Гёгыля чибё мунёны
подөн. Норт воё сцена шөрөдз, сувтё — кёиньяс пөрөны, сьёкыда
лолалёны.

КӨИНЪЯС. О-о, о-о, о-о... (*Ышловзьёны.*) О-о-о!..

**Ставныс видзөдөны часі вылө. Часі петкөдлө өти минуттөм дас кык
вой. Ставныс ышловзьёны.**

СТАВНЫС (*ышловзьёмөн*). О-о-о! Удитім!
КЫРНЫШ. Курк! Курк! Выхь во лоас! Выхь во лоас! Курк!
Курк! Лоас! Лоас!
СТАВНЫС. Удитім! Удитім! Выхь во лоас! Выхь во лоас!
(*Сывъясьёны-окасьёны.*)
КӨДЗЫД ПӨЛЬ. Ёртъяс! Отсыштөй! Пуктам козинъяссө коз
улө! (*Кыскёны мешөксө коз улө. Петкөдөны нортсө.*)
ПУ САЛДАТ (*кёиньяс вылө ружйөсө веськөдөмөн*). Көдзыд
пөль! Этяскөд мый вөчам?
ГӨГЫЛЯ ЧИБЁ. Врр! Врр! Мый вөчам?
КӨДЗЫД ПӨЛЬ. Вөтлам?
РЫЖОЙ КӨИН. Көдзыд пөль! Лым ныв! Энө вөтлөй! Зэв
окота тиянкөд гажөдчыны!
СЬӨД КӨИН. Зэв окота!
РЫЖОЙ КӨИН. Окота! Окота!
КӨДЗЫД ПӨЛЬ. Водзё онө кутөй шышкавны?!

КӨИНЪЯС. Огөй! Огөй! Кутам бурөн овны!
РЫЖӨЙ КӨИН (*перйө нига*). Кутам азыбука велөдны..
КӨДЗЫД ПӨЛЬ. Прөща корөй, вөлись!..
РЫЖӨЙ КӨИН да СЬӨД КӨИН (*өтвылысь*). Прөща корам!
Прөща корам!..
РЫЖӨЙ КӨИН. Жалитыштөй... миянө-ө-ös...
СЬӨД КӨИН. Жалитыштө-ө-өй..
КӨДЗЫД ПӨЛЬ. Мед кольччөны!
ГӨГЫЛЯ ЧИБӨ. Врр! Врр! Мед кольччөны!
ПУ САЛДАТ. Мед.
ЛЫМ НЫВ. Мед.
БАЛЕРИНА. Мед.

Часі петкөдлө дас кык час. Кылө часі ворсөм.

КЫРНЫШ. Курк! Курк! Выль во! Выль во! Курк! Курк!
Выль во! Выль во!
СТАВНЫС (*өтвылысь*). Выль воён! Выль шудён!..

**Радпырысь чеччалөны, сывъясьөны-окасьөны, йөктөны-сьылөны,
гажөдөны челядь:**

**Выль вося коз гөгөр
Кытшөн, кытшөн ветлөдлам.
Көдзыд пөльөс да Лым нылөс
Чолөмалам!..**

ПОМ.



Оломыдлөн пыдöсыс оз тыдав*

П О В Е С Т Ъ

Öтка пöтка, либö Бөрья салдат...

...Садьмис аскинас Паш Вась виччысьтöг, шкапкостса аслас шоныд пельöсын — керка пытшкас дзурс пемыд на. И лöньсыслöнь пыдi жырьяс. Радио оз брунгы, ни часi оз точки-шлочкы-мун. Сидзкö, водз асыв, абу узьсьöма сылөн. Радионыс сöмын квайт часын шыасяс, гöгрöс чужöма кад петкöдлысьыс жö, мый вöсна кö, тшöкмунöма-джöмдöма. Гашкö, кузьмöс гираыс пызан помö пыксис, гашкö, часыслөн посни синма чептыс ас гөгöрыс гартчис. Югдыштас да сэки нин Паш Вась видзöдлас, мый вöчсьöма-лоöма кадсö петкöдлысь-арталысьыскöд. А öнi куйлыштас на шоныд вольпасяс, асьсö дэльöдыштас, ки-коксö веськöдас, кытчö нö сылы чепсасыны-тэрмасынысö. Декабр төлысьлөн нырсö мыччысь луныс бара-й сылы юр вылöдзыс тырмас... Тырмас эськö, да сöмын тай Паш Васьлы таысь абу ёна нимкодъ. Войдöрлун ни төрыт ныв-писяныыс гижöдтор пошта новлöдлысь эз чöвт. Быдса кык вежон ывла кудйыс тыртöм... Регыд виль во пуксяс, а Паш Васьöдз быттьö некодлы дело абу. Öлексей пиыс эськö звöнитлис вежон сайын, быттьөн кöсйысис батъ дорас кежавны... Но кор волас гортас, Паш Вась ордö, лешакыс төдö. Стöчасö нинöм эз юөрт. Öнiя том йöзыд абу топыд вомаöсь, брольснитасны да водзö изöны, талун шуисны-висьталисны — аски вунöдöмаöсь нин. Нывъясыс, тыдалö, виль воöдзыс чужан сиктсö бокитi жö кытшовтасны. Öтиыс суйөр сайö мöдöдчöма, мöдыс верöсыслөн мам ордö мунö, челядь чукöрнас и ставнас. Быдöнлөн аслас төжд-мог... Батъсö гажöдны ыджыд керкаад некодлы, кöть Паш Васьлы синва петмöныс гажтöм овлö. Öтка мортыдлысь медыджыд дойсö сылөн быдтасъясыс, ерöмаканъ, мыйлакö оз пыр кывны...

И мед кызкö мездысьны тайö шог да сьölöмсö вөрзьöдысь думъяссьыс, Паш Вась вольпасын куйлигмоз босытчис артавын-муртавын, мый сылы, öтка пöткалы, талун колö вöчны. Югдыштас да, медводз, дерт, көрт пачö би чуткас. Посныдик пестор төрыт на сюявлis сылөн кузьмöс гырк пытшкö. Ыджыд пачсö ломтытöдз мед мöдарладор жырсö шонтыштны. Гөбöчсö тшöтш и, сэни Паш Васьлөн став картупельыс джуджыд гуын меститöма-куйлö. Важ пупайкаясөн да джодждöраясөн вевтялöма. А ыджыд пачсö ваймöдöм бöрын ковмас на лавкаö кайлыны — нянь ваясны талун орчча Ручысь. Нöшта нянь дорас мыйкö да

* Пом. Заводитчöмыс 2012 вося 11, 12 номеръясын.

мыйкō нъōбыштас. Шыд пуны анькытш сылōн быранвыйын, чери поэō кило-мōд лэччōдны, мōс вый пев пом ыджа кольōма, чипан кольк абу... Чигарка да курыдторйыд Паш Васьлы весь-кодъ. Откōн олīgōн наланъ кō сетчан, сиктса овмōсыд, керка-картанад и ставнас, вальдас-киссяс. Но Вых во кежлад поэō и шампанскōясыны...

Лавкаō кайлигас отырышгъя пошта вылō кежавны лоō, бōрйыны-нъōбны төв серпаса открыткаяс — писō да кык нывсō сийō век чолōмавлō Вых воон. Чолōмалōмсō гижигкості и шыд пуктас пуны, сытōг отка пōтка олōмыд гажтōм жō, кынōмыд гуръялō-сюмалō куш тшай вылад. Но мыйся шыд талун пуны? Медся өдийō, дерт, чипан кокъясысь артмас. Кык-куим госа кок сельпо лавкаысь нъōблїс, ывла чуланын, гашкō, быдса вежон нин куйлōны. Пу вор пытшкō шыръясысь дзумгылїс-суйлїс. А кор чипан шыдыс пусяс, пажнайтыштас да мōдар жырсьыс пач ломтылас. Ваймōдас плитаа пачсō посни өгыръясōдз, мед юр кольмōдана дукуыс оз кыв, сэки нин тупкас-пōддалас юшкасō.

Тадзи ноксиг-ветлигад он и казав, кыдзи чаль кузя төвся луныд рытланъō катовтас. Нель час точкас, да ывла вылын, видзōдан да, рōмдō нин. Муртсаōн и плавгыяс декабранад мустōм пемыдыс налōн сикт вылō, сьōд шебрасōн тупкас ота-мōд бердас топōдчōм керка-картаяс, потшōс праслаяс, гид-жытникъяс. И бара пельтō чунōдысь лōнь пуксяс Паш Васьлōн кыкнан жыръяс. Талунъя асылын кодъ жō лōнь... Сьōлōмтō чепōльтысь, вежōртō гудралысь, сыысь медся шуштōм-гажтōм и овлō отка мортыдлы.

...Төвся асылыс дыша, но вочасōн-вочасōн, унзїлясиг пырис Паш Васьлōн ыджыд керка пытшкō. Виччысьтōг садъмис-шыасис радио, кутїс брунгыны-висьтавыны, мый вōльнōй светас лоōма да вōчсьō. И сылōн гора сёрниыс ловзьōдїс керкаыслысь отар и мōдар пемыд жырсō, вольпасын куйлысь-бергалысь Паш Васьлысь морōс кудсō. Быттō бур өрт кежис сы ордō да босьтчис варовитны пōрысь морткōд... Дырōн ли, регыдōн ли, өшинъ сайын нъōжйōник югдыштіс, мустōм пемыдыс кутїс ылыстчыны-вешйыны бокō. Кадыд тай ассьыс уджсō тōдō, оз сулав, а пыр водзō мунō. И быд сьōд вой бōрын пуксьылō ловтō ышōдысь асыв, сы бōрся — дыр виччысяна лун. Тадзи буретш и артмис...

Здук-мōд Паш Вась йōжгылясис на кыз шебрас улын, сэсся ас водзас дзик яндзим лои: ывла вылын регыд лун пуксяс, а сийō век вольпасын жбутвидзō-куйлō. А коркō важōн, гōтрасьōм бōрас, сылōн вирыс быд сōнын ворсōдчōмōн ворсōдчис. Тэрыб и збой сэки вōлі Паш Вась. Чери кыйō и утка лыйō. Эз тай, небось, дышыд талун моз личкыв. Водз тулыс, асылыс муртса пуксьō, а сийō Сьōд ты дорысь нин шлапсьōдō-локтō мир туй кузя, ноп тыр чери кыскō гортас. Сиктыс стынитō-узьō, пач трубаясысь тшын оз тыдав, а Паш Вась сир-ёкыш весавны пуксьōма. Удж вылō петтōдз шур-шар керас черитō, пōсь тшай ырситас-юас да мōдōдчас сикт шōрланъ, удж вылō. Сылōн вайōма-керōма-а, мед водзōсō гōтырыс да мамыс ноксьōны. Пуōны-солалōны, косьтōны кōть пражитōны черисō... Тадзи жō утка кыйигōн. Быд ар сийō ныр вылас усьтōдз вōтгысьō жыдач-гордаяс бōрся. Кыйдōстōг некор эз волев ю-ты дорсьыд. Понийд кор абу, быд ногыс лоō уткатō судзōдны васьыс. Лыян да бовъялō

сійö ты веркöсын, öтарö-мöдарö тöлыс новлöдлö-летö. Быттö дэльöдö кыйсысысö: он пö тай менö босыт. Мый сюрö ки улас, сы отсöгөн и видлас матыстны асланыс Паш Вась кыйдöстö. Кузь потш ли майöг, көв йылын вожа бедь ли — быдтор лöсялö, мед сöмын кызкö-мыйкö судзöдны лыйöм уткасö. А кымыныс аслыс лои пон пыдди Пывсяна да Найдан тыясö бузгысылыны-пыравны. Пöльтыс тöлыс вöлі дзик мöдарö нуас плавгысьöм уткасö да. Ни кузь-кузь потшöн, ни керыштöм баддöн судзöдчы-нытö он вермы. Вирыс быдöн пузяс татшöм здукад Паш Васьлөн: кызди нö сійö ассыс кыйдöссö ва вылö коляс. Пöрччысяс сук эжöра ты дорын улыс гачöдзыс да сунгысяс йи кöдзыд ваö, пинныс зяткакылö, но вартчас-воöдчас лыйöм утка дорöдзыд. Тшап-нитас ёсь пиньяснас горда-жыдачтö борд пöлöдыс да öдийöджык бөр вартчас-бергöдчас. Мед сöмын некод эз аддзыв-а Паш Вась-лыс ты шöрын пон моз уялöмсö. Серамыв ёсь кывъя йöзыд сійöс öдийö бара-й лэптасны. Пызралас улыс көлуйсö да тiралiг шавксьöдас ты боктi. Водзö кыйны-луйны. Бур, мый пупайкаыс выль на, кыз да шоныд. Вочасөн и косьмас трусик-улыс гачыд ас вылас. Война кадö быдторыйыс жö вöвлi Паш Васькöд, кынмö-мыс и тшыглуныс сюрлi, но кызкö тай терпитiс-олiс...

Казытивны кө тöрытъясö, пуксьыс луныс сылы оз тырмы. Асьö дэльöдöм бара артмас, лов-вежöрсö летöм да. Бурджык сійö чеччас шоныд вольпассьыс да керка пытшкын пелькöдчыны-легöдчыны босытчас. Сiдзи и вöчис недыр мысти Паш Вась... Мыссьытöдз-тшай пуктытöдз первой би чуткис пачводзын сулалыс көрт пачö. Öчкиасис да сувтöм часi дорö матыстчис. Сылөн точкытöг-шлочкытöг керка пытшкас быттö оломыс джөмдöма, быттö ловъя морт танi абу... Шыч ни рач гөгөр. Ноко-ноко, мый нö бара кадсö арталысьыскöд талун лоöма-керсьöма... Дивъя, мый гөгрöс часыс дзикöдз абу жугалöма, гираыс коркöя моз пызан помас сунгысьöма, пескыльтчöма бокыв, а посни синма чептыс дзикöдз личалöма. Чепсö бөр лöсьöдiс Паш Вась, зэлöдiс-дзажнитiс вывлань. Сылыс гөгрöс чужöма кад гартысьсö колö эськö вылöджык öшöдны стенас да, сэки чепта гираыс оз кут пыр зурасыны кузь пызан помас, содтöд нок вöчны пöрыс мортлы, вирсö сылыс тшыкöдны. Часiлөн быд тшöкмунлöм бöрын Паш Вась та йылыс ышлолалö-мөвпалö, синнас арталö-видзöдалö, кытчö судзöдчыны да выль көрт тув тотшнитны-тувийыштны. Но сійö бура тöдö — вылöджыксö некызди оз позь. Öшинь бокас, буретш часi весьтас, пу рама пытшкын ыджыд-джык Öлексей вокыслөн фотокарточка öшалö. Видзöдлас сы вылö Паш Вась да кийс оз лыб кытчöкö мöд пельöсö вештыны усьöм вокыслыс рама пытшкö меститöм карточкасö. Мед и водзö ас местаас öшалö, Паш Васьöс гажöдö. Со кутшöм томөн да мичаөн ыджыдджык вокыс ставныслы налы нэм кежлас колис... Абу Василей кодь, майбыр, чукырöсь-мукурöсь чужöма, ва гоб вылö муныс, руш да пöрыс. Но фотокарточка вылас Öлексей вокыслы сöмын дас квайт арös, öтка пöтка Васьлы локтыс январас сизимдас көкъямыс арös тырö. Ок и кадыд лэбзьö-мунö...

Пукалö-мөвпалö Паш Вась пачводздорса пызан сайын, сук тшай тэрмасьтöг ырскö-юö, а вокыс жальсьыс-жаль. Быттö тöрыт на мунiс гортсьыс да бöрсö Енмыс том мортöс некызди

эз лэдз. Гортас локны... Война помасьом мысти Паш Васьос бура дыр жö кутісны армияд, тшöктісны, велöд пö том йöзöс танкөн вöдитчыны. Стöча лыйсыны, ю да ты вуджны, ёрта-ёртöс бура гөгөрвоны, пыдди пуктыны... Биа войнаыс кузі кор, Паш Вась буретш Германияын вöлі. Кымын во колис, но öні на юрас öти лөөмтор. Сулалісны сэки найö Котбус кар дорын.

Коркö öтчыд Паш Васьылысь танкъяса батальонсö веськöдісны полигон вылö, лыйсыны да мый да. Öти кывйөн кө, водзö велöдны томъясöс, сям-эбöс налысь содтыны. Кузь лунтыр шковгисны-луйсисны танкъясысь. А гожöмыс жар сулаліс, лыа-бусыс горшад сатшкысьмөн сатшкысьö. И рök вылад, öти туйтöм-тшыксьом снаряд лыйöм бöрас усьöма кытчökö, но абу йиркнитöма-потöма. Сійöс и тшöктісны корсьны бöрынджык да пыр жö бырöдны, мед некутшöм лёктор эз ло тані олысь йöзлы. Быд рота-батальонсянь индісны кывкутысьясöс, найö сюся видзöдісны, кызди збыльмöны гырысь погона йöзлөн индöдъясыс. Паш Вась мукöдкöд тшöтш корсьысис ыджыдкодъ немеч сикт дорын, пöсь петмöныс лои зільны. Коркö дзикöдз жö жуяліс: юрыс жуvgö-потö, горшыс косьмöмөн косьмö. Мый и водзö вöчны? Кокъясыс сэки асьныс нуöдісны сикт помын сулалысь мича керкалань. Пырис Паш Вась керка пытшкас, а öти жырыын сöмын пöрысь немка да сылөн кизь кодъ внучкаыс пукалöны. Повзьом чужöмаöсь, быттö налысь коми морт ловсö көсийö босьтны. Кутшöм нин лов перйöм... «Вассэр, вассэр, пить»,— кинас мöдіс öвтны Паш Вась, индавны вом дорас. Олöма нывбабаыд, тыдалö, гөгөрвоис Паш Васьос да петкöдіс орчча жырсыйс ва пыдди йöv кринча. «Биттэ, биттэ, рус Иван»,— шуис небыдика сійö, сэсся бара на пыраліс орчча жырийö да вайис аскöдыс ыджыд кружка.

Йöv юигөн Паш Вась казяліс пу рама пытшкö меститöм карточка. Дзик пызан весьтас сійö öшаліс. Паш Вась вылö видзöдіс дзик жö Öлексей вок кодъыс том зон. Аслыспөлöс немеч паськöма, юрас кузь картуза шапка сатшкöма, мичаа-югыда нюмъялö воча. Быдсөн сьölöмыс вöрзис Паш Васьлөн... Видзöдö и видзöдö карточка вылад, синсö оз вермы вештыны. Орччөн сулалысь немкаыд казяліс тайöс да шога шуис ас ногыс: «Киндер Александер. Эльба. Капут». Паш Вась гөгөрвоис, мый олöма аньлөн пиыс усьöма көнкö Эльба ю дорын. Эльбатö казтыштöм бöрын пöчыд дзикöдз лябзис, мöдіс шлюпкины-бöрдны. А Паш Васьлөн син водзö сувтіс Ленинград дорын усьöм вокыс, да сьölöм пытшкас деливö жö лои. Медым кызкö лөньöдны дойсö, öдйöджык воськовтіс öдзöслань, петігас нин чöвтис олöма нывбабалы: «Данкэ!» «Биттэ, биттэ»,— вочавидзис мöдыд да морöстырнас ышловзис. Ывла вылын Паш Вась тэрыба öзтыліс чигарка, но водзöсö шпуткыны-куритны эз вермы. Курыд тшыныс сатшис горшас, юр вежöрас бергаліс-гартчис виччысьтөг воом мöвп: «Быд мамы тай аслас пиыд медся дона, муса да жалъ...»

Дзик Öлексей вок пондаыс Паш Вась и точкысь-шлочкысь часітö пачладор жырсыйс мöд пельöсö вештыны эз кут. Мед тайö важ часіыс öшалö сэнi, көні нэм чöжыс кадсö арталіс, мед Васьяслөн керка пытшкын ставыс кольö сідзи, кызди вöлі водзын, Валентина гöтырыслөн ловъядырйи. А кор Паш Васьлөн öтка пöтка олöмыс помасяс, челядыс сылөн кольöны. Куимöс

тай, ен ськөдөн, гөтырыскөд быдтісны-велөдісны, кок йылө сув-төдісны. Найө, майбыр, өні ставныс ас нянь вылынось... Паш Вась пи-нывьясыслы быд волігөн шуліс-велөдліс: керкатө, мусадонаяс, кувсьом мысти өтнассө энө жө кольой. Гажа йөртө да, көні сы мында кыз да льом пу пуктөма, сы мында сьод да гөрд сэтөр быдмө. Кытчөдз верманныд да коді верманныд, видзөй-дөзьөрितөй чужан позтө. Дерт, важиник керкаыс, но пелькөдны-старайтны кө, дыр на сулалас, весиг внук-внучканыдды на вичмас. Та дорө содтөд, том войтырыслы Паш Вась ас олом-вылом йывсьыс өттор-мөдтор пасйышталіс. Мый артмис — артмис-а, мый эз — эз дай... Тонө чукуля-мукуля, гырысь шыпасьяса гижөдьяссө сійө бара пөлать пельөсө лэптис-меститис, йөз синмысь бокө саймовтіс тубрассө. Олексейыс волас да, сылы быть петкөдлас чукөртөм-гартөвтөм кабалаяссө. Мед ловнас кыліс өтка пиыс: Ульныровьяслөн рөд вабергача оломсьыс бокын некор эз сулавлы, а пөль-батыс, позьө шуны, би пыр и ва пыр мунлісны. Та йылысь Паш Васьлөн челядьлы өкөверт колө төдны... Быть, быть төдны...

Тшай юйгкості да дум-мөвпгьяссө ас пытшкас бергөдлігөн көрт пачыд Паш Васьлөн дзикөдз ваймөма. Восьтіс пач өдзөссө да ичөтик коколюкаөн пытшкөссө гудрыштис — төрытгья песторьясысь сөмын посни өгыртор кольөма. «Но, таладор жырьяс шоньдджык лои», — пасйыштис мөвпнас коколюкасө бокө вештігөн. Вель дыр талун вольпасяд туплясис, да кад и ыджыд пачсө ломтыштыны. Буретш удитас лавкаө кайлытөдзыс ваймөдны-пөдлавны, кок улын гартчысь каньсө вердны-юктавны. Вежөрыс Паш Васьлөн гортас шлочкысь-точкысь часі мозыс өні уджаліс. Пөттөдзыс узьом да пөсь тшай юом бөрад. Та вөсна дыр өтарө-мөдарөасыны эз кут — асьсө кутшөмакө мыжаөн лыддис да. Луныс и збыль босьгчис таявны Паш Васьөс. Нюжөдчыліс да судзөдіс пач бок дорысь гартөвтчөм сьомөд, кок чунь йылас сувтломөн дзумгис-сюйис сійөс пач пытшкын тэчөм пес костө. Истөг тувсянь чепөсйөм битор азыма кутчысис кос да кышакылысь сьомөдө, трачкакыліг паськаліс, кайис вывлань, сэсся шыөн кватитис-апыштис рыгнас на сюявлөм пес плакаяссө. Ыпгьялысь би вылө видзөдігөн Паш Васьлөн сьөлөмыс вочасөн небзис, став дум-дойыс здук жежлө быттьө кытчөкө сылі-воши... Пуксьысь луныскөд тшөтш, керка пытшкын летйысиг-ветлөдлігад, өтка морт и ачыс дзикөдз садьмис. Пөрысь вирыс дырөн-надзөн шоналіс, ониш виччысьтөг уси кос пельпом вывсьыс. Юрыс эз нин жувгы водз асывьясин моз, лои сөдз да сөстөм. И ыджыд пачын ымралысь бисө синнас малалігөн Паш Васьлы том кадас моз жө окота лои водзө овны да овны. Дыр-дыр на кывзысьны тайө асья чөвлунас, нимкодьясьны өшинь сайын сапкөм йөв еджыд лымйөн, сывйыштчыны-сольнитчыны ыб помын сулалысь кыддза раскөд...

...Ывла вылын вочасөн югдіс, дженьыдик төвся лун водзсасис вопомся кузь войкөд, мый вынсьыс зілис петкөддыны мөдыслы: шондіыс бергөдчис тулыс-гожөмлань, кузь да пемыд войөс сійө регыд мысти вермас, быд здукөн өд пестысьысь лунлөн оломыс нюжалө да нюжалө. И воас кад, кор сикт весьтысь пемыдыс дзикөдз вешгьяс бокө, гожся пөсь шондіыс сөмын сутш жежлө мөдас дзебсьывны помтөм-дортөм вөртас сайө, сэсся бара на

мыччыяс веж парма весьтын, медем кузь лунтыр гажодны му
вылын мырсысь-олысьяслысь сьолөм-ловсө. Но тайö шоныд да
мича пöраодзыс коліс на кузь төв вуджны...

Вом дорышнас легөдіг Паш Вась пошкис-вешталіс öшинь
занавесьяс — первой пыді жырсыс, сы бöрын петіс мөдарас,
пачводз дорас, көні муртса на тшай юис да ыджыд пачыс лом-
тысис. Тані куим öшинь жö. Жырйыс шоналөма да гыöртөм
öшиньясыс быттö бөрэдзөмаөсь, көдзыд төлөн серпасалөм стек-
лө кузя лым ва төпкис увлань, чукөрмис öшинь воргаö. Ковмис
Паш Васьлы кias ветöк босьтны да быд воргаысь косөдны
көдзыд васö. Тадзи öтарö-мөдарö бергалігaд сійö весиг мыссьөм-
бритчөм йывсьыс вунөдіс. Видзөдіс мөдар пызан вылын сула-
лысь рөмпöштанö да ас водзас юръяндзим лои: луннас лавка-
пошта вылө мөдөдчө, а чужөм-рожаыс вөрö вошлөм мортлөн
кодь. Мыссьытөм-бритчытөм, син горулыс вöйөма, посни чукуръ-
яс кырөмаөсь паськыд плешсö, кольөма сөмын чангыль нырыс
да лым еджыдөдз дзормөм юрыс. Сө лешак тай! Юръяндзим
бур йөз водзас тадзитö петкөдчыны. Мед көть сы мында арөса.
Сиктса бабаяс пыр и сөрни лэптасны: юсьөма пö, тыдалö, öтка
пöтка олысьыд. Көть сэтшөм грекыс и абу, а на вомысь бара-й
быльснитас-петас. Быд лешаксö вермасны шуны. Час, час, слöй-
мас на ыджыд пач ваймытөдз чужөмбансö шыльөдны-мольөдны.
Пөсь ваын көтөдіс кык майтөг тор, гудраліс-бергөдіс мавтчансö
ичөтик дозйын, мед быг лои, да тайö еджыд быгнас кызакодь
тяпөдіс-ниртіс тошсялөм бандзибьяссö. Сувтліс улөс вылө да
пыді шкап помысь лэдзис нэмөвöйся бритчан көлуйсö. Весиг
нюмыс петіс пöрысь мортлөн: кымын во нин налы, а век ловъя-
өсь, век на шыльөдны-мольөдны да томмөдны Паш Васьос.
Немеч муысь ставныс. Ок бурөсь да мортлы лөсяланаөсь. И
бритчан станыс, и кузьмөс көрт көрөбыс, и быг суктан-мавта-
ныс, и сы улө мича дозйыс. Сөмын ус-тош шырансö лоö вежлав-
ны, ныжмасны да. Война вылысь локтігөн на тайö бритчан кө-
луйсö вайліс ылі Германияысь Паш Вась. Нöшта аслыс кыз во-
ротника төвся пальто, гоз-мөд дөрөм-гач, мамыслы чышгьян-ков-
та, платтö вылө мича дзоридзьяса дөра... Мыйта вермис, сы
мында и нуис немеч мусьянь Паш Вась. Кык ыджыд ноп тыр
быдсяма шыльө-мыльөсö. Төдіс өд: Эжва йылын сөки татшөм
көлуй-дөраястö гежөд морт адззыліс. Эз тай гусьяв гырысь чинаяс
моз, а ньөбис ас сьөм вылө. Война бөрти роч садатьяслы су-
йөр саяд мынтысисны бура, немеч маркаөн и...

Вель дыр Паш Вась бритчис-мольөдчис гөгрөс рөмпöштан
водзын. Тадзи и этадзи видзөдаліс асьсö, мед чукур костьясас
чепөсйылөм тошкыс эз коль, да вöлисти мыссис, небыдик ки
чышкөдөн косөдіс шылялөм чужөмбансö. И медем дзикөдз нин
сьолөмыс бурмис, кисьтіс ки пыдөс воргаас «Шипр» одеколон.
Но унджык лоөма. Сьпирт сора чөскыд дука мавтчанторйыс
дзужаліс Паш Васьлысь бандзибьяссö да плешсö, биа öгырөн
сотыштіс вом дорьяссö. «Э-э, сötана пызь!» — гораа ружөктіс
Паш Вась, кор гөгөрвоис, мый жаль төдтөг койыштіс чужөмас
турунвиж рөма одеколонсö. Тадзтö брольсйисигөн сылы быд
вежон ковмас мавтчантортö ньөбны, сө лешак. А мый öтка
мортыдлы и дзескөдчынысö, мый понда скупитчынысö? Бритчөм

да шипрасьом бӱрас быттӱ кызь арӱс вылӱ томмис, чужӱмыс шыльыд-мольыд лои, чӱскыд кӱрӱн ӱвтӱ сы дорсянь, а оз курыд зелля дукӱн. Мед бара-й исасьоны лавкаӱ волысь бабаяс. Ӑнӱ, небось, пиньныс ныжмас. Мед и ныжмас, Паш Васьӱс кузь нэмтӱ бритчыны-мольӱдчыны прамӱя дышӱдӱс жӱ. Абу весьшӱрӱ коркӱ ӱти мудер да дыш пранцуз шулӱма: нэмтӱ бритчӱм дорысь пӱ бурджык ӱтчыд кага чужтыны. Гашкӱ, суйӱрсайса мортыд и збыльтор висьталӱ да. Гач новлысьяслысь сьӱкыд олӱмсӱ кок-нӱӱдӱм ради. Сӱмын тай Паш Вась эз на кывлы, медым айлов пӱвстысь кодкӱ кынӱмасьлис да кага вайлис. Тадзи кӱ лои, шондӱ-ыс эськӱ вежон чӱж эз петав. Вӱльнӱй светас кузь вой пуксис. Мый нӱ сийӱ нинӱм абусӱ кутӱс казътывны? Дзикӱдз пӱрысьмис али мый? Регыд ыджыд пачыс ваймас, посни ӱгыръяс нин шара-кылӱны коколюка улас; пӱддалас пачсӱ Паш Вась, да позяс и сиктса лавкаӱдз кайлыны, пошта вылӱ пыравны...

Муртса на идралис Паш Вась бритчан кӱлуйсӱ, виччысьтӱг пеляс тӱныгыны кутӱс. Асья чӱв-лӱньсьыс ли, ӱтарӱ-мӱдарӱ бергалӱмсьыс ли, шкап помӱ судзӱдчылӱмысь ли... Код тӱдас мыйысь, пӱрыся нэмнад. И сутш гӱгӱрвоис: оз весьшӱрӱ, тыдалӱ, зильгы. Важ йӱз казъявлӱмаӱс — кутшӱмкӱ юӱр водзын пӱ кывлӱ пеляд триньгӱмыс. Сӱ мокасьт тай. Юӱрыд ӱд лӱк и бур овлӱ... Гашкӱ, челяд пӱвстсьыс кодкӱ воыны кӱсийӱ да, Виль во кежлас? Батьсӱ гажӱдӱм ради. Тонӱ кымын лун январнас оз мӱдны уджавны, быдса кык вежон артмӱ. Нывъясыс кӱ оз эштыны-слӱймыны, ӱлексейыслы мыйла не кайлыны сы дорӱ лун-мӱд кежлад. Пывсян эськӱ ломтылисны, корӱсьӱн швачӱдчисны, пиыс кӱть батысылысь лудысь мышсӱ зырыштитс... Ловныс личалас пывсянад да сьӱд войӱдз позьӱ пызан сайын батя-пиалы пукавны, сьӱлӱмнысӱ восьтыны ӱта-мӱд водзын. Сӱки эськӱ Паш Вась и ассьыс гуся тубрассӱ пӱлатъ вывсьыс лӱдзлис, ӱлексейыслы кипом гижӱдъяссӱ петкӱдлис. Лыддяс да мед пель саяс пасъя-лӱмасӱ сюркнялӱ... Кыкнад, майбыр, кутшӱм гажа пемыд рытъяс-нас. А то Паш Вась мудзис нин ачыс аскӱдыс тольӱдчыны.

Сылысь майшасьом-пессӱмсӱ быттӱ Енмыс кылӱма: мӱдар жыръяс вель яра телепон триньӱбтӱс. ӱтчыд, мӱдысь да-й коймӱдысь. Триньӱбтӱс виччысьтӱг да гораа чӱв-лӱнь керкаад. Паш Вась весиг чермулис, сӱсся кыдзкӱ-мыйкӱ слӱймис жӱ матыстчыны телепон дорас.

— Алльӱ, алльӱ, кодӱ нӱ тайӱ звӱнитчӱ? — юалис сийӱ мӱдар помас сӱрнитысьсылысь. — Мыйкӱ дзизӱдчӱ-дзизӱдчӱ телепонас да омӱля кыла. ӱлексей али мый тайӱ?

— ӱлексей, ӱлексей тӱныд звӱнитӱ. Тӱдӱн тай зӱв ӱдйӱ, сидзкӱ меным некор не озырмывны, — шмонитӱг шыасис карын олысь пиыс. Шыасис да шлапкис-юасис водзӱ: — Кыдзи нӱ олан-вылан? Он-ӱ висьӱдчы? Мыйкӱ дыркодь письмӱыд тӱсянь эз вӱв да... Ачым важӱн тӱныд мӱдӱдлӱ, а вочакывийыс век абу?

— Виччысь, регыд воас. Кык-куим лун сайын ыстӱ. Поштаыс тӱвнад, гашкӱ, лӱка ветлӱ да та понда карӱдзыд эз на лок... Миян выльторийыс танӱ нинӱм жӱ абу. Ставыс важ ногыс. ӱт-кӱнтӱ нӱ менам кутшӱм олӱм? Висьма кӱ, некодлы весиг лекарствотӱ сетны, тшай кисьтны, ва мыччыны... Кыдзкӱ-мыйкӱ тай дзурта-а, пӱрысь олӱмӱс пудъяла...

Паш Вась ыджыда ышловзис да ланьтӱс, тыдалӱ, виччысис

писяньыс воча шуом. А модыслы кывйыс некыдзи эз сюр, дойдис-кырыштіс сьолөмсö батгыслөн элясьомыс да. Быттьö Олексей ставсьыс мыжа. Сё морö тай! Бара норасьö батгыс, бара сылысь öткa оломьд муссö зыртö. Кымынысь Паш Васьлы гöтырсö дзёбöм бöрын вöйылісны пи-нывьясыс карö лэччывны, на ордын кузь төвсö колявны. Быд ар, картопель керöм бöрын, öти и сійö жö сёрни пансьыліс: вай батьö, Криста ради, олышт төв сьомөссö челядь дорад, кык кокни аслыд лоö. Пескыд этшаджык мунас, ватö оз ков трубаысь кыскавны, локантьö петкөдны, пач ломтыны-ваймөдны, лавкаö кайлыны, пусьыны-бергавны... Но Паш Вась век кинас и кокнас пыксис — сира гезйөн сійöс он вöрзьöд ас керкасыд да изъя карад лэчкөд... А дзизгыны-дзизгыны, небось, востер. Он и виччысь, а гирснитас ёсь кывнас морöспань увтö.

— Мый нö сэнi ланьтін? Унмовсин али мый?— бара шыасис ылын кылысь батгыс.

— Эг жö унмовсь, абу öд сьöд вой. Кывза тэнö, гажöй бырöма да,— Олексей быттьö эз казав батгыслысь броткөдчөмсö да зілис бергөдны сёрнисö дзик мөдарö. Висьтавны кө сылы ставсö, висьтавны нин. Дöзмас көть оз пöрысь мортыд...

— Гажыд кө быри, волы дай. Батгыд öд тэнад дзик öти...

— Вола, дерт, эн шогав... Виль воöдзыс көть бура ылын, но чолөмала тэнö локтысь празникнас. Кузь нэм да бур шуд, батьö! Дыр на ов — гажöд ставнымöс.

— Аттьö чолөмалөмсьыд, аслыд быд бурсö жö сиа. Челядьдылы да, гöтырыды да... Но виччыся, сідзкө, празник лунъясас. Жежалан, мися, ме ордö?

— Вола, батьö, вола, но ог öнi, а важ Виль во кежлас. Буретш Василей лун сэки лоö. Водзджыксö бөжöй кузь — кага да бая, ачыд гөгөрвоан... Виль во да мый да...

— Бара мыйкө нинөм абусö долян... Батгыд тиянлы нэм чöжыс зілис бур вöчны, сөмын ме йылысь век вунөданныд,— ярскöба вочавидзис пиыслөн кывъяс вылö Паш Вась да телепонсö пуктытөдз гоз-мөдысь на чепöльтіс:— Кор кутан локны, водзвыв юөрт, мед весьшөрö не виччысьны. Арсяньыс нин мөдөдчан, а сё мокасьт, пыр абу. Регыд лымйыс сывны кутас...

— Оз на сыв. Тöлыс муртса пуксис. Эн вай дивит менö ёна, Василей лун кежлас быть вола. Дзонь вежон ола. А öнісö дзик ог вермы. Во помад то öтитор, то мөдтор падмөдö...

— Мый меным дивитнысö? Аслад юрид эм... Абу нин, майбыр, дас квайт арöса,— дзикөдз дөзмис пи вылас Паш Вась да виччысьтөг шлапкис-пуктіс телепонсö. Водзöсö сёрнитны пузьöм вир-руыс эз сет: думнас Паш Вась виччысьмөн виччысис Виль во кежлас Олексей писö, а збыльвылас со мый лои. Бара ковмас öтнаслы шогсö пыкны, аслыс аскöдыс торгыны-баргыны, телевизор пыр öтилысь да мөдлысь вежнясьöм-кикимеритчөмсö видзөдны. Ёна тай колантор... Сыв пасьта аттьö таысь, муса пиукöй. Пöрысь батьтö лөсьыда и көмөдін. Көсийсьөмсьыд несйöм артмис...

Лөсьыд югыдөдз дузьяліс пи вылас Паш Вась, броткис весиг ыджыд пач пöдлалігөн, пидзöс вылас кор паччөрö кайліс, медым юшкасö помөдз тупкыны. Пузьöм вирсö лөньөдөм ради жö зунясис пачводзын: мыськыштіс чашка-пань, чышкыштіс джоджсö,

лөкань увъяс, чери бөж сетіс бергалысь-нюргысь каньыслы. Сибөдчыліс здук кезлө өшиньдорса лабич помө, медем асьсө шойччөдыштны, өттшөтш и артыштны, мый водзө сэсся вөчны-керны. Лавкаө кайлытөдз первой ывла вылө петалас, бара, сө лешак, лымсө тöрытъя моз ковмас весавны, войбыднад кильчө помөдзыс нөбалө-тыртө. Та бөрын нин мир туй кузя Пөжөм чой йылө кайлас, нөобасыштас магазин-лавкаясас, пошта вылө кезалас. Öтка пөткаыдлы нө уна и колө. Каньыслы да... Мыйкө позяс и курыдторсьыс гортас лэччөдны. Вылө во со матыстчө, а сы бөрын и аслас чужан лун... Буретш Василей водзвылас. Öлексей пиыс көсьысьсө волены и. Слөймөдчас кө, дерт, ерөма-каньыд... Мед нин көть важ Вылө во кезлас, батыс сэтчөдзыд сөысь на удитас небзывнытө. Кыдз нө верман аслад вир тусьяс вылө лөг кутны?

Гөбөчдорса тувйысь Паш Вась судзөдіс важиник пупайка, пошкигтырйи пасьталіс сійөс, сатшкис дзор юрас нойөн эжөм пеля шапка да дзуртыштис керка өдзөсөн — петіс ыркыд посводзө. Но важ мозыс гид-карталань ни чуланлань эз мөд кезавны, киас вурун кепысь кутіг веськөдчис кильчө өдзөс дорө. Öти көрт иган восьтіс, мөдөс, сэсся весът кузя каличөн гольснитіс, вештіс шуйгавыв, та бөрын бөръя кутөдсьыс мездіс өдзөссө — вомөналөм кыз потш перйис өтарө-мөдарө тувъялөм скөбаясысь. Пөлынтыс кос потшсө посводз пельөслань, няжөбтөмөн восьтіс кильчө өддзөссө. Восьтіс да быдсөн шай-паймуніс: войбыднад сы мында лым сапкөма-усьөма, сө лешакө. Кильчө содъясыс муртса тыдалоны, еджыд визьөн төдчыштөны, а керка дорөдз локтан туйсө дзикөдз нөбалөма-тыртөма, шыльөдөма-мольөдөма гөгөр, көть эськө төрыт на сійөс пөсь петмөныс весавліс. Повод-дьяс тайө төв тешитчөмөн тешитчө йөз вылын, лымйыс лун и вой шлапкө-усьө, этш оз төд. «Воөдчө, тыдалө, Енмөн индөм тшупөдөдзыс», — мөвпыштис ас кезсьыс Паш Вась да кузя ёрч-чыштөм бөрын кизяліс летйысьысь пупайкасө. Кильчө помад абу көрт пач дорын пукалөм, көдзыд төлыс пыр и котөртис-пырис питшөгас, йи кодь ловшынас чепөльтіс Паш Васылысь гурскөм-бритөм чужөмсө, кузь да вөсни голясө. Ывла вылө петысь йөжгылясьыштис, пыдөджык сюйис юрас кузь пеля шапкасө, сьөд гын сапөга кокнас тапикасьыштис өтарө-мөдарө; коркө веніс жө дышсө — босьтіс киас пос помысь пу зыр да кутіс нускыны-весавны содъяс вылысь мустөм толасө. Паськыд содъяс кузя, лымсө шыблаліг, вочасөн лэччис увлань, воис кильчө помөдз. Та бөрын, өддзис да, весалис аслыс медся колана ордымъяс. Öтикөс — пес чипаслань, мөдөс — пывсян дорөдз, коймөдөс — ва ваялан туй, сэсся пөсьвывсьыд и дзиръя бердөдз воис, лавкаө кайлан ордымсө лым-толассыс мездіс. Кос доймытөдз лои мырсьыны пөрысь мортлы — нөбалөма войбыднад адөй-адөй да, пидзөсөдзыс вөйласис Паш Вась потшөс прасла бокын, дзиръя өдзөссө муртса вермис восьтыны. Керкаас пыригөн нин кепысь-нас лым чукөрсө вештыштис и пошта куд вылысь, весът судта сэтчө чукөрмөма да...

Пөсяліс Паш Вась, дөрөмсө көть пыдзырт, атшаліс быдөн. Сулалө кильчө өдзөс дорас — водзө ни бөрө, ачыс асьсө шойччөдө. Арлыдыд тай, майбыр, төдчө. Со кыдзи сьөлөмыс нетшкысь-чеччө пупайка улас: гып да гып, гып да гып... Мед эськө

да, мед чепсасьё... Бара на өти удж лои вөчөма-помалөма сылөн, бур, мый веніс дышсө, ывла вылын легөдчыштис, ки-коксө песьштис. Позис, дерт, и не горшасьны, вочасөн весавны лымсьыс йөр пытшсө, кыкысьөн, шуам. Асывнас да лавкаө кайлөм бөрас. Но Паш Васьыд Паш Вась и эм, босьтчас кө мыйкө вөчны-бергөдны, сувтнысө оз нин вермы, быть помөдзыс вайөдас. Öнiя моз. Этшыс мортыслөн сэтшөм да. Нэмсө татшөм этшнас оло-вылө...

Ыркыд сынөдыс өдйө на и чепөльтис пөсялөм мышсө. Уна нө колө пөрысь мортыдлы. Муртса сулыштис, а көдзыдыс йоткаліс-вөтліс нин Паш Васьөс шоныд керкаас. Сэссия и нюжмасьнысө сылы дзик некор. Киын новлан часіыс петкөдліс буретш лун шөр кад. Мөдөдчылас, буди, лавка-пошталань, мөжгас кө нөшта дырджык, рытыс вочасөн таялас... Дай небыд няньтө кватлаласны лавкасьыд, ковмас аскиөдз сылы виньгыртны, көтөдөм сукар нямлявны. Кокни сьөлөмөн и пырис гортас Паш Вась, ыркалыштөм-пальөдчөм бөрад пөрысь вирыс визъяліс сөнъясас, өтар и мөдар бан бокыс гөрдөдөма да югъялө, быттө выя бордйөн мавтыштөмаөсь. Регыд мысти Паш Вась өшөдіс нин керка өдзөсө көрт томан да петіс дзиръя сайө, өтарө-мөдарө дзоръялігтыр шлапиктіс-мөдөдчис Пөжөм чойлань. А чой йывсяньыс и сикт шөрыс орччөн, сельсөвет да лавка-пошта. Слөймас на тай сэтчө-татчө кежавны...

Пөжөм грездыс мича да кос инын пукалө-тутвидзө. Öтар бокас паськыд ыбъяс нюжөдчөмаөсь, синмыд зурасьө на помын шевкнитчөм веж пармаө, мөдарладорас Эжва ю мегыр моз ку-сынътчөма, вежтө петкөдлө мичлуннас. Кор воан чой йылөдзыс, видзөдлан шуйгавыв да веськыдывыв, лолыд личавлө, сьывны окота, ок и кыпыд гөгөр. Став шогыс и лёкыс вунлө сэки Паш Васьлөн, быттө Иван лун рытъяө небыдик корөсьөн пывсяс, сэтшөм лөсьыд сьөлөм вылас.

Налөн Ягвыв грездыс Пөжөмысь ёна улынджык, паськыд вор пыдөсын моз керкаясыс сулалөны. Но мича жө, ас бана, пывсян-потшөсьясыс ылі нюръясын чужөм ичөтик юө пыксьөны. Ю саяс вөр посёлок сулалө, сылы паныд, пөжөма ягас, сиктса шойна нюжөдчөма, орччөн Кулөмдінө кайысь туй тыдалө. Сиктса лавкаясө Ягвыв грездсянь Паш Вась Пөжөм пыр ёнджыкасө кайлывлө. Чорыд веркөса мир туйыс сэті паськыд да шыльыд, ылөдз тыдалө. Журъялысь машинасысь көть поэьө кежыштны. Лэбалөны найө асывсяньыс сёр рытөдз, пемыднас на, видзөдан да, вөр тырөн грымөдасны. Петкөдөны-нуөны кытчөкө лун и вой чинталөм пуяссө, тулыс-арө сөмын ланьтыштласны, туйясыс нильзясны-жугласясны да. Пөжөмын ыджыд да сьөкыд машина-яссьыд коркөя чорыд мир туйыс вөрзьөма жө нин, жугласьны мөдөма. Но вөчысь-дөмысьыс абу. Төвнад быттө шыльыд-мольыд гөгөр, а лым сылөм бөрас гуран бөрся гуран петкөдчө. Коктө поэьө чегны... Миян тай бурыд, майбыр, оз дыр кежлө вужъясьы. Öдйө на сійөс лёкө бергөдасны-пөлыньтасны...

Паш Вась восьлалө чой паныд да завидьпырысь син водзас сувтөдлө немечөн вөчлөм туйяссө, кор Германияс пырисны война помланьыс. Мунан сьөкыд танкнад, да пемыд кө, бикинь-яс сьавкйөны-чеччалөны гусенича помсьыс, сэтшөм бура тэчлөма немечыд чорыд веркөса быд туй. Сөмын зымөдө-төвзьө Т-34-

ыд, матö машина öдөн. Быд ыб-му дорö налөн сэки нин вöли изйысь шыльöдöм туйыд. Дерт, Европа джынсö кок уланьс кутисны, пеж гагъясыд, пычкисны öтилысь да мöдлысь озырлунсö, но олисны сэки эз гöля, мян серти кө, зэв на лышкыда. Да и война кусöм бöрас öдйö кыпöдчисны-ловзисны, көть эськö мыйта жö кар да сикт налысь кисьтисны вира косьясас. А ми, сэкса сьöкыд тышас вермысьяс, дöмаса гачтö ды-ы-ы-р на нов-лим... Вылиас пукалысьяс, чина йöз, век бур олом көсийысисны, коммунизм да, шоныд патераяс да, югыд аския лун да... Асьныс, лешак поэясыд, мир джынйыслы отсасисны, му шарлөн быд пельöсын көсийысны социализмлысь быдмөгсö вужйöдны. Но вужъясьöм пыдди косьмис сийö, а кадыд сэк кості тövзис-муніс... Муналісны вочасөн мöдаръяугыдас и порок-тшын апыштлысьяс. Öнi война выlö ветлысьяс пövстысь ас сиктас Паш Вась дзик öтнас коли. Медся томыс, пронт выlö бөръяөн босьтöмаыс. Мукöдыс, сё сайö морт, кодъяс бöрсö волісны гортаныс, кыз му улын, орчча пожöма ягын куйlöны. Налы, шонъянöйяслы, шоныд патера ни тыр-бур олом сідз эз и вичмыв. А лишалис ыджыд войнаын вермысьяслы сöмын сир курыд шог да чужан сиктса тайö лөнъ шойнаыс...

Шлапсьöдіс Паш Вась чой йылöдзыс, сэнi сувтовкерліс ловсö личöдны. Бергöдчыліс öтарö-мöдарö, син пырыс лэдзис лым пиö куткыртчöм керкаяссö. Морöспань увсö пöрысь мортыдлысь сотыштiс: ловъя лов матігöгöрын эз тыдав. То öти керкаын, то мöдын — би ни ва, öшиньяссö кузь пövьясөн тувъявлöмаöсь, лымйыс кильчö вылöдзыс пуркөшитöма-сапкöма. Тайö со Илля Борлөн эндом керкаыс пöлынътчöма-сулалö, эсийö Расов Лёнялөн лымйөн тырöма, тонö Сидөр Анналөн стыныс пазалöма, боквыв киссьыны-пöрны видзöдö... Шуштöм лои Паш Васьлы. Сэнi олысьясыс важөн нин эновтлісны таладор югыдсö да Кулөмдiнö мунысь туй бокын куйlöны... Дзикöдз тай топалöма-ичöтмöма сиктыс, содз тыр олысь регыд кольö тадзитö. А öд водзын тшак мында керка чой йылас сулаліс. Важ йöз вöли казътывлöны: би пыр и ва пыр пö мунлöма сиктыс коркö, гашкö, сё во сайын да. Öти мича да кос гожа лунö ыпнитöма кодлөнкö керка, сы бöрын мöд, сэсса коймöд... Кусöдчынытö некоды, став верстьö йöзыс турун пуктöны мöдлапöлын, горт овны кольöмаöсь пöч-пöль да челядь. Сикт джынсö нюлыштöма сэки адгорш биыд. Кыдзкö тай сэсса ланьтöма-övсьöма жö. Тайö сотчылöм бöрас и пысасьöма сиктыслы Пöжөм нимыс.

Мый нö нэмöвöйсясö казътывны. Во кызь сайын на, мича ар сэки сулаліс, буретш челядь школаö мунісны, тшынйыв кайис Петыр Васьяслөн ыджыд овмöсыс. Гид-картанас, мös-куканьнас да став эмбур-көлуйнас и быдөн. Тані, Пöжөмас жö, кыпаліс керканыс, сиктса школасянь неылын. Уськöдчылісны эськö сикт-саяс кусöдчынытö, ведраясөн öтарö-мöдарö гольöдчисны, орчча трубаясысь котөрөн ва кыскалісны, но биыд вынаджык вöлöма: апыштiс квайт пельöса керкатö сэтшöм öдйö да трачкакылысь шыөн, мый ковмис эновтчыны кусöдчысьяслы весышөр уджсьыд. Кыдз нö содз тыр ванад яр битö верман венны-пöдтыны? Быть лои сулавны сиктсалы да видзöдны, кыдзи гöрд кывъя гундырыд тешитчö керка вылас. Йöз вылас да, кодъяс котралісны Петыр Васьяслөн ыпъялысь овмös гöгөр, öта-мöд вежмөн горзiсны, ныв-

бабаяс пиысь унаён синванысö чышкалисны, а сэк кості и керка вевтыс gryмгысис-ляпмуні. Паш Вась сотчысь керка дорас жö лöсяліс, йöзлысь горзöмсö кыліс да. Мый вермис кояліс ыпгьялысь кильчö вылö көрт ведраясысь ва. А кор дзикöдз атшаліс, лолыс тырис, вешйис Петыр Васьяслөн керка мöдар бокас, стынланьыс. И карта-гид костсыс казяліс ловъя ловöс — Васьлысь кыйсян-вöралан понсö. Съöда-еджыда рöма, крукыль бöжа лайка мый вынсыс нетшкысис дом повод йылын, никсис-тявгис, а дурмöм би вочасөн матыстчис и матыстчис понлань, зілис апыштны-нямявны и тайö кывтöм пемöссö. Паш Вась, война пыр мунлöм мортыд, мöжгыны да öтарö-мöдарöасыны дыр эз кут, пöрччис пупайкасö, тупкыштіс сійөн чужöмсö да уськöдчис понйыдлы воча. А биыс орччөн нин трачкакылö, здук-мöд мысти нель кока ёртыдысь ловсö босьтас. Сяммис öд кызкö-мыйкö сэки понтö мездыны көрт чеп йывсьыд, көть пупайка сос помьясыс вель ёна чишкасисны. Мöдыд кыз тай лыйыштіс-чепöсйис сотчысь керка дорсьыд, крукыля бöжыс сöмын и усьліс Паш Васьлы син улас. Коркö бöрынджык, зык-шум лөньюм мысти, Петыр Вась матыстчыліс, шамыртлис-топöдліс Паш Васьлысь кисö, аттьöалис понсö мездöмысь. Петыр Вась нэмсö кыйсис-вöралис, да Катшысыс сылы ылі парма-вöрад вöлі медся бур ёртөн. Понйыс, кор адзыліс та бöрын ассьыс мездысьсö, меліа ниртчыліс Паш Васьлөн кок бердö, никсис да чеччалис сы гөгөр. Кывтöм пемöсыд тöдіс: тайö кык кока ёртыс и дорйис сійöс пöтлытöм биссьыд...

Лавкаö пыртöдз Паш Вась пыркнитіс гын сапöга коксö да воськовтіс порог вомөн. Йöзыс эз вöv уна. Вузасьысьыс, Прокö Анна, нянь чöвпангьяс мешöкысь лэпталіс, лыддис-арталіс найöс. Чипан Лида да Петыр Катя мыйкö ас костаныс блонгисныс-сёрнитісны, виччысисны, кор мездмас вузасьысьыс. На бöрся сулаліс тшöтшаммös ныр-вома, сьöкыд пеля Микол Петыр, Илля грездса олысь. Сы дорö и матыстчис-лöсьöдчис Паш Вась.

— Кызди нö олан-вылан, мый выльыс кывсьö? — юалис кадсö каттиг Паш Вась.

— Мудзмөн лои шлапсьöдны, гөгөр нöбалöма, пöсялі быдсөн, — босьтчис ассьыс нырны-висьтавны гөрд чужöма Микол Петыр, нем эз кыв, тыдалö, пельыс да. Ачыс сьöкыда упкис-лолаліс, быттö кузь лунтыр пес кералöма.

— Мися, кутшöма нин олан-вылан? — горöдіс Петырлань нюжöдчылöмөн Паш Вась. — Выльыс мый кывсьö?

— Мый нö миян вермас выльыс лоны? Пукав да олём помтö виччысь. Пöрыся-нэма кадад... Дзуртам тай кызкö-мыйкö-а, — ловзис Микол Петыр. — Ныв-пи гозъя Виль во кежлас мöдöдчöны таланбö, да ньöбасыны вои. Ог тöд, мый и лэччöдны гортö. Ёна чöскыдторсö мед асьныс вайöны дай, колöкö. Карсянныс...

— Менам челядь кöсйысисны жö воыны. А куш кинад паныдавны найöс абу мича. Вывьося празьник матыстчö. Мыйкö, мися, колö жö ньöбны-нуны, — пöрйыштіс челядь локтöм кузяыс водзын сулалысьсö Паш Вась. Микол Петырлөн ныв-пи волём йылысь шуöмыс биён моз сотыштіс пöрысь мортлысь сьölöмсö да ылöдлöмыс артмис дзик виччысьтöг. Кывйыс ачыс больснитіс-шуис пöръясянасö... Морös вылас курыд лои да, мый öтиясöс челядьныс быд пöрйö гажöдöны, а мöдьясысь кöдзöдчöны, весиг

лун-мөд кежлө кайлынытö дыш. Волөн бөръя лунö сылы бара өтнаслы ковмас тыртөм керкаын тутвидзны, телевизор дзоргыны-видзөдны...

— Челядыд миян пöслукманöсь, кывзысьöны гозъялысь,— өддзис да кутіс ошйысьны лавка тырнас сьökыд пеля Микол Петыр, быттö тöдөмөн дэльöдіс орччөн сулалысьсö.— Паныд лёк кыв оз шулыны. Тöрыт на телепон пыр сёрнитім. Чужан лун буретш вöлі да кыкнанныс чолөмалісны, кузь нэм да мый да сиисны. Но, мися, шань, шань... Кымын во сетас Енмыс, сы мында и ола. Абу өмөй сідзи, Павлович?

— Енмыд, дерт, тöдö, мыйта миянлы таладор югыдас овны-вывны сетöма. И ме думысь, ас челядыд быд бать-мамлы медся бурöсь да мусаöсь,— гартөвтіс-сюркняліс кыптылөм сёрнисö Паш Вась, кор казяліс, мый Микол Петыркөд кыкөн нин кольö-маöсь лавка пытшкас.— Ньöбась вай, Петыр батькович, ньöбась, а то миян сёрни-басьниыд оз помасьлы...

Микол Петыр, шуөм бөрад, слöймөдчис жö бергөдчыны Прокö Анналань да баябөжсö гыжъяліг дыр кораліс вузасысьлысь өтитор да мөдтор, лабутнöя сөвтіс-тэчис ыджыд нопйö мыччөм сёян-юансö, нюжөдліс Паш Васьлы кузь кисö да шавксöдіс-петіс лавкаысь. Мый бара-й ньöбны талун-а, лэччөдны гортас? Прокö Анна чöла виччысис, дзоргис-видзөдіс Паш Васьлань, а мөдыд век на мыйкö мөжгис-бөрйысис.

— Вай меным өти чөвпан еджыд нянь. Мös выйтö кило джын. Небыд калбассö өти тупöсь. Кын черитö, скумбриясö, вит-ö-квайт юр. Кампет-көлач весит мыйтакö... Ачыд бөрйы, небыдджыксö. Чипан кольктö дасөс, шыд пуны порсь яя кансер-тö витөс кымын, сы мында жö кильки банка. Виль во кежлас шампанскöй доз да водка сулея,— ньöжйөник лыддьöдліс Паш Вась, а Прокö Анна тэрыба котрөдліс-тэчис сы водзö корөмтор-сö. Мөдыс гөгөртіс синнас мылькйөн лэпталөм сёян-юансö, мед эськö нинөм жö эз вун.— Шань, тыдалö, талун кежлө, сы мын-датö кыскыны өш вын колö...

— Аслад нопйыд пö век кокниджык, Василий Павлович. Чой увланьыд өдйö на и тюрөдан-нуан,— пыльснитіс-серөктіс Прокö Анна, кор Паш Вась лабутнöя лыддис да мыччис вузасысьлы сьом чукөр. А нылыд виччысьтөг тшөкмуні-ланьтіс: сёрөн, но воис юрас, мый ковтөмтор кыв йывсыс чепөсйис...

— Менам кадөдз олан-вылан, мича аньöй, да сэки гөгөрвоан, кокни али сьökыд та ыджда арлыднад пудъя ноптö кыскавны. Дерт, гөгөрвоан кө,— ас ногыс чепөльтіс беринөсь чужöма нывтö Паш Вась да воча нюмгёвтіс — небыдика, аслас челядылы моз, медем ёнасö не дойдны вузасысьлысь том сьölөмсö. Паш Васьлы кымынысь на ковмас тайö лавкаас волыны, сёян тыра нопйөн кыскасьны.

— Ме вед шутитігмоз шуи, эг сералөм ради,— дорйысьны босытчыліс кокни вома Прокö Анна. Мортыд чужөмнас вежсис, пель йылөдзыс гөрдөдіс.

— Быттö эг вежөрт... Шмоньлив йөзыдкөд и оломыд кык кокни. Ачым на рөдысь жö,— вузасысьлань өвтыштіс кинас Паш Вась: мун пö сэтысь, менсьым кывъясöс тöд вылө эн босыт.— Аттьö сёян-юансьыд, ныланöй. Водзö мөда, пошта вылө на пыравны колö...

— Кежавлӧй небыд няныдла. Аскомысь бара ваясны,— пети́гас нин съӧлӧм бурмана горӧдіс Паш Васлы Прокӧ Анна, но мӧдыд, тыдалӧ, эз кыв, кыммӧм ӧдзӧсыс гораа дзуртыштӧ да. А лавкаӧ сзк кості ӧти да мӧд кутіс люзгыны-пырны, быттьӧ ставныс сёрнитчӧмаӧсь лун шӧр бӧрас ньӧбасыны да уськӧдчӧмаӧсь сикт шӧрлань. Томджык йӧзыдлӧн кокныс, майбыр, печласьӧмӧн печласьӧ. Паш Вась вешйыштӧ кузь пос бокӧ, сетіс пырысьяслы туйсӧ да лавка дорсянь кежис шуйгавыв, веськӧдчис съӧкыд нопнас сиктса пошталань. Вэль во кежлӧ пи-нивъясыслы мича открыткаяс ньӧбны. Ас кежсьыс мӧвпаліс: бур сиӧмъяссӧ гижас да лавкаӧ кайлігмоз аскомысь и чӧвтас пошта кудйӧ, мед ӧдйӧджык воасны челядьыслы...

Рӧмдыны нин кутіс, кор Паш Вась пырис гортас. Керка ӧдзӧссӧ игналіс да первой шняпкысис-пуксис паськыд лабич вылӧ, ловсӧ личӧдыштны. Атшавмӧныс лои талун ӧтарӧ-мӧдарӧтӧ кайлігӧн — вомыс дзикӧдз косьмис, коскас быттьӧ уль зорйӧн вартісны, юкалӧмӧн юкалӧ, а веськыд кийс дзик дубаліс, улӧ ни вылӧ... Пукалӧ Паш Вась думъясас нырччӧмӧн, тшай ни кӧдзыд ва ӧні сылы оз ков. Мудзис дзикӧдз да. А гортас, пачтӧ ломтылӧм бӧрын, шоныдсьыс-шоныд, синмыд быдсӧн куньсьӧ. Вугрӧдлӧ пӧрысь морттӧ лабич вылад... Сутшкысьлӧ здук кежлӧ Паш Вась, шкоркнитлӧ гоз-мӧдысь, арлыдыд личкӧ тай, но чӧскыд унмыдлы оз сетчы. Чеччис да сӧян-юан тыра ноптӧ первой ректіс: мыйкӧ чуланӧ петкӧдіс, мӧдтор посводзӧ колис, коймӧдӧс пыді вежӧсас дзевис-дзумгис. Та бӧрын вӧлисти юрас дӧвгис — талун ӧд тӧвся Микӧла лун. Мый нӧ сійӧ ассьыс медбур ӧртсӧ оз казтышт, чолӧмав чужан луннас? Уляшев Николай Александровичӧс. Пронт вылӧ ветлысь жӧ, сыысь куим арӧсӧн ыджыджык. Кузь нэмсӧ лӧсялісны найӧ ӧта-мӧдыскӧд. Ӗльӧ Миколуна во орчча вӧрпунктын уджаліс, овмӧслӧн гаражын кӧрта кӧлуйӧн ноксис, дзоньталіс найӧс да мый да. Лолыс сылӧн морӧстырнас ыпъяліс техника дорад... Ӗні мортыд индомын олӧ, на районса Зимстан посёлокын. Гӧтырыс Миколайлӧн кувсьыліс во кызь сайын, ӧтка пиыс дзикӧдз юсис... Ӗти тӧвся рытӧ кымӧма вӧлі гажа юрнас вӧр посёлоксянь неылын. Бур мортыдлӧн, кыз шуласны, кага ни баля эз ло. Дырӧн-надзӧн и кокыс юкавны мӧдіс. Быть лои коркӧя удал зонлы индомад вӧрзыны-кайны...

Здук лолыштӧм мысти Паш Вась пырис пыді вежӧсас да кутчысис телепонӧ. Гурскис-бергӧдліс гӧгыльнас тӧдса лыдпасьяссӧ, виччысис, кор мӧдар помас вочавидзасны. Телепоныс вель дыр зынгис, некод, тыдалӧ, эз вӧв да, сэсса кодкӧ шыасис жӧ.

— Аллӧ, аллӧ! Мый нӧ сәні звӧнитчанныд та дырасӧ? Коді нӧ колӧ?— дыр мысти дыдгыны-броткыны кутісны индомсянь.— Ӗтиӧс да мӧдӧс быд лун юасянный...

— Меным эськӧ Уляшев ӧрткӧд сёрнитыштны, Николай Александрович, дас витӧд жырийн олӧ. Чукӧстлӧй, Ен могысь, сійӧс телепон дорас,— кыз позьӧ небыджыка корис индомса уджалысьӧс Паш Вась. Мудзӧма ачыс вӧлі, но эз мӧд воча шуасьны. Тӧдіс, мый броткӧдчыны кӧ ӧна кутан, шляпкасны телепонсӧ да та вылын став сёрниыс и помасяс.

— Уляшевтӧ миян кык лун сайын дзевисны, сарство ему небесное. Съӧлӧмыс войнас сувтӧма, весиг уколавнысӧ прамӧя

эз удитны,— шемöсмöдiс Паш Васьöс нывбаба гөлöс, тыдалö, индомса уджалысьлөн.— Асьным и чукöртiм-кольöдiм бöръя туяс, коньöрöйöс. Рöдвуж пöвстсьыс нырсö некод эз мыччыв...

— Сё пасибö кöть висьталöмсьыд,— горшас тасасисны шуöм кывъясыс Паш Васьлы. Сэсся нинöм вочавидзны эз сяммы. И мый нö верман шуны, кор сэтшöм виччысьтöг помасис медся бур ёртыслөн оломыс. Көнкö бокын, ас чужан сиктсьыс ылын...

— Кытчö нö дзебисны Уляшевсö?— юавсис жö сёрни помас Паш Васьлөн.

— Татчö, посёлوكса шойна вылö. Воланныд кö, петкöдлам. Кöлуйсö, мый мортыслөн коли, пыралöй да босьтöй-лэччöдöй. Шкап тырыс чукöрмöма-куйлö...

Вочасö Паш Вась ымöстiс сöмын. Нинöм шунысö водзö эз сяммы. Быттö пес плакаөн юрас вартiсны да. Сё лешак тай, пöрыся олом-вылом! Водан ловйөн, садьман — кын... Найö öд, мый кöть эн висьтав, кымын во ёртасисны. Паш Вась да Миколой. Öта-мöдкöд воысисны, пыдди пуктiсны ёрта-ёртсö, тшöкыда телепон пыр сёрнитiсны. А со тай кызди ставыс помасис. Дзик виччысьтöг, здук-мöдөн...

Телепонсö пуктöм бöрын Паш Вась вель дыр шогалис-ышлолалис ас кежсьыс, некызди эз эскыссьы, мый сылөн Уляшев ёртыс таладор югыдсö зновтöма. Вежон кык сайын на öд Паш Вась звöнитлис Миколойлы. Бура дыр баргисны кык ёрт телепон пыр, медсясö асланыс öтка олом-вылом йылысь. Миколой ошйысяна висьталiс сэки: гожöмнас пö чужан сиктö лэчча, шоныд да мича лунъяссö ас керкаын кута колявны. Сэки пö и аддзысьлам, стопка-мöд пöрöдам. А тöv кежлö пö бара индомас муна. Сэни öд пöрысь йöзтö вердöны-юкталöны, дöзьöритöны посни челядьöс моз. Мый нöшта колö олом мортыдлы? Со тай, коньöрöй, и волис чужанинад, Паш Вась дорö кежалiс и... Бокöвöй шойна ылын нэмсö лöö куйлыны. Ас сиктсянныд ылын-ылын...

Луныс рытлань босьтчис катовтчыны, ывла ылын рöмыд лойи, а Паш Вась быттö сибдiс пыдi вежöсас, гöгрöс пызан сайö. Шняпвидзис-пукалис телепон дорын юрсö öшöдöмөн да весиг прамöя пöрччысьны эз слöймы. Тшай юны ни, сёйыштны ни... Став дойыс горшас тасасис. Син водзас пыр Миколой ёртыс сулалiс, кодi тшын-пороктö сыысь ёна унджык апыштлöма. Кык орден паськыд морöссö мичмöдiсны, нöшта «За отвагу» медаль. Но вежавидзысь Уляшев гежöда пасьтавлiс орден-медаляса ас вурöм пинжактö, вонас öтчид, буракö, Победа лунö сöмын. И сэк на челядь моз яндысис наысь, быттö абу вирсö кисьтлöма ылi муясын. Войналөн медся сьöкыд вояс пыр вуджöма мортыд, а кызкö-мыйкö ловйөн кольöма. Кык пöрйö туплясьлöма госпитальясын, сьöкыда дойдавлöмаöсь ки-коксö вöрöглөн көрт торъясыд да. Пушкаысь лыйсьöма старшина Уляшев, немечьяслысь креста танкъяссö гындылöма война чöжыс. Парсасьлöмаöсь яра, öта-мöдсö вежлалiг: коркö адгорш вöрöгыд вермылас, коркö сийöс Миколой ёртъясыскöд топöдлас-кучкалас... Сэсся кучик сапöгаыд роч мортыдлысь вынтö исыштiс жö, вочасөн бöрынтьчис рытывыв... Берлин дорын и помалöма ассьыс бöръя тышсö Уляшев Миколой. А быдса во на кутöмаöсь киподтуя морттö ылi муад, мед том йöзöс туйдöдас: кызди стöча лыйсьыны, лючки-бура тöдны, кутшöм пушка-танк эм миян да паныд сулалысь

вөрөглөн. Вочасөн и велөдчөмаось ыджыд война пыр мунысьяс-лысь төрытъя ва челядь, мам бөждорысь нетшыштөм том войтыр. Найо, кодъяслы война помас сөмын на дас көкъямыс арös тырöма...

Миколай дырөн-регыдөн гортас бергөдчас, Германиясянь нин Эжва йылö воöма. Чужан сиктас. Первойсö колкозын уджыштöма, бригадиралöма некымын во, а кор орчча ягын вөрпункт воссьöма да кутöма паськавны, Уляшев сэтчö вöйысьöма. Зиль да авъя морттö, пронт вылö ветлөм зонтö, зэв на окотапырысь лесопунктад босьтöмаось. Кык жыръя патера некымын во мысти весиг вичмöма. Аслыс, гөрд юра Роза гöтырыслы да Володя ни-ма пиыслы. Миколайлөн пöлыс зiля увйысис вөр пөрöдчысьяскöд орччөн, коскöдзыс лым пиын келалис. Быть тай уджав, төв көть гожöм, зэрö көть шондi пöжö... Та вöсна, гашкö и, водз таладор югыдсö эновтöма. Буретш ветымын арös аныддысь пасйöмаось. Миколай сэки ок ёна и шогалис, муртса кок йывсьыс эз усь, сэтшöма песлöдлис морттö. Юсьылис весиг, коньөрöй. Но ас саяс коркö воис жö, пиыскöд водзö кутисны овны-вывны. А мöдыд мамыс кувсьöм бöрын туйвизьсö дзикöдз воштiс, лёкысь юис-кодалис удж вывсьыс весиг вöтлисны, сиктса сельпоысь. Во мысти, öти төлö, и кымöма вöли посёлокö мунигөн. Гажа юрнас. Усьöма туй бокас да лымйөн пуркөшитöма том морттö. Лун мысти сöмын кодкö казялöма, ки пöлыс вөлөм чурвидзö тола пöвстсьыс да...

Керка пытшкын дзикöдз пемдыны кутис. И тайö мустөм пемы-дыс да пельтö чунöдысь чöv-лөнныс вочасөн чеччöдисны-кыпöдис-ны Паш Васьöс гөгрös пызан сайысь. Коркö мортыд пөрччысис жö, биасис да тшай пуктис шонтыны. Вомас нинөм эз пыр. Медым кызкö-мыйкö личöдыштны жугыльтчөм морös пытшсö, норзöм сьölöмсö, судзöдiс дзебасысь ва кушманөн сулöдөм джынъя водка доз да кисьтыштiс курыдторсö стöкан пыдöсö, кык чунь судта кымын и чолькнитiс. Сувтöдлис син водзас ёртыслысь нюмъялысь чужöмсö, быттö шуис: тэнö пö казтыла, тэ понда шогала, да öтчыдйөн гулькнитiс-юис ас вöчөм сорассö. Миколай Уляшев понда, кодi уна во чöж вöли Паш Васьлы медся бур ёртөн. Вöли и колис... Позис на, дерт, во-мöдтö олыштны Миколайыслы вольнöй светас. Позис... Но кысь нö тöдан, кор мортыдлөн лолыс петас. Енмыд кык нэмтö овны некодлы на абу сетлöма...

Горшсö сотыштысь курыд сорасыд вочасөн мöдiс шонтыны Паш Васьлысь морös пытшсö, визъялис вир-яйöдыс, вывлань кайлис и кок улöдыс лэччылис. Уна-ö нö колö пöрысь мортыдлы... Чуньлыс мында гырк пытшкас воис, а быд сөн небзис Паш Васьлөн. Быттö лунтыр пукалис пачводзса пызан сайын да чурс-кис курыд зелля. «Тадзитö оз позь овнытö, Василей-мокилей. Гажа юрнад став овмöсыд киссяс-вальдас»,— асьсö думнас дивитыштiс Паш Вась, но тшай кисьтiс да ютöдыс нöшта öтчыдысь казтыштiс на войनावывса ёртсö сулöдөм курыдторнас. Та бöрын öвсис, пыртiс доз помсö аслас дзебасö, пыдi вежöсас. Мöдысьтö чорыд сорассö гулькнитöмыс и ловзьöдiс вежöрас Миколайкöд парма-ягын пес пөрöдөм. Öти тувсов лунö, лым сылөм бöрын, Паш Вась водзвыв кежалiс ёрт дорас, корис: пес пөрöдны пö вай отсышт, тэнад «Дружба» пила и быдтор эм. А лучковканад ми гöтыркöд дзик атшалам. Кык-куим пу лунтырөн сяммам пö-

рөдны да чинтавны. Бура важөн, во комын сайын кымын тайё вөлі... Шань да небыд сьолёма Миколай пыксыны, дерт, сэки эз кут, юалис сөмын:

— Кор нө кайлам?

— Верман кө, вай тайё вежон помас, шойччан лунё,— воча-видзис сэки Паш Вась.— Кыкөн и мөдөдчылам, Кузь ёль бокё. Бабаяссё ог нин көвъялөй. Мед горт олоны. Сёрнитчим али эгё, Миколай?

— Сёрнитчим, дерт. Ме дорё лок дай, вөскресенньё. Асыв-нас, час сизимын. Нопъясям да тасянь и мунам мир туй кузя,— төлкөн-ладөн шлапөдіс воча кывъяссё ыджыдджык ёртыс. А Паш Васьлы нимкодъ, быттьё вежа ваён резыштисны морёс пытшсё. Төвбыд кежлө лунтырнад позьё пестё заптыны «Дружба» пила отсөгөн, дзижгё-уджалё мед сөмын-а, тшөкъявтөг-чеп-сасьтөг. Ломтас да лэчюд чепъяс ковмасны куш. А тайётортё кык верстьё мортыд кызкё-мыйкё пөрөдчанінөдзыд катодасны жё. Сёян-юан на ковмас водзвыв лөсьөдны и. Тшай пузьөдлыны вөрас, гырк пытшкөснысё шонтыштны. А кор бөрсё воөдчасны сиктөдз, Паш Васьясё кежасны медводз. Тані нин Миколайёс пөттөдзыс гөститөдасны. Паш Васьлөн гөтырыс, Валентина, абу сэтшөм-татшөм ань, сяммас бара-й на локтігкежлө чөскыда пусыны-пөжасны. Еджыд юра дозтё пызан вылад лэптас и. Татшөм ыджыд да сьөкыд уджтё бергөдөм бөрын и мудзтё вешты-лоны сьолөмсяныд.

Вөрө каян лунас Паш Вась водз чеччис. Вит час муртса вөлі, тулыснад лун югыд. Пось тшай ырскыштіс да петалис посводзчуланё, рытсаяныс лөсьөдлөм көлуй пыртіс. Тэрмасьтөг пасьтасис, тшөктіс гөтырыслы игнасны да воськовтіс кильчө вылө. Черсё ыджыд нопъяс сьуйис-дзумгис, нянь сэні куйліс тшөтш да кык чунь кызта порсь тшөг. Көдзыд ва сулеяын. Нөшта пуөм картофель, некымын лук, сьөд пөрт, сэссия и нинөм ёнасё. Пөрөдчыны-уджавны мөдөдчисны, эз ватшкыны-сёйны... Уляшевъяс ордын дырсё эз жё мөжгыны. Пиласё Миколай пельпом вылас өшөдіс, а ломтас тыра көрт дозмуксё, вель сьөкыдөс, Паш Васьлы мыччис: тайёс пө тэныд, дитяёй, лоө кыскыны-катөдны. Мөдыдлы быть кывзысь, ачыс медаліс-корис пөрөдчынытө да.

— Мөдім, инё,— юрнас довкнитіс Паш Васьянь Миколай.

— Мунам вай,— дөра нопсё шыбитіс мыш саяс томджык ёртыс.

И ас сиктасаяс, война көрсё исыштілөм кык пөрнөй морт, мөдөдчисны васөд лыаа мир туй кузя Кузь ёльлань. Сэтчөдз, төдысь йөзлөн шуөм серти, артавсиз квайт верст. Асывсаяныд восьлалісны збоя, кокныс печласис. Ётиыс мыйкё зэв гажаа висьталё, а мөдыс өттор-мөдтор шмоньлива содтас дай... А луныс мича пуксыны лөсьөдчө, кымөрттор абу ни. Югыдсьыс-югыд гөгөр. Парма-ягыс кузь төв бөрад вочасөн садьмө дыр унзіялөмысь. Видзөдоны да, баргиг-варгигад джын туйсё мунсьөма нин. Но и мудзыс сюри ёртыаслы, пөрөдчанінө вотөдзыс лои кык пөръя лолыштны, ки-коксё шойччөдыштны. Сэссия коркө-некоркө кежисны жё мир туй вывсаянь Кузь ёльлань. Пырыштисны чукльөдлысь-мукльөдлысь ордым кузя пыдөджык, пожөма-козья

вөрлань, да сувтісны. Уляшев ёртыс бура дыр гоньяліс отаро-модаро, бөрйысис, тыдало.

— Тані вай и пөрөдчам. Водзосө сэсся огө мунй. Быдпөлөс пуыс со эм. Пес вылад зэв на лөсялас,— лэдзис сьокыд пиласө Миколай сук нитш пөвстө.— Здук лолыштам да позьо и уджө кутчысьны. Час, ме бензинсө пила гыркас кисьтышта, чепсө пукта-зэлөда. А тэ, Павлович, сэк кості чертө босьт да вожа йыла кузь зор керышт, пилитан пуяссө кутан ме бөрся йоткавны, пөрөдчигас отсасьны.

— Лоо вөчөма ставсө лючки-бура, төварыш камандир,— се-рамсорөн горөдіс пила дорын ноксьысьлы Паш Вась. Та бөрын перйис нопсьыс ассьыс лэчыд черсө да лайкъялысь нитш кузя веськөдчис сы гөгөр сулалысь пуяслань. Но кык-куим воськов и слөймис вөчны Паш Вась...

— Сө мать тай, мыйысь нө ме Ен водзас мыжми?— виччысь-төг чашөбтіс-горөдіс, торкис асья чөв-лөньсө мыш саяс ноксьысь Миколай.— Кодлы нө ме та ыжда лөксө вөчи? Кодлысь муссө зыр-та-а?

— Мый нө сэнi лои?— уськөдчис ёрт дорас повзьөм чужөма Паш Вась. Аслас ки-кокыс тіралө, кывйыс воши. Здук сайын на сійө быттө шмонитіс-сераліс, а өні сьолөмыс муртса эз пот.

— Дзик йөй ме, Вася-Василей, вежөрөс кодкө гуөма,— кинас өвтчиг швачкысис-пуксис нитшка мыр вылө Уляшев.— Пилитчан чепгьястө гортө кольсьөма. Видзөда да, нопйын ни өти абу. А быдса витөс водзвыв төчитлі-дасьтылі, посводзын көрт тув йы-лын өшалөны...

— Мый нө кутам вөчны, Миколай?— песовтчыліс чужөмыс нор-шогысла Паш Васьлөн. Со кыдзи артмис налөн пес пөрөдө-мыд, бөрд көть серав.— Бөр лэччыны ковмас... Гортө, мися. Вежон мысти вылысь волам дай...

Мөдыд сувтса синмөн видзөдліс ёртыслань, нинөм абусө пө мый сэн сөран, да тэрыба чеччис нитшсялөм мыр вылысь.

— Ме кө мыжми, ачим и вешта ассьым мыжөс. Час, час, котөрөн лэччыла чепгьясыдла... А тэ, Павлович, весь эн пукав, босьт чертө киад, лөсыштав-пасъяв пөрөдана пуяссө. Бөрсө воа да мед луньюгыдөн слөймим жө мыйкө да мыйкө вөчны...

— Сюра лешак тай!— вөр тырнас сьоласис Паш Вась ёртыс-лөн мунөм мысти. Мортыд пузис жө дзикөдз татшөм дивө бө-рад.— Дявөлыс бара-й али коді көвъясис миян дорө, джөмөд бөрся джөмөд тэчө, уджавны оз сет... Но ёртыслысь скөрысь броткөм-мурзөмсө Миколай пель йывнас сөмын кылыштис, сійө мый вермис шавксөдіс чужан сиктлань, и кымын водзө, сымын содтіс воськовсө. Гөгөрвоис мортыдлөн вежөрыс: отарө-модарө Миколайлы ковмас дас кык верст мыськовтны. Быдса дас кык верст! Аслыс асьсө песны-пыдзравны. И кыдзи сійө сюрис та-йө дзуггяс? Юрыс быттө абу ичөт, а сы пытшкө, тыдалө, пи-липызь сюялөмаөсь. Татшөм ёнасө Миколай некор на эз сконъясь-лы. Некор! Пөрысьмыны, гашкө, мөдіс, гашкө, дявөлыс вежөр-сө гортсьыс петігөн гуліс. Но мый лоөма, лоөма нин... А пөрөдчы-ныгтө, кайисны парма-ягас да, быть ковмас. Тадзи кымын мөвпа-ліг Уляшев Миколай котөрөн-сорөн шалссьөдіс Эжва бокын сулалысь сикт-посёлоклань, кыдзи вермис, сідзикөн и вештіс ёрт водзас артмөм мыжсө.

...Коркө лун шөр гөгөрын Миколай воис бөрсө, ныр вылас усьтөдз мудзөма, морөс тырнас упкө-кашкө. Но витнан чепсө киас кутө, дөраторйөн гартыштөма. Аслыс нимкодь, сьөлөмыс бурмөма да. Овтыштіс кигугнас чепөсийөм пөсьсө плеш вывсьыс да тэрыба зэвтис вайөм чептө пилаас.

— Вай пөрөдчам нин, луныс, сө мокасьт, тадзитө миян ко-льö,— гораа эркнитіс аслас «Дружбаөн» Миколай, лэптыштіс на сьөкыд пиласө, быгтьö абу и вуджөма отарө-мөдарө кузь вөлөк.

— Ме бара-й всегда готов,— нюмтөвтіс воча Паш Вась да вөтчис мудзлытөм Миколай бөрся лөсышталөм пуяслань. Квайт час рытөдз сэсся кык өрт пөрөдчисны-чинтасисны, а чуркаяссө тэчны вынныс эз нин тырмы.

— Талун кешлө шань, Миколай,— кыз пу улө шлапкысис жуялөм Паш Вась.— Тэчнысө гөтыркөд коркө мөдысь волам.

— Ме дзикөдз жө мудзи,— сөмын и сяммис пычкыны ас пытшсьыс Уляшев да орччөн пуксис-шлопкысис, морттө быгтьö пыдзыртөмаөсь, дзикөдз атшалөма. Довкнитіс пашкыр юрнас пөрөдөм-чинталөм пуяслань:— Тайө пескыс тияны бур төв кешлө тырмас...

— Сө пасибө дорйөмсьыд,— аттөалана тапнитіс сы пельпомө кушенчаа кинас Паш Вась.

— Нинөмысь, друг мортй, нинөмысь.

— Кыдзи нө нинөмысь, лешак машина! Кузь лунтыр пөсь петмөныд мырсин-зілин да. Кыкысь лои та кузя вөлөк вуджны и...

Мөдыд воча нинөм эз шу, кыз пу бердө ляскысьөма да чөв оло, шойчөдө мудзөм ки-коксө. Паш Вась здук-мөд кешлө лань-тіс жө, мед лөньөдыштны морөс кудьяс гыпкысь-пессьысь сьөлөмсө.

Воисны гортаныс, рөмдө нин вөлі. Сөйөм-юөмыс пес заптысь-яслөн вой шөр бөрөдз нюжаліс да, Миколай Паш Васьяс ордын и узис. А вунөдлөм чепгьяс йывсьыд Уляшев эз радейт казтывны, но а пансьывліс кө сөрни, ачыс асьсө век мыжаліс: дас кык верст пө содтөд лои йөйыдлы шлапиктивны, пыдөстөм пельсаө ва катлөм кодь артмис... Но Паш Вась пыр и асланыс шу-ас-бертыштас:— Мыйла нө пожйөн ва койөм? Чептөгыд нө кызди эськө и пөрөдчим, Миколай. Эн, сідзкө, весьшөрө гортөдзыд лэчыв, кузь вөлөксө отарө-мөдарө вудж...

Вошйөдөма лои тай Миколай өртсө, вой кешлө эськө да, но мед, сійө ёнасө оз дөзмы,— став сьөлөмсянныс казтыштіс шань морттө Паш Вась. Пес пөрөдны коркөя кайлөмтө весиг юр ве-жөрсьыс перйыліс. А кымын во сэксянь шлывгис-муніс, кымын вежсьөм лои сиктас да тані олысьяслөн олом-вылөмын... Мый көть вөч, а кадтө тай некызди он сувтөд, рөдтө-котөртө сійө водзө. Вольпасын куйлігөн нин Паш Вась шога ышловкерис: вочасөн то өти, то мөд пронтөвик кольö вольной сьветсө. Миколай Уляшевыд со виччысьтөг кувсьөма пөрысьяслөн керкаын, сыөдз Трош Педөрөс дзевисны, Сидөр Петырөс Илля лун водзын кольөдісны... Паш Вась артыштіс, да быдсөн пөсьөдліс морттө: Миколайлөн мөдарьяугыдө мунөм бөрын сійө, артмө, война вылө ветлысьяс пөвстысь нач өтнас колис. Ловъяыс. Та ыджда сик-тын... Медся томыс, кызь квайтөд воын чужсьылөмаыс. Сэсся став пронтөвикыс, кодьяслы шуд усьлі гортаныс ловйөн воны,

орчча пожома ягын, кыз му улын куйлоны. А дзик на неважон мыйтаонось волины. Победа лунад сиктссовет дорё чукортчасны, да куим-ө-нель радон снимайтчынытё сувтасны, орден-медальыс моросаныс быдонлон югьяломон югьяло, зия-зелякыло. Вашгьялоны-нюмгьялоны торытгья салдатгьяс, тодчодоны, мый ассыныс пай пуктисны Ыджыд Вермомо, ловгья юрон войналон ад гуранссыс мойвиис петны, гортаныс, Эжва йыло, бергодчыны. Налы шуд уси ловйон кольны, а кымынон сиктсаяс повстысь борсо эз воны, куйлоны чужан мусыс ылын-ылын, боковой муясын...

Паш Вась, вольпасын бергаліг, отчид дай модысь гартіс юрас шорйивсаяслысь ним-овгьяссө, кодыас война пыр мунлісны, да вежортіс: сорсыны некыдзи эз вермы. Сё збыль тай, отнас сійө кольома сиктын пронт кутысьяс повстысь. Состом сыноднас лолалысьыс. Кывтыдсянь сикт модар помодзыс лыддьодліс, да некод сэсся ловгьяыс эз сюр. Кадыд тай дырөн-кузяон, гусьоникон, ассыс босытис, восьлаліс-муніс дай воодіс татшом диводдыд... Кольом нэмлон кызь квайтод воын чужомаяссө, Паш Вась коддьомгьяссө, сэки и збыль боргьяпом босытисны-нуалісны вөрөглы паныд, но наысь томджык ныв-зон эз нин веськавны войналон изки улө. Öні Паш Васьлы, сідз кө нин шуны, сиктс став пронтөвик вöснаыс лоö кызкө-мыйкө дзуртны, налысь отувгья нопсө кыскыны да синва-шогсө пыкны...

Кор унмыс личкис Паш Васьос, сійө эз и тодлы. Ветки пыжын моз тай кутіс унзіля морттө вольпасяс отарө-модарө лайкйодлыны-а, та бöрын төвся сьод войыс виччысьтөг кутыштліс шебрас улын куйлысьос да небыдика босытис аслас мездорө. Кузь вой бöрын чужысь лунөдз, асгья югыдөдз...

Аскинас Паш Вась и збыль сөрөн садьмис. Лэптіс юрсө, а төвся пемыдыс вочасон вешійө нин гыортөм öшинь сайын, тэрмасытөг саймовтчө-ылыстчө еджыд лым повстын унзіялысь сикт весьтысь. Но пöрысь морт бара на эз чепөсйы көрт пач дорө, здук-мөд куйлыштис-вегьясьыштис шоныд вольпасын, да тодлытөг казтыштчис торытгьяыс. И быттьө ныж пуртөн парсыштисны морос пытшкөссө. Оралөмон ораліс сьолөмыс Николай Уляшев вöсна. Со өд кызди бур мортыддөн олөм-вылөмыс бергодчис. Боргья кык-куим восө лои индомын дзуртны-ышлоавны, сэнi и ловтө лэдзны, чужан сиктсгьяд, ас керкасыд да пи-готырсыд бокрын куйлыны... Кысь нö мортыд вермас водзвыв артыштны, мый сыкөд аски либө аскомысь лоö. Енмысь отдор, тыдалө, та-йос некод оз тод...

...Важ волон боргья субөта лун сэки вöлі, да Паш Вась босытчис пывсян ломтыны. Югдіс кор дзикөдз, ыджыд пачсө ваймөдөм бöрын муртса тшай слөймис ырскыштны, и петіс ывла вылө. Көдзыдыс эськө чепляломон чепляліс чужөмбансө, гын сапöга кок улас лымйыс азыма дзуртіс, но Паш Васьос тайö эз сувтод. И пашляк лыйсигон на сійө пывсянтө ломтывліс, корөсьон асьсө швуч-швач вöчліс, сьолөмсө тадзикон бурмөдліс. А талун ывла вылас абу на вывтi и көдзыд, муртса бандзибтө дзижыштө. Көть больөдчыштас-пожйыштчас пöсь ванас, юрсө мыскалас да. Сэсся позьö и корөсьсө көтөдлыны, киськасьтөдзыс да көджас петтөдз ки-коксө швачөдыштны... Дырсө да ён жарас сі-йö вель важон нин эз корөсясьлы. Видзис боргья воясас асьсө: отнадтө олігон арлыда мортыдкөд быдтор вермас лоны. Коркө

тай кольмыліс, да өдва гортөдзыс воис-а. Водз ли, мый ли пөдлав-
лома пывсянсө, лешакыс төдө. Юрсө кузь рытывбыд поткөдіс,
восөдіс весигтө. Та бөрын Паш Вась эз кут ышмыны өдъя пыв-
сяннад да жар корөсьнад, абу өд сылы дас квайт арөс. Лысьөмсө
небзьөдас пось ванас, корөсьөн муртса швуч-швачкерас, да
петас өдйөджык көджас ыркөдчыны. Мөдысь-коймөдысьтө во-
дзын моз, шыөн да мурзигтыр, оз бара-й уськөдчыв-пырав корө-
сясьнытө. Оні пыр и шуас аслыс: шань пө, лолыштөм бөрын
улыс көлуйсө песлиштас, тэрмасьтөг пасьтасяс, ньөжйөник та-
пиктас-веськөдчас гортланыс...

Тадзи мөвпаліс-думайтіс өтка олом йылысь Паш Вась, пу
зырйөн усьөм лымсө пывсян туй вылысь вешталіг. Войбыднад
сійө бара прамөя сапкөма. Вель кузя лои весасьны. Кор пывсян
дорөдзыс воис, Вась сувтовкерис, мед ловсө личөдыштны, юка-
лысь коссө шойчөдны-лөньөдны. Мыджсис пу зыр вылас, пыді-
сянь упкө-лолалө, а син бөжнас кыйкнитлө-видзөддывлө гөр-
быльтчөм пывсян вылас. И топавлө сьөлөмыс мортыдлөн. Пывся-
ныс, дерт, ёна томджык Паш Васьысь, но пөрысьмөма жө та
дыранад, пырөма-латшмунөма муас. Лымйыс тонө, сө морө, дзо-
ляник өшиньөдзыс кайөма-кавшасьөма, вевт вылас пуркөшитө-
ма-чукөрмөма...

Тайө Паш Васьлөн сяма кинас тшуплөм-кыпөдлөм нельөд
пывсян, быдөнөс сійө ас ногыс малавліс-тотшкөдіс, быдөнлы
сетліс морөспытшса сьөлөм шоныдсө. Шуны кө нин сідзи, нэм
чөжыс Паш Вась мыйкө да мыйкө ноксис-вөчис. То өттор, то
мөдтор... Черөн да пилаөн, стружөн да гогынөн. Гөтрасьөм бөрас,
помнитсьө, Валя мам керкаыслысь мөдар вежөссө быдса төлысь
чукля воропа черөн кераліс-лөсаліс, а бөрынджык сиктлөн Эж-
ва кыр йылас, пристаць дорын, выль оланін Паш Вась лэптыліс.
Мичаөс, кыпыдөс, паськыд өшиньясыс ю вылас лун и вой дзор-
гисны-видзөдісны. Сөмын тай вуджөмыс сэтчө дзик виччысьтөг
ори: Валя гөтырыс кинас и кокнас пыксьыны кутіс — ачyd пө
лэптін, ачyd, көсьян кө, и ов сэні. А ми пристаць дорад челядь-
көд огө вуджөй. Кыдзкө-мыйкө төрөдчам мам-батьлөн важ кер-
каас... Топыд вома Валентинаыс коркө и висьтасис верөсыслы:
сиктлөн важ шойна вылө пө лэптөмыд керкатө, та понда шудыд
тані миянлы оз ло. Виль гөбөчас пыралөма му кодйыштны, да
виччысьтөг зыр улас... морт лы веськалөма. Муртса садьсө гөты-
рыс абу воштөма, сэтшөма повзьөма да. Дзик өткөн выль керка-
ас вөлөма сэки. Верөсыс удж вылын, челядьыс велөдчөны...
Кыдзкө-мыйкө, турки-тарки, шөйөвошөм нывбаба петөма жө
гөбөчсьыд. Сьөлөмыс гыпкөмөн гыпкө, вом дорыс едждөдөма,
асьсө өтарө-мөдарө шатлөдлө... Та бөрын кыр йылын сулалысь
выль оланінлань гөтырыс сэсся некор абу кежалөма. Кысь нин
пыравны. Төлысь-мөд кольөм мысти ас кинас шыльөдөм-мольө-
дөм шняч выль керкасө Паш Вась босьтөма да виччысьтөг ву-
залөма. Сиктсаяс шензьөмаөсь: Ульныровыс пө тайө дзикөдз
йөймөма али мый. Матө кык во ноксис выль керка гөгөрыс, а
өні босьтөма да вузалө. Паш Вась збыль помкасө дзевис, эз
висьтав некоды, мыжсө вештіс гөтыр вылас: мам-бать керкасө
пө жаль эновтнысө Валялы, мир туйкөд орччөн сулалө, а выльыс
бокын, бур йөзсьыс ылын тутвидзө. Тулыс-ар резина сапөгтөг
он бара-й пет ывлаад. Төвнас гөгөр нөбалөма, лымйыс голяөдзыд

ю бокас. Ва труба некөн абу и, тшай вала лоё Эжва вылөдзис лэччывны, а пристань кырийс ок кузь да джуджыд...

Выль керкатё ньобысьыд сиктад өдийё сюрёма: кык жыръя югыд позъяс овмөдчөмаось сельпоын уджалысь том гозъя, вештысьом бөрас аскинас и пырөмаось дась оланінад. Бөрынджык керкаыскөд орччөн кыпөдөмаось ляпкыдик вевта пывсян, мөс-куканьлы ыджыдкодь гид, турун видзанін, йөрсө гөгөртөмаось мича потшөсөн...

Казытыштіс коркөясө Паш Вась да өвтыштіс кинас: мый вөвлөма пө, сійө кольөма... И асьсө тайө выль керкаас, кодөс кыпөдліс сикт помын, мыйлакө эз ёна и кыскы. Бокын сулаліс да, гашкө, та понда... А кор гөтырыс висьталіс морт лы йывсьыд, Паш Вась дзикөдз көдзаліс керка дорас. Майбыр, эм на налөн юр сюяніныс да. Дзик мир туй бокын сулалө, кык жыръя. Төрасны на ставныс, и челядь, и Васьлөн мамыс...

Та вылын и орөдіс асьыс казытымъяссө выль керка йывсьыс Паш Вась да сатшөбтіс лым толаө пу зырсө. Гурснитіс ыджыд көрт каличөн, кыкнан кинас гурйив восьтіс пывсян өдзөссө. Зым-зумкерис лымсьыс гын сапөгсө, юрсө копыртөмөн, видзчысяна воськовтіс пытшкас. Көджыс вөлі кузьмөс, кыз пөвъясысь тотшкөдөма-вөчөма да ас ногөн йитіс кык пывсян: важсө, веськыдвылас, да выльджыксө, шуйгаладорас. Важас Паш Вась видзис посниа поткөдлөм пывсян пес. Медсясө кыз да пипу тэчліс-чукөртліс сэтчө быд төв и гожөм. Пожөм да коз кө паныдасьліс, наысь эз жө пыксьыв Паш Вась. Төдіс ачыс: ичөтик пензия вылад быд чаг дона. Лавкаад тай кайлан да сюрс шайт вылад ноп тыр сёян-юантө он лэччөд гортад, быттё мөс кывнас малснитас-нюлыштас сьөмтө, сэтшөм өдийө сійө бырө, а помасяс, да лоө выль пензияөдз виныгьртны...

Кос пескысла и кежис важ пывсянас Паш Вась. Бара на лои бергавны-пешкылясьны сылы ляпкыдик жыръяс. Жаль петмөныс вөйөма-лажмалөма коркөя мыськысь-пывсьөдысьыс му веркөсас да. Во кызтө больөдчисны-швачөдчисны тані Паш Васьяс. Первойсө сьөд пывсян вөчлісны-лөсьөдлісны, гырысь да посни изъясысь тэчөм гор веськыд пельөсас өні на сулалө. Койыштан сы вылө көш тыр ватө, да жарыскөд тшөтш саыс вывлань чепөсьяс. И пывсян керъясыс гор гөгөрыс шом сьөдөсь... Но сьөлөмыд татшөм горйыслөн аслыспөлөс жарсьыс прамөя жө бурмыліс, лыөдзыд сійө быттё пырөдчыліс, вир-яйтө пөттөдзыд бурмөдліс, көть и кольліс саыс гөрдөдөм кучик вылад асьыс пасъяс... Кор дзикөдз мөдіс важмыны сьөд пывсяныс, Паш Вась кыпөдіс ськөд орччөн выльөс да йитіс кыкнансө кыз пөвъясысь вөчөм-тотшкөдөм көджөн. Отувъя өдзөс лөсьөдіс. А гор пыддиыс совхозса гаражын сылы Трөш Ёгор, татчөс уджалысь да көрта көлуйөн киподтуя вөдитчысь, ломтас видзан бөчкаысь пывсян пач мастеритіс. Кодкө юра морт жө татшөм пачсө думыштлөма. Улі көрт өдзөссө восьтан да пес сэтчө тэчан, би чуткан — пывсянсө ломтан. Муртса вылынджык мөд өдзөс, шоньд сетан изъяс сы сайын куйлөны-доналөны. Койыштан на вылө ватө да изъясыс здукөн ловзясны-чушнитасны, быттё шуасны пывсьысьяслы: босьтөй пө мыйта колө мянанысь аспытшса жарнымөс, швачөдчөй корөсьнад, мездөй став няйтсьыс ловнытө да вир-яйтө. Сяма Ёгорыд көрт бөчка бокас йитөма-лөсьөдөма и,

ва шонтём могысь, нель пельёса вель ыджыд дозмук. Ведра вит-ө-квайт сэтчө төрө. Съод горъястө сиктас сэсса вочасөн вежисны татшөмсяма көрт пачъяс, а йөз ас костаныс вель пөлөс пывсянъяссө мөдiсны нимтыны еджыд пывсянъясөн. На пытшкын и саыд эз ло, и корөсясьны-мыссьыны позис мыйта лолыдлы колө, лөдсав сөмын көрт пачсө, сылысь доналөм-ыпъялысь гырксө...

Паш Вась нускис-копрасис ляпкыдик, пемыд горъя пывсянас: кималасөн бөрийис арсяныыс посныдыдика поткөдлөм пес, тэчис шуйга ки вылас да морөс бердас топөдөмөн петкөдлiс көдж мөдарладорө, пукталiс көрт пач бокө. Төвнад ломтысис сiйө медсясө кызд пу пескөн, көть эськө и пипутө да пожөм-козтө кыдздыдкөд сорокост сюявлiс. Мед пө шоныдыс пывсянас дырджык кутчыяс, сэсса кызд пу пескыс этшаджык мунас и. Пөрыся нэмнад, пензия вылын олiгөн, быдтор лои артавны. Колiс Паш Васьлы не сөмын асьсө больөдны-мыссьөдны, а öти сайын песласьны на, улыс көлуйсө да мыйскөрө дась пөсь ваас пыдзыртны. То ки чышкөд, то дөрөм-майка, то юрлөс эжөд... Гач новлысь öтка мортыдлы сиктад сө нок вичмылiс. Тшөтш и нывбаба уджтө быть бергөд-вөч...

Сьөкыд артыштнытө, кымынысь Паш Вась ломтылiс та кузя каднад пывсянсө, кымынысь корөсясьлiс öтнасөн? Лешакыс төдө... Сөмын тай мышсө зырыштны пыр некодлы. Öлексей пиыс, волас кө, лун-мөд мысти бөр нин уйкнитны видзөдө, карлань синмыс öзъялө. Пывсянтө Паш Вась эськө и ломтылас локтiкежлас, корөсясьны пөттөдзныс батя-пия, öта-мөдныслысь и мышнысө ниртасны-зыраласны. Пырасны гортаныс да тыра пызан сайын кока румкатө лэптыласны и. Төдчө: гажныс бырөма кыкнанныслөн. Но Паш Васьлөн сьөлөмыс пиыслөн öтторъя бөрводз кежалөмсьыд некор эз бурмыв, мөдарө на, тшынасьыс сэрапомөн моз курзьөдiс синсө. Öнi бара на важ Виль во кежлас көсийисис воыны... Быттө водзджыксө оз позь, сө морө. Карсянъыд татчөдз сө ветымын верст и эм. Колiс, дерт, кызкө-мыйкө слөймөдчывны пөрысь бать дорад Öлексейыслы, гажөдыштны öтка морттө, мам-пөчсө казтыштны... «Экма да экма! Тьпу»,— скөрпырысь ружөктiс Паш Вась важ пывсян тырнас да бөръяысь петкөдiс куим-ө-нель кызд пу пес. Гузыгис-лэдзис ки вывсьыс найөс лабич бокө, мукөдсьыс торйөн, пывсянсө лөдсалөм вылө. И мед помавны пескөн ноксьөм-зунясьөмсө, пидзөсчанясьөмөн сюялiс поткөдлөм кер помъяссө көрт пачлөн паськыд гыркө. Тайө пөрийө пемыд пывсянсьыд сылөн ёнджыкасө кызд да коз пу пес пыртсьөма. Пач вомө сюялiгас тай найө ки улас медсясө веськавлiсны-а. Но вель пөв мошкоритчыны да бөрийысьны важ пывсянас Паш Вась эз пет: мый пыртөма, сiйөс и биыд апыштас. И сiдзи нин копрасьөмсьыс асьсө довкйөдлө. Мөдысь коркө, ывла вылас шондөдыштас да, поткөдлөм пипупожөм пессө ломтас-видзас, лымъя төлыд тай ок на кузь...

Пескыс сюявсис пачас, а Паш Вась пидзөсчань вывсьыс кыпөдчыны öдва-öдва вермис. Лои орччөн сулалысь джекйө мыджсьыны да тадзикөн веськөдчыны, лажгөдчывны недыр кежлө лабич помө, юкалысь коссө лөнбөдыштны. Дыртө куйлынынюжмасьны Паш Васьлы чеплясьысь көдзыдыс эз сет, содтөд на, пачө би чуткытөдз колiс орчча струбаысь ва пыртлыны.

Төвсә луныд чаль пом кодь дженъыд, он и төдды, рөмдыны-сьөдөдны енэжыс кутас. А Паш Вась пöрысьö-нэмö велаліс лунся югыдын пывсьыны. Мед и гортсьыс петігөн, и пывсянсьыс кайигөн төвсә пемыдыс эз топөд сылысь ловсö, сьöкыд изйөн личкы морöс вылас. Мед больöдчöм-корöсясьöм да пясасьöм бöрын позис вöляникысь лолыштны ыркыд көджас, мед биасьтөг на Паш Вась слöймис пачводзас самöвар пузьöдны, косьмөм горшсö пызан сайын веськөдны. Сук да гөрә тшайөн. Ок и лöсьыд сэки лов вылад. Сійö быттьö морöс пытшсьыд петас-лэбыштас да енэжас кыпөдчас. Кытчөкө вылө-вылө, ылө-ылө лэбзяс... И татшөм кадас Паш Вась овлө медся шудаөн, вунөдлө став лөксö да гажтөмсö. Ыштөкө шудыс мортыдлөн збыль помтөм-дортөм, а олөмыс джуджыд ю кодь. Пыдöсыс оз тыдав...

Баыс струбасьыд Паш Васьлөн бура өдйö и воис. Майбыр, юкмөссö дзик пывсян бокас коркө кодьылісны. Пыртліс-кисьталіс васö дозмукъясö, көдж лабич улысь судзөдіс кос сямöд чу-көр, торйөдіс медся гартчөмасö да дзажнитіс истөг тувйөн — чуткис пачас би. Сямöдыд трачкакыліг ыпнитіс, би азыма кватитчис кос песьясö. Паш Вась пөддаліс көрт пач өдзөссö, петіс көджас. Час кык-куим мысти и дась лоö пывсяныс, а таөдз ковмас на прамöя лөдсавлыны торйөдөм кыз пу песнас да лючки-бура ваймөдны пачсö. Мед юртö кольмөдысь сэтшөм-татшөм сэрапом эз коль...

Олөмыдлөн пыдöсыс оз тыдав...

...Ывла вылын вöлі мича югыд на, кор Паш Вась слöймөдчис-чукөртіс гортас вежсян көлуй да петіс пывсьыны. Көдзыд көджас пөрчысигмоз судзөдчыліс көрт тув йылын өшалысь пашкыр корöсьла. Пасьтөгыс нин суюыштіс сьöлөм бурмөдысьсö киня-улас, но пывсян пытшкас пырысьтөм-пыр эз воськовт, чөвтис пернапас да вöлисти восьтіс өддзөссö. Ок и жара ваймөдсьөма талун пывсянсö, көрт бөчкаыс доналөма-гөрдөдөма, весиг лои өдзөссö калькөдыштны, мед юр кольмөдана дукуыс вочасөн петіс. Кор ыркыд-көдзыд сынөдыс тырмана ылькнитіс пытшкас, Паш Вась көрт көшөн содталіс тазьясö пөсь да көдзыд ва, көтөдіс шаракуысь корöсьсö, өтчыд дай мөдысь мыскаліс майтөгөн дзор юрсö. Больөдчис-зырасис лун югыднас сьöлөм бурмытөдзыс. А корöсясьтөдз петаліс на көджас ыркөдчыны, пукалыштіс ас кьом джодждөраөн вевттьөм лабич вылын. Пырис бөр, да онялөмөн онялө пывсяныс. Быттьö корö-чуксалө Паш Васьöс: босьт пö водзвыв көтөдөм корöсьсö да швачөдчышт пөттөдзыд, во чөжөн чукөрмөм став няйт-лөксö өтчыдйөн пожъяв-весав...

И сэтшөм окота лои пöрысь мортыдлы ассъыс том кадсö казъыштны, вунөдліс төкөтьö Паш Вась, мый сылы абу кызь—кызь вит арös, а көкъямысдас матыстчö... Кыдз тай сизьдыштіс-койыштіс пач вомө, гөрдөдз доналөм изъяс вылас көш тыр ва, да чушнитөм-чепөсьöм кос жарсьыс косіник мортыдлы лои весиг пуксьывны-лажыньтчывыны джодж бердө. Быттьö сы танклөн пушкаысь лыйисны коркөя война кадас. Ичөтик пывсян пытш-кад, би да ва вочаасигөн, пельтö чунөдана шы дзенгис... Сэк кості көрт пач гыркысь чепөсьöм жарыс өдөбөн кытшовтіс пө-

рысь морт гөгөр, сотыштіс сылысь пель йывъяссö да кайис вывлань. Ок, öдъя и артмöма талун пывсяныс, сё морö. Кос жарыс горшад тасасьö, быд лы-сөнöдз йиджтысьö, чепялö вир-ййтö... Паш Вась кыпöдчис джодж бердысь да мед инö кадсö весь не воштыны, югёдөн на гортас кайны, швуч-швачкерис гөгөр небыдик корöсьнас. Дырөн-кузяөн öдзис пöрысь мортыд да быдлаті пывсьöдіс, гырысь чукуръяса чужöмсянныс кок шег-йöдзыс, мышсö на швачöдны судзöдчыліс, кос увсö да... Та бö-рын петаліс здук-мöд кежлö пывсян водзас ыркöдчыштны. Сэсся тай, сёлöмсö бурмöдöм ради ли, мый ли, а гашкö, дзикöдз ыш-мис да, выльысь на пыраліс öдъя пытшкöсас, шаркнитліс-ко-йыштіс көш джын ва көрт пач вомö, доналöм изъяс вылö. Босьтіс да мöдысь на дорвыв корöсясис, öнісö сувтсөн нин, швучкис да швачкис яйсö чепялысь жарас, паськыд лабичö весиг эз пуксьыв. И вöлисти, юрыс мöдіс бергöдчыны да, шатла-ситыр, киас корöсьсö кутіг Паш Вась воськовтіс ляпкыдик та-гöс вомён көдзыд көджö. Киськасьтöг ни нинöм... Мед öдйöджык апыштны ыркыд сынöдсö, ловсö личöдыштны тшук. Шлапкысис көдж лабич шöрö, а сёлöмыс жбуткö-нöйтчö, горш пырыс дась чеччыштны. Юрсö лэптіс, да пывсян водзыс öтарö-мöдарö довъя-лö, быттьö дзибрös пыжөн Паш Вась гыа Эжва ю кузя кывтö-катö. Нем виччысьтöг вукöдны кутіс, пöсь дуль горшöдзыс кай-ліс, öтчыд дай мöдысь... Ки-кокыс лигышмуніс, быттьö öдъя пывсяныс пычиктіс-мырддис пöрысь мортлысь бөръя вынсö. А коліс на сылы кызкö-мыйкö киськасьны да бөръяпом песлышт-ны ворйö көтöдöм улыс көлуйсö. Майтöгсö тонö водзвыв дасьтіс и... «Талун көть эськö гөбöч вылөдз воöдчыны, кутшöм нин песла-сьöм»,— бергаліс Паш Васьлөн юрын көдж лабичас пукалігөн. И кор сюри лöсялана здук, кор вукöдöм-восöдöмыс муртса кеж-лö вешйыштіс бокö, пывсян водзö петысь кималасөн кватлаліс ассьыс паськөмсö, пупайкасö шыбитіс вылас, гын сапöг суюйыш-тіс кокас да катласитыр довгис гортланьыс. Кыдзкö-мыйкö ка-йис кильчö содъяссö, но пырнысö посводзас да игнасьны öдва-öдва нин вермис. Керка пытшкас, порог дорсянь, Паш Васьöс кокыс водзöсö эз ну. Сійö мырдөн-сорөн кавшасис гөбöч вылö да быттьö джуджыд гуö увлань юрөн суныштіс — ставыс воши син водзсьыс. Пывсяныс и корöсьыс, төвся луныс и лым весалö-мыс, Уляшев ёртыс и коркöя ылі войнаыс... Ставыс, мый вöлі юрас да сёлöмас.

Дыр-ö-регыд сургис-куйліс Паш Вась паччөр бокин, гөбöч вылын, ачыс эз тöд. Восьтіс синсö — гөгөр дзурс пемыд, сöмын пачводзас, дзик матич бердас, ичöтик дзузу би кодь лампочка öзйö, муртса югзьöдыштö таладор жырсö. Кöсйис бергöдчыштны-вöрзьöдчыны, но ки-кокыс эз кывзысь, быттьö юрсянныс кок чунь йылöдзыс Паш Васьлөн туша-мыгаыс дыр куйлöмсьыс по-зялöма, кын кер пом кодь лööма. «Тайö тай мекöд мыйкö нелад-нö вöчсьö, тшук вывті жарын корöсяссöма...»,— ланьтöдыштіс асьсö пöрысь морт, да кызди вермис, зілис вöтлыны юрас воысь-бергалысь быдсяма пакöсьт мөвпсö. Бура дыр тадзи куйліс, косьмöм вом доръяснас паччöрсьыс кос лук көра сынöдсö апа-ліг. Коркö-некоркö бара на эськö ырыштчыліс кыпöдчыны-чеччы-ны мустöммöм вольпасысь. Сöмын ымöстöм петіс косьмöм горшсьыс... Та мысти и гөгөрвоис Паш Вась: юр вемыс сёлөн

торксьома, тыдалö. Кутшöмкö сөн сэтысь потöма да сы вöсна и ки-кокыс кын... Валя гöтырыс тай, параличыд вартіс да, вит лун мысти и кувсис-а. Көть Кулöмдінса больничаöдз катöдлісны. Сэні Паш Вась унджык и кывліс паралич йывсьыд гöтырсö бурдöдыссянь, зэв лёк да мисьтöм висьöм пö, морттö гусьон пурöмөн пурö. Сирасяс да оз бара-й лэччысь... Ыджыд сөн кö мортыдлөн юр вемсьыс потö, сійö вермас мöдарьюгыдад регыдөн и веськавны. Оз кö öдйö-öдйö пельшер дорйы... А Паш Васьлы нö öні коді отсалас? Висьöмыд топöдіс, да ватö весиг некодлы мыччыны. Горшыс пакталöма-косьмö... Непöштö пельшөрöс чукöстлыны-корлыны. Ачыс тай нö нэм чöжнас кымын бур вöчліс йöзыслы. Коркö татшöм жö кöдзыд тölö мир туй боковыс, керка весьтсьыс, Паш Вась сулалысь машина казяліс. Видзöдö да, абу ас сиктса. Ни совхозлөн, ни вöрпунктлөн татшöмсямаыс эз вöв. А моторыс машинаыслөн таргö-уджалö, еджыд ру кайö мир туй весьтас. Паш Вась восьтіс кабина öдзöссö, а сэні шо-перыс сургö, лёк дуксьыс кольмöма, гашкö, да садьтөг куйлö. Еджыд быг вом гөгöрыс... Паш Вась уськөдчис пу дадьла, сы вылын гöтырыскöд сургысь морттö ас керка дорöдзыс кыскисны. Гортас летісны-садьмөдісны шопертö вельдыр. Быдсяма ногыс, нашатырнöй сыпирт сюри да сійö ёна отсаліс. Паляліс öд кызкö-мыйкö. Сиктса пельшерöс, Роза Ивановнаöс, лои корлыны весигтö, сійö и шуис гозьялы: мöдарьюгыдсьыс пö бергöдöмныд шоперсö. Муртса-муртса кö энö удитöй, кабина пытшкас и кувсис. А мöдыд, паляліс-ловзьыштіс да, сёсытьö аттьöалис Паш Васьöс туй вылад дорйöмысь. Тöлысь мысти гöтырыскöд кежаліс Ульныровъяс ордö бур кыв шуны. Эжва йывса Паспом посёло-кын уджалöма шоперыд, Иван нима, куим челядя. Сэки карö пызьла лэччылöма...

А Васька Аннатö, шева позтö, коді нэмсö орччөн оліс да уна пакöсьт Ульныровъяслы керис, Паш Вась орчча ва струбаысь коркö перйыліс: вала петöма да кокувса сісьмöм керъясыс вич-чысьтөг вальдöмаöсь. Кыськö му увсьыс горзöм кыліс Вась, ас йöрсянныс уськөдчис ва струба дорад, а сэні кодкö уялö да чилзö. Первойсö кузь зіб мыччис, сэсся палича пос на ковмис вайлыны. Кызкö-мыйкö кайис-кавшасис вакуль кодь нывба-баыд му веркöсö, да Паш Васьлөн кывйыс воши — сё лешакöй, Васька Анна ва струбаад вölöма. Паш Васьяслөн куим арöса Öлексей пиыс сэки буретш сьöкыда висьмис: ыджыдкодь мыль чильболь дорас петöма да весиг сиктса пельшер нинöмөн эз вермы отсавны, юрсиктса больничаö кöсйис мöдöдны. А гозья став грексö Васька Анна вылö вештылісны: сьöд чужöма тшы-көдчысьыд пö вомдзалис налысь мича кагуксö... Гашкö, и збыль сійö тунавлöма да, öні нö кысь тöдан. Куим лун мысти пиыслөн кок вож костö чепöсйылöм мыльыс вочасөн ямис, регыдөн и дзикöдз быри-воши. Ачыс ачысөн, некутшöм больнича ни пель-шер-врач эз ковмы. Абу весь шулöмаöсь: бур вöчöмыд пö тай и чегöм лытö йитö. Сьöд синма туныд тай ловъя морт жö. Дивö дзик...

Дивö и сійö, мый гöтыр кувсьöм бöрас Паш Вась дас сизимöд во олö-дзуртö. Öтнасөн. Валяыс пожöма ягын куйлö, пи-нывъясыс бокинöсь, коді көні олö-вылö. Куим челядь пиысь öтитö позис

жō эськō гортас кольōдны да, бать-мам дорас... Мед кодкō чу-жан лов пōвстысь орччōн вōлі. Ватō вайны да пестō пыртны. Асьныс жō Паш Васьяс таысь мыжаōсь. Ставнысō сиктса школа помалōм бōрын карлань мōдōдісны, водзō велōдчыны да ѓттшōтш бур олōм корсьны. Мый ѓні шогавнытō, сēr дай весьшōрō: кос кыддзысь зараватō он вийōд...

И выльысь Паш Вась кызмырдōн кутліс кыпōдны юрсō, мед бергōдчыны бокногōнмоз матичбердса шырбилань да кыдзкō-мыйкō лэччыны ляпкыдик гōбōч вывсьыс. Сяммас кō воны джō-джōдз, дырōн-регыдōн кыссяс и пыдї жырийōдзыс. А сәні Паш Васьлōн телепон сулалō... Сийō гоз-мōдысь дорвыв тшōктана-корана триньōбтыліс нин сēr рытнас, гашкō, и войнас да. Паш Вась пельōдз воліс лōнь керкаад телепонлōн зиньгана-троньгана шыыс. Кыскō ылісянь-ылісянь кыліс триньōдчōмыс... Кодкō быттьō сьōд пемыд кадас мырдысьōн зіліс писькōдчыны пōрысь морт дорōдз, тōдмавны, мый ськōд лои, да воны отсōг вылō. «Енмыд тай эм на, челядьōй, тыдалō, кылісны менсьым дойōс да звōнитчōны, шōвктугъяс. А батьныд воча кыв шуны оз вермы... Месō ас олōм йылысь ѓттор-мōдтор гижышталі, мед тōдінныд. Пōлать помын куйлō тубрасыс... Асьныд аддзанныд бōрти...»,— бергаліс-гартчис Паш Васьлōн жуныгысь-гудрасьысь ве-жōрас, а мырдōн-сорōн кыпōдлōм дзор юрыс шебрас вылас бōр лигышмуні-уси. Чукырōсь чужōмбан кузяыс шливкнитісны-тюрōбтісны гырысь синва войтъяс. Забеднōысла, мый нēньпом кага кодъ нем вичысьтōг лои.

...ōлексей сийō рытнас ѓтчыд дай мōдысь звōнитліс батысылы. Но гортас некод эз шыась, Паш Васьлōн телепоныс чōв оліс. Войланьыс нин Őлексей выль пōв видліс корсьлыны батьсō, но бара весьшōрō — зиньгōм шыыс карсянь муніс, а ылі сиктса керкаōдз быттьō эз во. «Пывсис, тыдалō, да унмыс личкис пōрысь морттō»,— лōньōдыштіс асьсō узьны водігас Őлексей. Вой джынсō куйліс восьса синмōн, быдсяма думыс бать йывсьыс бергаліс-гōграліс, да сәсся коркō югдандорыс ойбыртліс жō. Асывнас, час дас бōрын, нōшта кыкысь-куимысь звōнитліс батысылы. И бара телепон мōдар помас некод эз шыась. Őлексейлōн вирыс нин кутіс пузыны — дзикōдз али мый пельтōммōма батыс, мōдōд лун воча кыв оз сет. Другысьōн морōс пытшсō ыркнитіс, быттьō дōрōм улас йинēнь суйыштісны: а мыйкō кō лои батыскōд, доймис ли, висьмис ли... Медся ēна таысь и поліс Őлексей. Чōв олōмыс батыслōн нюжаліс да...

Луныс рытлань катовтіс, кор Őлексей телепон пыр корсис сиктсьыс важся ѓртсō, Малань Володьōс. ѓтлаын коркō школа помавлісны. Нэмсō трактор-машина вылын Шорйылын гōрис-уджаліс.

— Володя, тэ вай, ен могысьōн, бать дорōдз ветлы. Кык лун мыйкō чōв олō, телепонсō оз босьт,— корис сийōс Őлексей.— Ме сәсся час джын мысти выльысь звōнитла.

Малань Володь пыксьыны эз кут, кōть и юыштōма вōлі.

— Час, гын сапōгōс кокō сюя да быть кайла,— гōгōрвоис карса ѓртыслысь майшасьōмсō мōдыд. Паш Васьōс сийō бура тōдіс, пес-куйōдтō пōрысь мортлы быд во на вайліс.

А Őлексей жōдзис ѓтарō-мōдарō: то ас кежсьыс ышлолаліс,

то чөвтліс видзёдлассö часі вылö. Пöсяліс быдсөн. Сэссия кватитіс телепон.

— Володя, тэ нö кайлін эн миян керка дорөдз? Жежалін, сідзкö. Но сё аттё таысь. А батьöс аддзылін?

— Эг вермы пырнысö. Зөркөдчи эськö и быдтор да. Кильчö өдзöсыс пытшкөссиянныс игана. Лымйыштöма да керка гөгöрыс морт кок туй оз тöдчы. Пачводзас тай битор öзйö-а, öшинь пырыс тыдыштö,— висьтасис Öлексейлы Малань Володь. Чöv олыштöм бöрын содтіс:— Аслыд колö воыны. Мало ли что...

Та вылын налөн сёрниыс и ори-помасис. Öлексей пуксис пызан помö да пыр на кутіс киас туткысь телепонсö. Көнкö морöс пытшкас гартчис-бергаліс синтö дзазöдысь курыд дой, сійö ньöжйөнникөн кыпöдчис вывлань, горш дорөдзыс, тасасис сэтчö, зілис ылькнитны ортсыö. Син водзас батыс сувтіс, лымъялөм керка дорыс, пачводзын öзйысь битор... Коліс тэрмасьны, коліс юөртны чойясыслы да пыр жö кайны гортас. Мед сöмын удитны-а... Но сёрмисны...

...Дзевисны Паш Васьöс дзик во помас. Асыв кежлö виччысь-төг шондöдіс да кымөртчис, зумыш енэжсянь тэрмасьтөг шлапкис-усис небыдик лым. Гортсö сиктса мужикъяс петкөдісны ки выланыс мир туй дорөдз, лэптісны трактор доддьö. Көрт вöv бөрся вөрзисны и колльөдчысьяс, лэччисны сикт увлань, төдса пожöма ягö. А гырысь да пушыд лым чиръяс котөрөн вөтчисны мунысьяс бөрся; ас гөгөрныс гартчиг, найö пуксялісны трактор доддьö, Паш Васьлөн гортйö, яглань восьалалысьяс вылö... Быттё еджыд рөмнас зілисны мичмөдны сьöd паськöма тувччалысь йөзсö, воысь дженьыд да букуш лунсö.

Паш Вась талун бара петіс туйö. Тайö олөмас бөрья туйö...



Том гижысьяслөн семинар

«Войвыв кодзувлөн» воддза петасын, «Литература олöмысь» рубрикаын юöртлiм нин, мый октябр 15–18 лунъясь Сыктывкарын Коми гижысь Котыр нуöдiс том гижысьяслысь семинар. Поэзия юкөнöн юрнуöдiсны Михаил Елькин, Владимир Тимин да Анжелика Елфимова. Прозаён — Елена Козлова, Алексей Попов да Александр Ульянов.

Аслысьяма традицияён нин лои семинар вылын велöдчысьяслысь медбур гижöдъясьö йöзöдны «Войвыв кодзув» лист бокъясь вылын. Тадзи ми бурсиам, ышöдам водзö зiля уджавны да отсалам том гижысьяслы вöчны медводдза воськовъясь литератураö.

Наталия ИВАШЕВА

Муса шондi, дона мамö!

Олан мелiа да рама,
Нюмыд тэнад век зэв мича,
Кыдзи луд вылын пöлöзнича.
Зарни шондi, мелi мамö,
Мен зэв нимкодъ,
Мый ме танi...
Мый ме ола Коми муын!

Юр весьтын со югыд шондi,
Сöстöм енэж — мый нин колö?
Сынöд чöскыд, лудъясь вежöсь.
Атьö, мамук, мый тэ вайин
Тайö шуда вöльной светас!

Наталья ДЁМИНА

* * *

Сьöлöм бердö йөршитчöма полöм:
Кутшöм дзоля мортлөн лоö олöм.
Узьö-нускö, нинöм на оз тöд.
Бур, мый гачыс кос да кынöм пöt.

Кытшовта став вöрсö, мусö, видзсö,
Чукöрта став мирсьыс бурсö, мичсö,
Зiльлун, сюсьлун, авъялун на сюрас.
Олöм чöжөн кодза нывлы юрас.

Сьöлöм бердö йөршитчöма полöм:
Кутшöм дзоля мортлөн лоö олöм.
Мам йöв кындзи нинöм на оз ков.
Нюмъялыштö, узьö сöстöм лов.

Сөмын тэкөд

Ме аслым лосьодалі мойдъяс,
Мый тэтөг олөм оз ло лөк.
Ме чайті — кодкө менө ордъяс
Да шуднас тыртас гөгөрбок.

И регыд сюри сэтшөм мортыс,
Ми аддзим сыкөд өти кыв.
И дась нин пыртны менө гортас,
Но сьолөм пытшкысь йи эз сыв.

Ме сөмын тэкөд вөлі шуда,
И сөмын тэкөд озыр лов!
Ме мойдъяс лосьөдлыны дугда,
Тэ орччөн — мукөдыс оз ков!

Төда — локтан

Көн тэ, менам муса ёкмыль?
Көні коллялан сьөд вой?
Тэтөг менам олөм лөкмис,
Сьолөм чепөльтө лөк дой.

Мича синъястө эг вунөд,
Колис көть нин уна кад.
Гусьөн шөпкөдін кор: «Муна...»
Бөрдіс мекөд льөм пу сад.

Торъявлім ми дас во сайын...
Мөдкөд юким вой да лун.
Төда — локтан, шудлун ваяс
Чужөм вылад кыпид нюм.

Вазьөм синъяссьыд ме лыддя
Медся ыджыд гусятор.
Эска: некод нин оз мырдды
Дас во бөрын аддзөмтор!

Василий ЧУПРОВ

* * *

И енэжыс руд,
И васө нин вийөма:
Илля лун бөр...

Арыслөн кок шыыс
Выліас кылө нин —
Лэбачлөн колльөдчан сьылөм...

Но өтиө эска ме —
Енэжсө пасьвартан бөр,

И вежодан васё
Да содз тырнад киськалан менё.

Сэк лэбачлөн норыс
Мен меліён кажитчас.
Бөр
Гожомыс сьолөмө овмөдчас —
Мөдысь на лолыштны позяс...

* * *

Пызан вылын тшайыд көйдөма,
Няньыд видлытөм...
Ен ув пельөсын дыр нин кевмысян,
Коран. Аслыд-ө?
Югыд чышъяна, дона платтьоа...
Кытчө мөдөдчин?..
Китө топөдін, шуин сьолөмсянь:
«Енмө, бласлөвит!»
Тайө кывъяснад менам сьолөмө
Битор пестін тэ,
Өнөдз ворсө на сылөн югөрыс
Менам лов пытшкын,
А ме верма-ө сійөс кужөмөн
Видзны ас пытшкын,
Сэсся вуджөдны-сетны слөйма-ө
Водзө мунысьлы?..

* * *

Вөльысь* чужис
Кага...

Бөрдө...
Водзө олөмсө,
Гашкө,
Аддзө да...

Анатолий ЛАДАНОВ

Дженъыдик висътъяс

Мудер «пөч»

Сиктным миян нюжөдчөма ю пөлөныс. Пөрысь йөз на казялө-
маось, мый мөдлапөвсянь кө сикт вылас видзөдны, быттьө кань
лажгөдчөма: кокъяса, ныр-вома и бөжа весиг. Быттьө сиктсаяс
наросьнө сідзи керканысө сувтөдалөмаось, мед тайө шензьөдана

* Вөльысь (иж.) — сөмын.

серпассо не торкны. Ми — мамой, батьой, ме да менам кык ыджыдджык вокъясой Владик да Вова — олам тайо «каньыслон» шуйга бөр лапа йылас, дзик ю дорас.

Батьой рытнас локтіс удж вылысь да шуис, мый аски ми сыкөд мунам вадорё пес пилитны. Тайо вьлиторсьыс мено, веськыда кө шуны, ёнакодь шогөдіс. Ме эськө абу дыш, уджавнытё радейта и. Но кодлы окота гожом шөрнас вадорё мунны пилитчыны, кор ёртъясыд сэк коста бурпөт уялоны ва пытшкас.

Аскинас бать садъмөдіс водз. Көть асъя ыркыдкодь руыс абу на вөлі ёна пыркалома, луныс, тыдало, лоас жар. И таысь меным нөшта на деливо сёлөм вылын лоис. Нёшмасиг да мыссигкості, бать, кылө, клёнгис посводзын пила чептъясөн, а вокъяс — крукъясөн. Сэсся ставон пуксим пызан сайо. Мам вөлі пөжалөма печенча, вундалөма сола чери. Чөв-лоня нуръясъыштөм бөрын батьо да вокъяс мөдөдчисны, а ме кольччи. Шуи, мый баб ордө пырала да найос суода.

Бабой менам ёна пөрысь нин, миянсянь кык керка сайын олө. Ме сы ордө пыравлі быд асыв кутшөмкө да юмовторйон чөсмасьштны. Пыр сійо мено мездө, кор мыйон вермө.

Баблон өшинь дорас пукала, аддза, кыдзи арава челядь лэччөны ю дорө — коді мача, коді бедь вылын көлеса бергөдлө. И меным сэтшөм окота накод мунны. А кыдзи мунам гусьон пилитчысьяс дортıд.

Сэки воис юрө пөръявны батьос да вокъясос. Пасьталі баблысь юбкасо, юрос чышъяналі. Бабой аддзис мено да шуө:

— Кытчө нө татшөмасө вөччин, кагукөй? Куттяасьлоны өд төлын, а оз гожөмын.

А ме баблы вочавидза:

— Көсъя ёртъяскөд купайтчыны мунны, а сәні батьөяс пилитчөны. Колө на бокті прөйдитны, мед эськө эз төдмавны.

Бабой, шань мортөй, сэки сетіс меным ассъыс важ өчкисө да кильчө боксьыс бедь пыртіс:

— Öчкисө эн вошты. А кор мөдөдчан, бедь мозыс жө крукыльтчы да ньөжйөник мун, мед некод оз гөгөрво, коді тэ сэтшөмыс.

Ме сідзи и вөчи. Кор матыстчи батьөясланьө, кыла, Владик шуө:

— Опонь Васьлон бабыс со мунө, Опонь Васьсө юрси кучикөдыс вадорсьыс катөдны, көнкө бара на пышйөма челядь чукөрыскөд видз вылас мунөм пыдди да.

Ме чышъян улын өдва серамөс кута. Мыйон прөйдиті пилитчысьястө, баблон став велөдөмыс вуніс, мөді бедь вомөныд чечавны. Сэки мено и төдмалісны. Кыла, мышсянь батьой пинясьөмөн горзө:

— Часлы, волан тэ гортад, пөттөдзыд тасмаала ылөдчөмсьыд да уджсьыд пышъялөмсьыд!

А меным сылон горзөмыд дзик нин веськодь. Öні кута пөттөдз купайтчыны, а тасмааласны өд коркө на.

Юнымлон ямөм бөртиыс берегас тырыс ва гуранъяс колисны. Öти ляпкыд, мөд джуджыд. Ляпкыдас ваыс онялө, и ми сәні лягөйяс моз уялам-чилзам. Кор нюйтыс сэтысь дзикөдз кыптас, юас мунам. А сән ваыс йиа көдзыд, петан да пиньыд зяткакылө.

Сэсся бипур дорын шонтысям, гегдöмаöсь, пидзöсьяс гöрдöсь. Но долыдсьыс-долыд.

Рытнас гортланьö мöдöдчигөн меным дум выlö усис батыльон тасмаавны кöсьöмыс, да менö эз нин кынмöмсьыс, а повзьöмöйла тiралöм босьтiс. Но гортад быть мун, ю дорас öд он овмöдчы.

Пыри гортö, а сэн буретш дядьöй, батыльон вокыс, карсянь воöма. Тырыс гöсьнеч вайöма. Пукалöны кыкөн пызан сайын да мый йылысь кö гораа варовитöны. Ме кватитi китыр кампет да лэбыштi вежöс сайö баты син водзысь. Баты нинöм эз шу, гашкö, весигтö эз и казав локтöмöс, а колöк, вок водзас эз вöв лöсьыд пинясьнысö.

Сир кыйöм

Тулыс воис, лымйыс сьöдöдiс да пондiс ыджыд шорөн визувтны юлань. Ю вылын йиыс вöрзис, потласис, мöдöдчис зэв гораа трачкöмөн кылавны. Йи торъяс мый вынсьыс йöткасьöны, öта-мöд вылас кавшасьöмөн тойласьöны, быттö сьлöмысь жö полöны да тэрмасьöны войвыlö.

Батыкöд мунiм вöйтасьны. Сийö менö велöдö:

— Чери кыйöмнад кынöмыд пыр нин пöт лоас.

Вöйтiм öтвылысь кык кулöм. Сэсся батыöй аслым тшöктiс видлыны, ачыс пуксис берег вылас, видзöдны, мый менам артмас. А збыльвылас кö, менам нинöмыс оз артмы. То пыжöй мöдарö бергöдчöма, то сетьöй гартчöма. Скöрала нин. А батыöй сöмын сералö:

— Велöдчы, пиук, велöдчы. Нэмтö öд менсьым кыйöмтö он кут сёйны.

Ме дзикöдз скöрми, чеччи пыжсьыд, корси ыджыд зор, тувъялi берегас, саранöс ва вылас пуктi и сiдз вöйтаси. Бур, кулöмöй вöлi дженьыд, метра дас сöмын.

Мöд рытнас лэччи видзöдлыны ассьым местаöс. Ваыс ойдöма, зорйöй ю шöрас лоöма, брöднинад сы дорöдз он нин во. Босьтi пыж, сынi места вылöдз. Видзöда, кулöмöй гартчöма зор гөгöрыс. Мися, ыджыд чери, буракö, шедöма. Батыöй, көнкö, ёна и ош-кас. Часлы, шуа, зорнас перъя да берег дорас нин сетьсö разя. Öтарö бедьтö пöлынътла, мöдарö, некыдзи оз шед. Ёнджыка выныштча, пыжöй путкыльтчö. Мый и вöчны? Киясöй гаддявтöдз катлöдлi зортö да шедiс жö, слабог. Кер моз кыски берег дорöдзыс, катöдi да чуйми: сэтчö, вöлöм, аминь ыджыд сир шедöма. Радöйла сьöлöмöй вомöд петны кутiс, кывйöй бырис. Пукси му вылас и нинöм вöчнысö ог вермы.

Сэсся коркö сайкалыштi да пыжöс лэптi вылöджык, домалi пу бердö, мед оз кылав. Кулöмöс зорнас и сирнас лэптi пельпом выlö да сiдзи и мöдöдчи гортö. Черийд сэтшöм ыджыд — бöжыс бöрсянь му кузяыс кыссис. Нимкодьöйла весиг эг казав, мый кулöмыд юр вывсянь кок улöдз брöд кötöдiс. Шыбитi кыйдöстö кильчö помö да скачөн гортö пыри.

— Батыö, батыö, ме зэв ыджыд сир кыйи! — вомтырөн ош-йыся.

Батыöй первойсö весигтö эз эски меным, шуис, кутшöмкö

пö кер, кöнкö, пысалін. А кор петіс кильчö дорö, пöттöдзыс кутліс да окаліс менö, быттö ме сылы эг сир вай, а «вит» ты-ра дневник.

— Аттö, пиук, батыдлысь велöдöмсö он кедзовт да. Бур чери кыйысь тэысь петас.

Ми сэсся батöкöд сиртö перйим, а кулöмтö öшöдiм косьтыны. А аскинас бабöй медыджыд гырничнас юква пуис да мед-паськыд рачас черинянь пöжаліс.

Касьтитчис

Пöшти дзик вөр шöрас, паськыд ты бокин сулаліс Пеля сюр грезд. Сэні оліс баблөн ыджыдджык нылыс, Наталья тьöt. Ичöтдырйи менö бабöй унаысь нуöдліс сы ордö гöсьтитны. Не-уна быдмышті да шуи, мый öтнам нин сэтчö верма воöдчынытö. Шуöма — вöчöма.

Ылі туйö мöдöдчигөн баб менö велöдіс:

— Синмыдлы эн эскы, сöмын сьölöмтö бура кывзы.

Мыйла буретш таdzi бабöй шуис, ме, дерт, сэки эг гөгөрво, а юасьнытö эг жö юась-а.

Автобусыд чеччöдіс менö вөр бокас, тасянь сэсся коліс кеж-ны да кöкъямыс километр мунны подөн. Нопйöй мышкöс эз сьöктöд да восьлавсис кокныда.

Кöть и ар нин сулаліс, поводдяыс нюмъяліс гожся моз. Кöнкö со уткаяс гаджгöны, лунвылö, кöнкö, вөрзёны. Восьлала бусöсь туй кузяыс, гылалöм коръяссö чужъяла. Другысь бокин быттö кодлөнкö кок улас кос бедь чегис. Сьölöмöй дрөгнитіс. Чатра-сьышті, но некодöс эг аддзы.

Джын туйсö прöйдиті и... повзёмöйла места вылö джöмді. Меным паныд, воськов кызь сайын кымын, пашкыр козлөн уліса лап вылас пукалö... ичöt дед, тошкыс муöдзыс нюжöдчöма. Пука-лö и ме вылысь синсö оз вештыв. «Вöрсаыс петöма»,— вирдыш-тіс юрын. Тірöм босьтіс, вомöй оз воссьы горöдны, кокöй оз вөрзёны воськовтны. Кыдзкö-мыйкö тай верми жö кын кокъясöс ловзёдны. Муна, ог лолав, синмöс муас сатшки. Мый лоана, ло.

Кор öтвесьтаси козйыдкöд, синмöс лысьті жö лэптынысö. Вöлөм, козйыслөн лаптыс чегöма да ротсялöма. Ылісяньыд дзик ловъя лов быттö и пукалö. Но и повзылі. Мышкöй мöлын ва. Тьötкалы бöрыннас висьталі, да сійö такöдöм пыддиыд сöмын серöктыштіс.

Пызан сайын висьтасигөн рытыс колис. Узыны меным Наталья тьöt вольсаліс чуланö, öшинь дорас. Кöть повзёмсьыд да мудзём-сьыд быдлаті лигышмуніс, выль местаад унмовсьнытö дыр эг вермы. Тöлысьыс на сэтчö югыдсьыс-югыд петіс. Видзöдлі ме öшиняд, а сэн суседьяслөн забор вылас лажыньгöмөн чöрт пукалö, видзöдö керка выланыс. Öдйö жö и шебраси юр вывті, лолыштны ог лысьт, сьölöмöй нöйтчö вольпась сорнас. Збоймыш-ті да вылысь öшиняс чатöртчылі. Збыльысь, чöртыд пукалö, быттö суседьяслөн кильчö вылас чеччыштны лöсьöдчöма. Öг весиг помнит, кыdzi унмовсьыссьöма.

Асывнас чеччи, видзöдлі öшиняд, а сэні öти сюръя помö

кринча гугдöмаöсь, а сюръяс важ джодждöра гартчöма, чай-
тан, збыльсь быттьö кодкö пукалö. Аслам повзьöм вылö сера-
мöй весиг петіс.

Луннас ветлі ты дорöдзыс. Сэні лöнь ва вылас тырыс утка,
öта-мöдсö корсьö-чуксалö, чукöрталö быдөн ассьыс рöдсö лунвы-
лö лэбигкежлö.

Регыд кытыськö петіс тöв, вайис кымөръяс, койыштіс посни
зэр. Бөр мөдöдчи тьötъясö. Наталь тьöt мыйкö ноксис ыджыд
пач пытшкас. Меланьö эз и бергöдчыв, сöмын горöдіс:

— Сайниксьыс пипусö öти моздор пырт, пачсö колö ломтышт-
лыны.

Пыра моздор пескөн, муртса порогсö воськовті и... порог
вылас и чергыси повзьöмöйла. Ме водзын сулаліс эсійö войся
чöртыд. Ставнас сьöд, юрас кык сюр, киас гöлик. Сувтöдöма
ме вылö синъяссö и весигтö оз лапнитлы.

Вомысь тöддытөг петіс вöсньыдик:

— А-а-а-а...

Киөн кватиті öти пестор да кöсийи нин лыйны, но «чöртыд»
Наталь тьöt гөлөсөн шыасис:

— Мыйөн нö, кагукöй, сэтшöма ме тэнö повзьöді? Пачöй
мыйкö омöля кыскö, да пыралі, труба гөгöрсö тойлышті. Дзикöдз
тай, буракö, саöсси.— Сэсся видзöдліс рөмпöштанö:

— Збыль, чöрт кодь и лосьöма. Чышъян помöй со сюръяс
быттьö, и роскыд на сэтчö лöсяліс и. Но мути, мути и эм!

А ме пукалі порог вылын и баблысь кывъяссö юрын бергöді.
Кыдзи сійö вермöма тöдны, мый мекöд тані татшöмторйыс лоас...





Николай Иванович Гонев чужис 1937 вося август 6 лунö Кебраса Шөрмөднөв грездын. Кебраас жö, Чой-йыв грездса школаын, помалис 5 класс. Армияын, авиацияын куим во служити-гөн, рытъя школаын велөдчис 7 клас-сөдз.

Служитөм бөрас пыраліс велөдчы-ны Ухтаса техникумө, но съөкыдлунъ-яс вöсна лои эновтчыны.

Комын во бердö Николай Иванович трактористалис вöрын первой Сык-тыв районса Визиндорын, сэсся Мак-саковкаын, а пенсия вылас петтöдз нöшта уджаліс на Сыктывкарса меха-

нической заводын.

Гижны заводитіс көкъямысдасөд воясын. Йөзөдчыліс «Чушканзын», «Югид туй» газетын да «Войвыв кодзув» журналын.

Николай ГОНЕВ

Шудыс вөлөм дженьыд

В И С Ъ Т

Ольöш Миша быдмис ылі сиктын. Семьяыс оліс съөкыда: батыс — войнаса инвалид, мамыс тшөкыда висьöдчис. Мишалөн нöшта вöліны Иван вок да Рая чой. Чоя-вока ёна окотитісны велөдчыны, но бать-мамыс эз көйыны сетны найöс школаö, асьныс велөдчитөмөсь вöліны да. Сöмын тай зонтö сэки эз босьтлыны армияö, эз кө помав нель класс. И кык воклы быть ковмис велөдчыны. А чойсö эз и сетны школаас. Мамныс шуліс: «Ми батыдкөд эг велөдчылöй, да йөзсьыс ог лёкджыка олöй. Нинөм тэныд грамотасьыс».

Но Рая көйис велөдчыны и тшөтш зунясис вокъясыскöд пызан сайын гортса уджнысö вöчигөн. Сійөн и велалис кутшöма-кö лыддысьны да гижны.

Коркö сэсся Мишалы воис пöвестка. И батыс корис сійös ветлыны лэч туяс кык войколөн. Куим во на öд Миша оз воы радейтана вöрас, вөр керкаас. Куим во на оз кутлы оз тусь кодь Настуксö.

Миша эськö раминик да, нывъяссьыд водзынджык яндысис и полис. А Семö Настук былö тшөкыдакодь кыйкнитывліс, но öдйö бөр вештыліс синсö. Гашкö, эз и сибöдчы эськö сы дорö, но öтчыд турун пуктигөн найö öтилаö веськалісны бергöддыны турун, гырысь бадь кустъяссайса ласта былö. Матигөгöрын некод эз тыдав, и Настук ачыс матыстчис Миша дорö.

— Мишук, видзöдлы ме былö, кыдзи тай гусьöник кыйкъяв-лан. Тані некод оз аддзыв.

Мишалөн эз сöмын ки-кокыс мөд тіравны, став яйыс пондіс

сювтчыны. Зон гөрдөдүс пель йылөдзис, синсө муас лэдзис. А Настук сывйыштис сійөс да небыда вашнитис:

— Мыйла тэ, Мишук, сэтшөм яндысьысь?

— М-м-ме ог төд.

— Көсьян менө окыштны?

— О-ог төд.

— Тарыт кино лоö — «Чапай». Кино бөрас колльөдан менө гортөдз?

— Колльөда.

Киноас пыран билетис вөлі кызь ура. Миша ньөбис кык билет, кутис виччысьны Настаөс. Настук локтис Зина пөдругаыс-көд и пыр жө матыстчис Миша дорө.

— Ми кыкөн воим.

— А ме босьтис кык билет.

— Ме пырала да ньөба аслым,— шуис Зина.

— А ми ог на пырөй, водз на да. Тані сулыштам. А тэ займит миянлы бурджык места.

Киносө видзөдөм бөрын Миша шуис колльөдны нывъясөс гортөдзис. Но мыйөн вөрзисны клуб дорсьыс, Зина чөвтис, менө пө гортын виччысьоны, и муніс. А Миша да Настук воөдчисны сикт помөдзис, лэччисны Югыд шор дорөдз, юыштисны чибльө-гөн көдзис васө, пожйыштисны чужөмъяснысө. Сэсся мунісны ыджыд льөм пу дорө, көні сиктса ныв-зон колявлісны гожся югыд войяссө. Но талун льөм пу улас некод эз тыдав.

— Вот, Мишук, миянлы некод оз кут мешайтчыны. Тэ рад?

Миша сөмын синнас лапйөдліс да чөв оліс. Сэсся нурбыльтис вомгорулас:

— Настук, эн дивит менө, ёна яндыся да. Мам менө окыштас, а меным яндзим. Ме некодөс на эг дзигөдды ни эг окышталы.

— Вот и кутам велөдчыны окасьны. Ме өд зонмыдкөд эг жө на окасьлы.

Эз дыр ковмы окасьнытө велөдчыны: Мишалөн полөмыс ре-гыд бырис, да зон ачыс нин личкис Настуксө небыд турун вылас и мудзтөдзис окаліс... Некымын вежон мысти ныла-зонма бара локтисны тайө льөм пу дорас. И бара сэні некод эз вөв: енэжыс кымрасис да, гашкө сійөн. Миша шуис:

— Но и бур, некод оз мешайт. Ме вайи чөскыд вина доз, стопкаяссө босьтис и, кыкөн и чурснитам.

Миша перйис льөм пуувса дзебассыс дөра вольөс да павк-нитис турун вылас. Туруныс быдмөма коскөдзныс: водан да, оз кө вылад воны, оз и казавны. Төлаліс төв, и өвадыс эз уна вөв. Окасигмозныс и ректисны дозсө. А сэсся водісны да топөдчисны, и налөн ставыс вуні. Ас садяс воисны сөмын сэк, кор кылісны куш вир-йяныслысь зөлитөмсө, сэтшөма сөйөмаөсь номъясыс. Миша зырыштис кинас кокъяссө, и кыис вирөссис.

— Лэччылам шор дорас да пожйыштчам,— вөзйис сійө.

Ныла-зонма мыссисны торйөн: Миша пырис өти гөптө, Настук — мөдө. А сэсся пасьтасисны да кайисны сиктас. Аскинас бара адзысисны, и Настук вөзйис:

— Льөм дорад сэсся ог нин мунөй, кутам узылыны сарайын, вонйын. Тэ сөмын гусьөнджык лок сарай дорас. Ме восьта өдзөссө.

Миша пондіс воыны сы дорө быд рыт да мунліс асывнас.

Но виччысытөг воис пöвeстка. Гортсыыс петан лун водзвылас Мишалөн керкаö чукöртчылісны рöдвужыс да сиктса йöз. Кол-льöдысыяс пöвстын пукаліс и Настукыс. Гажöдчисны вой шö-рöдз. А асывнас Миша лэччис карö. Вурöм дöра нопйö пуктісны пöжас, куим пöжөм тар, дас кымын пуөм кольк. Настук козьна-ліс ныр чышкöд. Миша сюйис сійöс пытшкöс зептас, сьölөм дорас матöджык.

Сиктсыыс Миша муніс öтнас. Карас сы коддьöмыс чукöрмис морт сё. Найöс пуксьöдісны нель автобусö да некытчö сувтлытөг нуисны Княжпогостöдз. Сэні выльöн босьтөм салдатъяс олісны куим лун, кынöмсö пöткöдісны сукарөн да дубыд тшайөн. Сэсса зонъясöс юклісны котыръяс выlö военкоматөн индөм войска серти. Мишаöс босьтісны авиацияö. Зонъяслы сетісны сукар мешöкъяс да нуисны водзö скöт новлöдлан вагонъясын.

Воисны Коношаö. Призывникъяс петісны вагонъясысь. А буретш став вузасыніныс пöдса. Тшыгъялöмысла скöрмөм зонъяс пондісны пасыйыны лавка öшиньяссö, сёян видзан складсö вось-тісны и. Регыд мысти рекрут джынйыс гажмис. Миша босьтіс калбас, нянь, некымын папирос пачка да бөр муніс аслас вагонö. Винасö эз босьт, войт эз ю ни. Сёянсö дзебис вагон пельöсас идзас улö.

Ывлаас кутісны лыйсьыны. Вагонас пырисны салдат да сержант. Сержантыс юаліс:

— Ывлаас петалін?

— Петалі вагон мышкöдыс да бөр пыри,— вочавидзис Миша.

— Лолышт.

Миша лолыштіс.

— Тайö веськыд юра. Кыдзи нö овыд?

— Гудыров Михаил Епимович.

— Гиж: Гудыров веськыд. А тэ, Гудыров, кутан гижавны, кодъясöс пондасны ваявны татчö. Гөгөрвоин?

— Меным некытчö и нинöмөн гижнысö.

— Тетрадь да карандаш сетам.

Миша дорö колисны винтовкаа салдатöс да мунісны. А сэсса нельысь вайöдісны дас мортөн — ставныс садь юраöсь да куш киаöсь. Поездыс мöдіс водзö. И мунігчöжыс салдатпуяслы ковмис йирны сукар. Сöмын асывнас налы сетлісны кружка ва да рок.

Дас кык сутки мысти поезд воис Каңдалакшаö. Призывникъясöс чеччöдісны, чуксалисны овъяс сертиныс да сöвтöдісны мöд вагонъясö. Поезд муніс водзö куим вагонөн. А Миша бара на веськаліс тöдса зонъясыскöд. Кызь верст мунöм бöрын поезд сувтіс дзoляник станцияö, стенас гижöма — «Станция Зашеек». Призывникъясöс чеччöдісны, сувтöдісны стройö. Налы воча сувтіс опицер да висьталіс:

— Мунам подөн куим верст, и ми часьтынöсь. Абу ылын. Баталлө-о-он, напра-а-аво, шаго-ом мар-рш!

Часьтыс, вöлөмкö, сулалö Имандра ты дорын. Татөн Мишаöс кутасны велöдны служитны, а присяга примитөм бöрас ыстасны мöд часьтö, кыдзи и мукöд салдатсö. Но вермасны и татчö кольны.

Имандра тыöд ветлісны гырысь катеръяс, ваялісны орччөн сулалысь вөр пилитан заводö керъяс. Асывъяснас салдатъясöс

котрөдлісны ты дорас мыссыны. Баыс югыдсыыс-югыд, а берег пөлөныс ыджыд сиръяс уялоны. Старшинаыс висъталіс, сиръясыс пө кыснантө оз босътны: вөр пилитанінас посни чериыс тырыс да, сиръясыс сэні дундытөдзыс сөйөны.

Миша судзөдіс өти салдат пыр гырысь вугыръяса кыснан да мөд луннас берег дорас мунігөн босътіс сьөрсыыс. Мыссыгас казяліс метра вит ылнаысь ыджыд сирөс. Перйис зепсыыс пөв-тор, кытчө вөлі гартөма кыснана көв, разис көвсө да шыбитіс ваас, но сирыс местасыыс эз вөрззы. Миша пондіс кыскыны кыснансө көйөд. А сирыс кыз тай ыпкөбтас — Мишалөн көйыс муртса эз мын кысыыс. Зон чорыда кабыртіс көвсө, и сирыс өдөбйивсыыс петіс косінджыкө. Сійө здукас Миша дорө буретш матыстчис өти салдат да вартіс черилы юрас беддөһ. Кыснаныс сатшөма сирысмы мышкас, юрсяныыс неылө. Буракө, та вөсна и ачыс петіс берегас.

Сирсө Миша катөдіс столөвөяс. Сэні веситісны да, лои матө дас кило, а кузтыаыс метра саяс.

Аскинас старшина вайис Мишалы бур шатин:

— Кужан кө, кый черитө меным, а ме тэнө зарядка вөчөмысь мезда.

— А оз кө кут шедны?

— Тшөтш пондан котравны.

Миша быд лун заводитіс кыйны чери. Öти асылө куим сирөс лэптис. Миша өтарө шензис, чериыс некыз оз чин да, көть эськө өти местаысь кыйис кызыысь унджык сир. А нөшта сиръясыс тані эз усыласыны өта-мөд выланыс, кызди гортса ю-тыас. Коркө батыскөд кыбигөн Миша сутшкис ыджыд сирөс да лэптис пыжас. А чериыс, вөлөмкө, кык бөжа. Батыс весиг пернапасасис весьөпөрөмысла. Дерт, бөрыннас гөгөрвоисны, мый өти сирыс нылыштөма мөд сирөс. Кор керисны сійөс, мөдыслөн юрыс эз нин вөв, а бөжладорыс свежөй. Сэтысь пулісны юква да бура на и чөсмасисны.

Рытъявылыс Мишаөс корисны комбат дорө. Миша, дерт, повзис, өд прөстаысь оз корны. Тотшкөдчис да пырис кабинетас, висътасис:

— Төварыш майор, радөвөй Гудыров воис тіян тшөктөм серти.

— Чолөм. Пуксыы джек вылас, сөрни эм,— шыасис командирыс комиөн.— Ми тэкөд землякъяс. Тэ көні чужлін?

— Сыктыв районын.

— Ме Луза дорын, бать-мам и чой-вок сэні олөны.

— Менам гортын бать-мам да чоя-вока жө колины.

— Кывлі, чери пө бура кыян. Гашкө, вөравлін и?

— Ичөтсянь вөрала. Первой батькөд, сэсса өтнам.

— Гырысь зьверъястө кыйлін жө?

— Кыйлі. Йөраөс.

— Сідзкө, тэ порсьөс кужан начкыны и кульны?

— Кужа, абу өд сера удж. Вөлі кө пурт и отсасыысь.

— Отсасыысыяс лоасны. Ме висътала, кор начкыныс.

Субөта асылө Мишаөс бара корисны штабө. Сэтчө жө воисны коми зонъяс Петя да Максим, кыкнанныс Луза дорысь. Комбат пыдди на дорө матыстчис старшина, сетіс Мишалы винтовка, вит патрона обөйма да шуис:

— Таысь кутан кывкутны. А тайояс тэныд отсасысьяс, вö-
ралысьяс жö.

И нуöдiс найöс комбатлөн керка дорö, чукöстiс кöзьяйкасö,
вайöдi пö уджалысьястö, и мунiс.

Комбатлөн гöтырыс латшкöс тушаа, гöгрöсиник еджыд чужö-
ма, ар комын вита. Дзик коми крестьянка, сиктса нывбаба
кодь. Паськöмыс няйт, быттö картаын ноксысьлөн. Но юрсисö
лöсьöдöма мичаа, карса моз.

— Менö шуöны Галина Семёновнаöн,— шыасис сийö зонъяс
дорö.

Зонъяс висьталiсны жö нимъяснысö, и Миша корис петкöдлы-
ны гидсö да начкысянiнсö. Галина Семёновна нуöдiс найöс керка
мышкас. Сэни сулалiс ыджыд гид, а сы водзын — гырысь идзас
кодь толичöн вольсалöм йөр. Вольöс вылас куйлiс вель ыджыд
порсь — быдсөн чуймис да юалiс:

— Порсьыд чеччывлö оз?

— Оз ёна. Лок пыравлам керкаас, пуртъяс да чер сета,—
вочавидзис Галина Семёновна.

Керкаас кöзьяйка сетiс Мишалы вежсян паськöм, кык пурт
да чер. Пуртъясыс вöлины ныжöсь, и Миша нöшта корис зуд
да юалiс:

— Вирсö босьтны али муас лэдзны?

— Мыйла нö вирсö босьтны?

— Миян тазйö лэдзöны, солалöны да пöжалöны. Вир мускөн
шуöны. Начкигас ачыд петавлан?

— Ог, ме садьтөг пола чилзöмсьяс.

Миша петiс гид дорас. Порсьыс кыдзи куйлiс, сiдзи и куйлö.
Миша пондiс велöдны начкысьясöс:

— Мыйöн матыстчам, öтиыд лöсьöдчы бöрладорас да кут
бöрса коксö, а мöдыд — воддза коксö. Ме личка порсьсö, вун-
да горшсö. Верма кö, вийöда тазйö вирсö.

Зонъяс пырисны йöрас. Порсьыс кыкысь рукöстiс, и куим-
нанныс пыр жö водiсны сы вылö. Порсь öдöбсьылис эськö чеччы-
ны, но вöли сёр нин: сылы голяас сатшкысис кузь пурт. Джын
вирыс, дерт, петiс бокö, но век жö таз джынйыс лоис.

Миша корис пыравны Максимöс керкаас, вайны ведра шоньд
ва да сов. Бöрыннас мыськис кисö, кисьтыштiс вир пиас совсö
да тшöктiс гудравны, мед кöмökъясыс эз кольны.

Петя отсасис Мишалы кульны. Кыкнад кык часөн и «пöрччö-
дiсны» ыджыд порсьтö да куас öти розь весиг эз вöчны. Шоньд
поводдя да, сийөн жö-а: кийд оз кынмы и тэрмасьнытö оз ков.
Сювсö лэдзисны ыджыд жöч ворйö — лои дзик вор тырыс и
сэтшöм госа!

Миша тшöктiс Максимлы пыравны керкаас да корны кöзьяй-
каыслысь дозъяс. Войöдзыс öд огö пö кутöй танi легны, кынöмöс
нин нюкыртö. Регыд мысти Максим локтiс бөр, но эз öтнас.
Кöзьяйкаыслөн нылыс петкöдлiс зонъяслы, көнi куйлöны тазъяс,
бакъяс да ведраяс. Миша торйöдiс порсь юрсö, а рытнас нин,
кор комбатыс локтiс гортас, юалiс сылысь:

— Сювнас нö мый кутанныд вöчны?

— Шыбитны! Мый сийөн вöчан?— вочавидзис Кирилл Ива-
нович.

— Тані жö кык ведра гос лоö. Позьö торйöдны госсö сьов дорсьыс да сывдыны. И мышку вывсьыс тшöгсö.

— Лок ме бöрся.

Гид саяс мунöм бöрын комбатыс шуис Мишалы:

— Аски мунам Кандалакшаö. Сэні йöзыс тшыгъялöны да, яйыд налы ёна колö. Кинад нетшкасны. Тшöгсö вундав мича торъяс вылö. Яйсö сэні кералам. Ставсö и нуам, гортö нинöм огö кольöй, юрсö ни коксö. Мöд тöлысяс начкам нöшта кык порсь.

— Начкысигас яйсö весиг он жаритлöй?

— Огöй. Но кöсьян кö, вунды мыйта колö да жаритасны. Максимлы да Петялы ме сьöмөн мынтыся и лэдза казармаö. А тэ тані узян: яйсö помöдз колö лöсьöдны. Аски миянкöд ветлан Кандалакшаас, отсалан вузасигас.

Комбат пырис керкаас. Миша бöр босьтчис уджö, пондiс вундавын тшöгсö пластьясөн, а Максим зыралiс солөн, тэчис ящикö. Татшöм кыз тшöга порсьтö Миша эз на аддзыв: мышку вылас — дас сантиметрысь на кызджык. Кык ведра тыр кулис пытшкöс госсö. Петя торйöдiс кокъяссö, крукъясөн öшлiс көбрегас. Туша яйсö сэтчö жö öшöдiс.

Медбöрын зонъяс солалiсны кучиксö пытшладорсянныс, топыда гартiсны да көбрегас жö нуисны. Ставсö идралiсны, мыс-сисны да пырисны керкаас. Кöзаяйкаыс ваялiс пызан вылас юква, жаритöм, а сэсся сола чери. Кисьталiс стöканъясö гöрд вина. Комбатыс сетiс Петялы да Максимлы дас вит шайтөн да тшöктiс мунны казармаас. А Михаил пö татчö кольчылас отсасыны, старшинаыдкöд пö менам сёрнитöма нин та серти.

Петя Максимкöд мунiсны. Кирил Иванович тшöктiс нылыслы отсасыны Мишалы да тшöтш кытчöкö мунiс. Миша петкöдiс нывкöд көбрегсьыс ыджыд пöрт, öшöдiс мöтыр йылö, улiас биасис. Ныла-зонма дорö матыстчис Галина Семёновна, вайис банкаяс:

— Сывдöм госсö кисьталöй банкаясö, тшöтш вузалам. А юрсö да кокъяссö чишкалöй. Век нин сьöмтор воас. Сiйö тай некор оз тырмы.

Мамыс мунöм бöрын нылыс броткыштiс:

— Быд кыв сылөн сьöмö зурасьö. Мамöй көсйö саридз дорö овмöдчыны, мича керка лэптыны да сад лöсьöдны, и мед садъяс быдпöлöс вотöса пуыс быдмис. Со и арталö быд ур. Вай көть тöдмасям. Менö Нинаөн шуöны. А тэнö?

— Мишаөн. Нина, петкöд меным ыджыд бекар да кузь воропа дар. И кушенча гоз колö: киöс öд сотны кутас. Банкаыс на оз тырмы дай. Абу кö лишнöйыс, позьö ведраö кисьтавыны.

Миша разöдыштiс пöрт увсьыс бипурсö. Öгыр вылас пуктiс порсь юрсö да кокъяссö. Нина вайис көрт чепöля: сэтшöмнас бисьыс кыскавлöны самöварö шом. Нина перйис чепöлянас бисьыс порсь коксö да пöв пом вылын зыртiс пуртөн чишкасьöм гөнсö. Став коксö да юрсö чишкалöм-зыртöм бöрас мыськис пöсь ваөн. И найö лоины бумага кодъ еджыдöсь.

Миша видзöдiс-видзöдiс Нина вылö да и юалiс:

— Нина, а тэ радейтан жаритöм яй?

— Миян оз жаритлыны да.

— Кöсьян кö, вöча шашлык.

— А мый сійö сэтшöмыс?

— Аддзылан. Меным колö метра джын кузъта сутуга, поэö и кузъджыкöс.

— Гид сайын уна эм. Сэни и дорччан эм. Лок петкöдла.

Миша вöчис сутугасыс кык шампур. Чиг яйсö вундаліс пöв пом вылын, пызйыштіс солөн. Ниналы тшöктіс корсьны кык кирпич. Ачыс чабраліс солыштöм яйсö, пысавліс шампурас. Чу-кöртіс öтилаö жар öгырсö, сувтöдіс кирпичьяссö öтар-мöдар боксянныс да пуктіс на вылö шампурьяссö. Яй торьясыс регыд и кутісны чишкыны. Миша кадысь кадö содгышталіс шомсö да бергöдліс шампурьяссö, медем яйыс эз сотчы.

Шашлыксö вöчны Миша велаліс гортас. Вöраныс восьтöм выль лесопунктö вайисны Кавказысь йöзöс, да налысь аддзыліс, кыдзи яйсö жаритöны. Гöрд винаөн на кисьтышталöны и, чöскö-дöм могысь. Миша корис жö Ниналысь гöрд вина да быд яй тор вылö войтöдіс сійöс.

Кор госыс кутіс булькйыны, Миша вештыштіс пöртсö бипур весътсыс, пуктіс джек вылö ыджыд бекар, сы пытшкö — литрö-вöй банка, босьгіс шуйга кинас блюд, веськыднас — дар, и дарсö блюд весътас кутöмөн кисьталіс госсö банкаясö. Сёрөн-джык видзöдліс яйсö да шуис:

— Нина, шашлыкыд дась.

— Сідзкö, ме öтисö гортö пырта да мамкöд сёям.

Регыд мысти Нина бөр петіс, вайис стöкан джын водка да яй. Чöскыда и кылаліс Мишалөн шашлыкыс водка сорнас. Сэс-ся ныла-зонма куралісны пöртйысь сывдöм госсö да тэчисны ведрö. Та бöрын Миша пöрччысис коскöдзыс да зыраліс асьсö майтöгөн, а Нина киськаліс сійöс кöшысь. Зон вежис паськöмсö да пырис нывкöд керкаас. Комбат, буракö, важөн нин волöма: узис диван вылас. Мишалы тайö дивö кодь лоис: начкисны порсь, а кöзяиныслы веськодь.

— Пуксьы, Миша, да шойччышт,— петіс пыді жырсый Галина Семёновна.— Час, пызан лöсьöда да ужнайтам. Чеччы, кöзяиныс, ужнайтны кад.

Кирил Иванович пуксис, тільыштіс синсö да нурбыльтіс:

— Талун мыйкö ёна мудзи, да асывсянныс и висьöдö.

— Врач дорас эн пырав?— тöждысяна юаліс гöтырыс.

— Жарыс абу да.

— Пуксьöй да сёйöй,— пызан вылö сёян вайигмоз корис кöзйяка.— Аски бара сьöкыд лун.

— Автобусөн аски мунам. А талун поэö дарьясьыштны начкысьöм кузя. Михаил, кöнкö, ёна мудзин?

— Мудзис, дерт,— кайтыштіс Галина Семёновна.— Ставсö сэтшöм öкуратнöя вöчис. Ми сювсö век шыбитам, а сійö торйö-діс сювсьыс госсö, сывдіс. Миша, мыйта лоис госыс?

— Дас литрöвöй банка да малированной ведра,— вочавидзис Миша.

— Аски тшöтш, сідзкö, нуам да вузалам.

Ужин бöрас Миша петіс куритчыны. Нина — сы бöрся. Вель дыр пукалісны пелысь пудорса лабич вылын, кытчöдз Галина Семёновна эз чукоств Мишаöс:

— Гашкö, сарайö водан? Сэни вон зэвтöма.

— Вода. Ме öд гортын сарайын жö узылывлі.

Асывнас Мишаос пальодіс көзайкаыс, сетіс сылы гражданскөй паськөм да шуис, ковмас пö верöстөг вузасынысö ветлыны, висьмис да.

Регыд мысти воис автобус. Миша муртса нуръясыштны сөмын удитіс. Галина Семёновна восьтіс автобус öдзöссö, вольсалис джоджас брезент да тшöктіс Мишалы тэчны сы вылö яйсö да гос тыра банкаяса ящикъяссö. Автобус вөрззыліс нин, но Нина виччысытөг горöдіс:

— Вескитö öд вунöдім! Миша, лок ваям.

Вескила ветлігөн Нина юалис зонлысь:

— Миша, тэнад невестаыд эм?

— Эм. Виччысьны көсийс.

— А кыдзи нимыс?

— Настук.

— Ёна радейтан?

— Кажитчö.

Та бöрын Ниналөн руыс вежсис, мелілуныс вошис. А автобусас эз и шыасылы. Коркö сэсся воисны базар дорас. Миша шемöсмис, некор на эз адзыв татшöм уна йöзсö öтчукöрын да. Мазі поз быттö. Автобусыс сувтіс неыджыд, но зэв мича керка весьтö. Галина Семёновна пырис сэтчö. А Миша нуöдіс Нинаос вузасынінö, ньöбис кык мороженöй. И чöсмасигмоз найö бөр мунісны автобуслань. Вель дыр сулалісны сы дорын. Коркö сэсся Галина Семёновна петіс керкаысь сьöд морткөд. Сьöд мортыд пырис ськөд автобусас, видзöдліс вузöссö да шуис:

— Ме босьта сöмын яйсö,— да висьталіс донсö. Но Галина Семёновна чорыда крапкис сылы:

— Босьтан кө, ставсö öти донысь босьт. Он кө, мөдъяслы вузала: кийөн нетшкасны.

— Чöвлы, чöвлы,— шызис сьöд мортыд.— Ставсö ньöба. Сöмын госсыйс, юрсыйс да кокъяссьыс донсö чинтыштам.

— Ставсö öти донысь.

— Ладнö, босьта ставсö. Но тайö лоö кучик кульöм.

— Тэ быттö донтöм донысь вузалан. Ме кө кучик куля, тэ куимöс кульыштан. Думайтан, ог тöд али мый?

— Меным öд быть донсö лэптыны. Сөйны жö öд колö.

Бöрсö мунігас Галина Семёновна зэв ёна радліс да паськыда нюмъяліс, сылышталіс. И весиг шоперыс кутіс бугжылясьны сы вылö. А Нина яндзимысла зілис видзöдны мөдарö. А сэсся пуксис Миша дорö да пондіс дзоргыны öшиняс, гусьöник кутыштис зонлысь кисö да мунігчöжыс сэсся эз лэдзлы.

Мыйөн машинаыс сувтіс горт дорас, Галина Семёновна нывка моз чиктылігтырйи пырис керкаас, а Миша да Нина пыртлісны тыртöм банкаяс, кодъясöс ньöбисны базарсьыс мөд порсь начкигкежлö. Шоперыслы сетісны дас шайт, и сійö муніс. Миша вежис паськөмсö да пуксис кильчö вылас. Регыд мысти сэтчö петіс и Кирилл Иванович.

— Тöварыш майор, поэö меным мунны казармаö?— юалис сылысь Миша.

— Оз на. Тэ жö пывсытөг колин, а ме пывсян ломті. Пывсян да узян тані, аски асывнас и мунан.

Комбатлөн пывсяныс зэв бур да пельк, абу Мишаслөн кодъ сьöд. Жарнад Мишаос он вен. Мөдарö на, Кирилл Ивановичлы

ковмис лэччыны уліас. А сэсся сійо корис Мишаос ывлао ыркөдчыны. Нуодіс лыаон киськалом трөпаод неыджыд гөгрөс ты дорө. Берегыс метра куим судта, ва дорас лэччө сера пос. Комбат висьталіс:

— Джудждаыс метра дас вит лоас. Шөрас нөшта на джуджыдджык. Сунан да, эн повззы: ваыс көдзыдкодь, ключьяс, буракө, петоны. А он кө көсйы, эн пыр дай.

Тайо кывъяс бөрас сійо суныштіс ваас. Миша — сы бөрся. Но көдзыдысла лолыс быттө потшсис, а сьолөмыс дугдыліс тіпкыны. Кучикас быттө сюрс ем сатшкисны.

— Пет васьыс, первойысьтө тырмас,— кыліс комбатлысь гөлөссө.— Ёна көдзыд?

— Ы-ы гы-ы,— кывйыс эз артмы Мишалөн.

Кирилл Иванович гылыда серөктіс:

— Велалан да, бур лоо. Первойысьтө кажитчө ёна көдзыдөн. Төвнас тані лөсьыд сунавнытө: сынөдыс көдзыд да, ваас шоныдджык.

Комбат да Миша бара пырисны корөсясьны. Но ыркөдчыны тыад Миша сэсся эз нин смелмөдчы. Сэтшөм көдзыд ваад вермас и коктө көрны, да вөйны абу дыр. Мишалы уси төд вылас, кызди тыыс ачыс йөктыштіс сійос ва веркөсас, да шуис Кирилл Ивановичлы:

— Кор суні, менө быттө кодкө бөр йөткыштіс веркөсас.

— Тані он вөй.

— А ме повззылі, мися, кокөс кө көрас, из моз дзумгыся ва пыдөсас.

— Ме некымынысь нин видлі гожөмнас пыдөсөдзыс воөдчыны, да некыз ог вермы. Коркө ыджыд изйөн сунлі, но пелям чунгыны кутіс да, бөр лэдзи изсө. А шондіа лунө пыдөсыс тыдалө.

Пывсьөм бөрын найо бара на ыркөдчисны ывлаын пелысь пудорса лабич вылын да варовитісны. Бөръяпомыс комбат шуис:

— Тані тэ кык төлысь на лоан, а меным кык порсь на колө начкыны да яйсө вузавны. Тэ и кутан начкыны.

— Кирилл Иванович, ме эськө начка, но, бога ради, вузасьны энө мөдөдөй.

— Гөгөрвоа. Ачым сьмерт жө ог радейт гөтыркөд лавкаө да базарө ветлыны. Но мый вөчан, быть кө.

И Миша гөгөрвоис, мый комбат ылөддөма найос висьөмнас. И мый сылы бара на ковмас ветлыны вузасьны. Командирыдысь быть лоо кывзысьны.

* * *

Мишалөн службаыс муніс бура. Воөмсяньыс колис төлысь да джын. Тайо каднас Миша начкис комбатыслысь кык порсьос. Тшөкыда аддзысьліс Нинакөд. Мича лунө найо пукавлісны ты дорын да быдтор йывсьыс варовитісны.

Өтчыд Миша локтіс нуөдны Нинаос гуляйтыштны и кыліс керкасьыс зыксөм — сы вөсна зыксисны.

— Миян нывлы деревняса мужланыд оз ков,— горзіс Галина Семёновна.— Ме петавлі сержант сайо, а олөм чөжнад майорөдз сөмын и кыптін. И тіян Мишаыд сідз жө: деревняыд деревня и эм.

— А тэ нё кысь петін? И мыйёдз воин? Горш деревенскöй баба. Тэ дорысь öнөдз на куйөд дукөн öвтö,— воча шуалис Кирилл Иванович да крапкис керка öдзөссö. А регыд мысти мыччысис кильчö вылас. Миша муртса и удитіс вешйыны öдзөс дорсьыс. Комбат тэрыба лэччис поскöдыс да шавксöдіс гарнизонлань. Сійö скöрмис гöтыр вылас, öд Миша ёна воис сылы сьölөм вылас, пи пыдди и видзис. Öд тöдіс, мый пиыс сьölөн некор нин оз ло.

Дас сизим во сайын Кирилл Иванович помалис военнöй училище. И выпускнöй бал вылын аддзысис гöгрөсіник чужöма дас сизим арöса Галякöд. А регыд мысти нуис том гöтырсö ылі вой-вылö. Во мысти налөн чужис нывка, нимсö сетісны Нина. Нина-лы арöсыс на эз тыр, Галина бара кызіс. Кирилл помтöг нимко-дясис, чайтіс, чужас пи, лоас рöдпом нюжöдысь. Но регыд мысти налы ковмис янсавны: Кириллöс куим тöлысь кежлö ыс-тісны командировкаö. Мунтöдзыс сійö öлөдіс гöтырсö:

— Ме сёрнитчи Öльга тьöткöд, сійö кутас отсасьны тэныд. Сьöкыдсö нинөм эн вöдит, мед дзöлюкыд лючки сөвмас да чужас.

Коймöд тöлысь помас нин сылы воис телеграмма: «Срочно приезжайте, с женой плохо».

Кирилл Иванович котöртіс штабас, петкöдліс телеграммасö, и сійöс нуисны военнöй самолётөн аэродромöдзыс. Гортас воен-врачыс висьталіс Кирилл Ивановичлы:

— Тöлысь сайын воліс ме дорö Галина Семёновнаыд, корис вöчны аборт. Ті жö тöдад, кутшöм стрöг законыс та кузя. Ме и шуи сылы, мый оз позь тайöс вöчны. Та бöрын сійö мунöма кутшöмкö бабитчысь дорö, да мöдыс и перйöма. Сійö бабасö пуксьöдісны нин. Гöтырыд вирсö уна воштöма, и ковмис вöчны операция. Сэсся челядьыд тиян оз ло.

Тайöс кылөм бöрын Кирилл Иванович муртса садьсö эз вошты. Сійö шуис торйöдчыны гöтырыскöд и öтчыд эз ветлы видлыны сійöс больницаас. Кык тöлысь мысти Галинаöс лэдзисны больничасыс, но гортас локтөм бöрын некодöс сэтысь эз аддзы: быдлаын бус да ёг, быттö некод оз ов. Сійö дыр сулаліс патера шöрас да эз тöд, мый вöчны, кытысь корсьны верöссö да нывсö. Öд гөгөрвоис, мый Кириллыс ёна дöзмöма сы былö. Но век жö чайтіс, мый верöсыс регыд бөр небзяс да локтас гортас.

Галина пондіс пелькöдчыны патераас. Кор помалис, восьтыліс көлуй шкапсö да видзöдліс дзевассö: сэні вöлі вель уна сьöм. Галина кокниа ышловзис: буракö, тöждысьö на сы понда верöсыс. Сійö ветліс лавкаö да ньöбис прöдукта. Сэсся пусис да кутіс виччысьны верöссö. Гашкö пö, тöдмалас больницаысь петöмöс да волас?

Кирилл локтіс мöд лунас. Но кагатöгыс. Галялөн сьölөмыс ыркнитіс:

— Көні нё кагаыс?

— Кутшöм кага йылысь нё сёрнитан? Кодöс эновтін? Али кодöс начкин?!

Галина ымöстіс да усис джоджас. Верöсыс эз матыстчы сы дорö, сöмын шуис:

— Ме тöда: тэ артиставныд кужан, и менö тайөн он ылöд. Чукöрт көлуйтö да мун гортад.

Галя звиркнитіс-чеччис, быттё сійёс тойыштіс джоджыс, да дульсё резёмён горөдіс:

— Тэ менө көсян вөтлыны? Оз артмы: ме босьта ассым кагаос да муна командир дорад.

— Мунан кө командир дорө, тэнө судитасны кага виомсьыд, дас во кезлө пуксьодасны.

Кирилл сэсся эз вермы нинём висьтавны да петіс патера-сьыс. Скөрлуныс быттё чиныштіс, но век жө мужичөй лөгаліс на гөтыр вылас. Кирилл бөр муніс удж вылас да шуис пыравны командир дорас. Командирыс сёрнитіс веськыда:

— Сетан кө торйөдчөм вылө шыөдчөм, быть юаласны, мыйын помкаыс. Ковмас висьтавны. Сэки гөтыртө збыльыс вермасны судитны, а нывтө босьтасны челядь керкаө. Сэки и нывтө верман воштыны. Бура думышты.

Тайө сёрни бөрас Кириллы ковмис бурасыны гөтырыскөд. Но на костын гураныс сідзи эз и тупкысь. Көть и коліс нин сэксянь дас сизим во, век на ыркнитлө сійө кадыс көдзыд лов шыөн.

Имандра ты дорө найө овмөдчисны сизим во сайын. Галина Семёновна тані и петкөдліс кужанлунсө. Кыдзкө чуктөдіс ыджыд керка. Пачас вөчөдіс ва шонтан бак, быд жырйө лөсьөдіс батареяяс. Салдатыс ваялісны керьяс да тшуписны карта. Пилитчан заводсьыс сетісны тьөс-плака.

Кирилл Иванович эз юась ни эз көсйы төдны, кутшөм сьөм вылө ставсө лөсьөдө гөтырыс. Коркө кад Галина Семёновна ньөбис кык энъ да ай порсьпиянөс, сэсся чипанъясөс. Со нель во нин видзө кык энъ да өти ай порсьөс. Порсьясыс онас кыкысь пиянасьоны да вайоны вель уна порсьпиөс. Эм, мый начкыны да вузавны.

Миша өтчыд юаліс Ниналысь:

— Кысь нө сёяныс сы мында порсьыслы?

— Часьтад нө ті став сёянсө бырөдланныд?

— Ог төд, Кольө жө, көнкө.

— Öти салдат ваялө мянлы сёян коляссө кык бөчка тыр, тырмө став порсьыслы. Аддзылін өд, көнкө, сарай боксьыс лэбувсө. Сэні сулалө кык ыджыд бөчка. Салдатыс сэтчө и ректылө. А мамө сэсся ведраөн новлө порсьяслы пөртъяныс. Тайө сёян колясыс кө оз тырмы, вердам өтрубөн да пуём шыдөсөн.

— А лишнөй порсьпиянсө кытчө воштанныд?

— Тані посёлоксаясыс ньөбөны, и Кандалакшаө нуам.

— Сідзкө, тэ озыр невеста. Кор ме начки первой порсьтө да тшөтш ветлі базарас, порсьыс кыскис кыксө кило сайө. Сыысь сетөм сьөм вылас позьө ньөбны «Запорожец». А онас вузаланныд дас кык порсь. Да батьыдлөн на абу ичөт удждон. Самолёт нин верманныд ньөбны. Да оз тай вузавны самолөттө.

— Чайтан, меным тайө колө? Ньөти оз. Велөдчөмөс помала да, вөйыся уджавны му мөдар помас. Батьөй сөмын жаль, сійө зэв шань морт... Миша, тэ меным кутан гижны?

— Менам өд невеста эм. Кыв сетім өта-мөдды... Но ме тэнө радейта жө.

— Быть мөй гижны радейтөм йылысь. Эм жө прөста ёрта-сьөм. Со и кутам ёртасыны письмөбасьөмөн.

— Менө батьыд корө татчө кольчыны служитны.

— Вöскресенньö кöсья ветлыны мырпом вотны. Ветлан тшöтш тöварыш пыдди? Ме кора батылысь, мед тэнö лэдзласны.

— Кыкөн кö, ветлам.

— Кыкөн, дерт. А гашкö, субöтанас мунам, узям сэнi?

— Узьöмнад тэнö оз лэдзны.

— Код нö менö кутас? Мамлөн юрас сöмын сьöм. Батьöй оз и тöдды, мый войколөн мунам, талун командировкаö мöдöдчö да, дас лун оз ло. Босьтам сьöрсыйным мелкашка*.

Субöта асылö Нина шуис мамыслы:

— Мам, ме ветла Кандалакшаö, аски рыт бöр локта.

— Ветлы.

Мишаöс лэдзисны жö часьтсьыс: Нина сёрнитчис батыскöд командировкаас мунтöдзис, мед тшöктас старшинаыслы лэдзлыны Мишаöс шоччан лунъяс кежлас, гортас отсöг колö да.

Ныла-зонма дас верст мунисны шойчывтöг. Воисны вель джуджыд гöра дорö. Пожöмъяс улын тыдаліс морт нёлылы тöрмөн чом. Неылын — бипур места.

— Тані и узям,— нопсö пöрчигмоз шуис Нина.— Пыр тані узыывлам. Пескыс уна и ваыс матын.

— Тшöкыда мöй волан татчö?

— Быд во. Тайö каднас мырпом вотам, сёр арнас — турипув. Дерт жö, кыям юква вылö чери.

— Чери?— чуймис Миша.— Тані мöй эм жö, кытысь кый-нысö?

— Тані уна ты. Но ми кыям шорсьыс гöрд чери — форель. Вай öнi и ветлам вуграсьыштны. Узыны кö нин, небыд вольпасын да чöскыда сёйöм-юём бöрын. Войыд гажаджыка коляс.

Нина виччысьтöг сывйыштіс Мишаöс да чупыштіс бан бокас. Зон виччысьтöмысла шай-паймунліс, а сэсся топöдіс нылös ас бердас да пöся пондіс окавны. Но Нина мынтöдчис сывсьыс да небыдика курччис Мишаöс пельöдыс:

— Тайö тэныд пас лоö, мед он вош. Тадзи бабöй ыжъяссö пасъявлö,— да серöктыштіс. Сэсся ректіс став көлуйсö öти нопъяс да öшöдіс пожöм вож вылö. Миша пасьталіс тыртöм нопсö, босьтіс мелкашкасö. Нина босьтіс тuis да чуман и метра кык кузъта вöсньыдик бедь. Сы помын чурвидзис метра джын кузъта, вугырлөн кодъ «тошка» пома сутуга. Миша эз тöд, мый татшöм бедьнас вöчöны, но юавнысö яндысис.

— Мöдім, Мишук, кынöмпöt корсьны. Гашкö, регыд пötка сюрас. Сöмын сямтö бура петкöдлы.

Ныла-зонма лэччисны ньывкöсінö да пыр жö кыпöдісны таръясöс. Лэбачьяс пуксисны пу вожъяс вылö.

— Лый сöмын кыкös, сьöдъяссö,— велöдіс Нина.

Миша бура метитчис да кыкös и уськöдіс. Нина ошкыштіс сійös:

— Молодеч, бура лыйсян. Тöдчö, мый вöравлöмыд. Но, мунам сэсся вотчыны, тшöтш и чери кыйыштам.

Регыд мысти найö воисны нюр дорö. Мишалөн син водзас кутіс пöртмасьны: мусö быттьö эжöма гöрда-вижа рöмөн. Мыр-помыс, вёлэм, сэтшöм уна.

— Чуманас вотам вижöдны заводитöм мырпомсö, а тuisас

* Мелкашка — ичöt калибра винтовка.

воёмсö,— висьталіс Нина, а сэсся юаліс:— Тэ радейтан вотчы-нысö?

— Сöмын вомö.

— Сідзкö, мунам шор дорас. Тэ чери кый, а ме вотча.

Шорыс, вöлөмкö, зэв визув, но шöртійс паськалö да абу сэ-тшöм визув, гöптакодь. Нина водіс шорвесьтса куст улö да ку-тіс ноксьыны сутугаа бедьнас. Регыд мысти чеччис да петкöдліс кыйдöссö: сутуга помас пессис весьтысь кузьджык чери. Нина мыччис бедьсö Мишалы:

— На тэ кыйсьы, а ме вотчышта.

Мыйта Миша эз кыйöдчы, öти чери сöмын и вермис сутшкы-ны. И эз гöрд чери, а ком. Муніс Нина дорö. Чуманыс вöлі тыр нин. Ныв индіс чуньнас сутуга йылын бовъялысь ком вылö да юаліс:

— Тайö и эм кыйдöсыд?

— Черитö ме некор беддьөн эг зурöдды.

— Сідзкö, туйссö тыртам кыкөн, а бöрас öтлаын черисö кыям.

Вотчöм бöрас найö колисны чуман-туйссö кос йыла пожöм улö. Нина велöдіс Мишаöс:

— Аددзан уна вожа пожöмсö? Каян сы дорöдз да керыштан вöсни кызд пу и заводитан вöтлыны черисö. Посни чериыс кө оз лэччы, мед, а гырысьсö став гöпткодсьыс вöтлы. Ме кута виччысьны уліас.

Миша пöсјавтöдзыс кайис пашкыр пожöм дорöдзыс. Керыштіс кызд пу да матыстчис öти гöп дорö. Сэтысь казяліс куим ыджыд чериöс. Мыйöн зургис кызд помнас гöптас, уйкнитісны ва ньы-лыдыс. Тадзи Миша вöтліс черисö гöпттысь гöптö. И ёна шемöс-мыліс, кор чериыс вывлань мöдöдчыліс да чеччыштліс гöпсянныс вылыс тшупöдас, ва усянінас.

Бузöдчигтыр Миша лэччис шор пöлөн. И нем виччысьтöг казяліс турун вылын куйлысь Нинаöс. Ныв видзöдіс сы вылö да нюмъяліс. Миша джöм сувтіс. Но Нина горöдіс:

— Вöтлы водзö, вöтлы. Бөр öд пышъяс чериыд.

Сэсся чеччис да босьтіс Миша киысь зорсö, пондіс ваас швачöдöмөн вöтлыны черисö. Мыйöн воис местаöдзыс, шыбитіс зорсö да матыстчис Миша дорö, сывйыштіс сьыліöдыс, пöсја окыштіс да вашнитіс:

— Мусукöй тэ менам, пöсјавмöныд мудзин? Регыд шойччам пöсь би дорын да небыд вольпасын. А öні черитö колö ректыны.

Миша юаліс дöзмöм гöлөсөн:

— Кутшöм чери? Важөн нин, кöнкö, тыöдзыс уйс.

Нина кыскис зонмöс шор дорас. И Миша кывсö воштыліс чуймöмысла. Ваыс усьö метра судгасянь, а ва усянінас кузь майöг вылын öшалö вöсни сутугаысь кыöм көрзина. Вылісянныс ваыс усьö көрзинаас, а ваыскöд тшöтш и чериыс. Көрзинаас гыбзис уна чери.

— Ме чайті, смекайтчан-а,— сјурис кывйыс Мишалы.— Прöста тшöктан васö гудравны.

— Ог жö кут смекайтчыны аслам мусук вылын,— серöктіс Нина.— Вудж мöдарас, майöг помъясöдыс кутöмөн лэччöдам гöп улöдзыс, да сэтөн вуджан талаас.

Ныла-зонма лэптісны көрзинасö берегас. Посни черисö Миша

перьяліс да шыблаліс ваас. Нина вайис чуман, кык пөвпом, да кыкнанныс пуксисны керны черисö.

— Чöскыд и закусь лоас,— радліс Нина.— Тэ тöдан, ме öд чери гаг. Ок и радейта сола черитö! А тэ радейтан?

— Ме ёнджыка яй радейта, яй вылын быдми да.

Бöрыннас найö пестісны чом дорас бипур. Миша кульыштіс тарыслысь кучиксö да шыасис Нина дорö:

— Мыйын нö пуам тарьястö?

— Куштыны на колö.

— Ме кушті нин.

— Ко-о-ор нö удитін?

— Ме вöрад пыр кучикнас кульышта.

Нина нүöдіс Мишаöс пашкыр коз улö, сэнi пö дзебас эм. Вештыштіс нитшсö — мыччисис öдзöс. Нина лэптiс öдзöссö да пырис гуö, мыччис сэтысь важиник вата перина, шебрас, сьöд ведра да чайник. Чайник пытшкас мыйкö голькмуни: буракö, кружка-пань. Сэсся Нина бөр лöсьыда тупкис дзебассö да нуис бипур дорас Мишакöд перьялөмторьяссö. Ачыс босьтчис пусьыны, а Мишаöс бара на ыстіс вöралыштны, аски кежлö пö колö.

Миша нопьясис, босьтiс мелкашкасö да муніс шор саяс. Дум вылас уськөдіс чужан пармасö да орччөдіс татчөс вöрыскöд. Комиад видзөдлан пожом вылас, да шапкаыд усьö. Пожом көть коз, джуджыдсьыс-джуджыдöсь. А тані пожом діныс кык сывъя, но судтаыс весиг дас вит метраыс оз ло; туганыс зэв пашкыр, увъясыс дженъыдöсь, но зэв кызöсь. Комиад эськö шуисны, вöрыс пö латшкөс.

Мишалөн кок улас мыйкö рутшмуни. Дона гоб вылö тальччиссьöма. Миша бурджыка видзөдліс гөгöрыс да зэв уна дона гоб казяліс, быттö зэрöм бöрын көтасьöм коръяс лөсталöны. Водзöсö сійö видзчысьöмөн нин тувччаліс, мед не таявны тшаксö. Воис увтасінö. Сэтысь кыпөдчис ыджыд тар чукөр да пуксис неылö пожом вылö. Мишалы удайтчис лыйны öтиöс. А чомланьыс лэччигөн нин кыпөдіс дозмөр котыр да лыйис жö öти вийөрöс. Мишаöс шензьөдіс, мый тар ни дозмөр тані оз ёна повны мортсьыс, öд станцияыс тасянь абу ёна ылын, йöзыс волеввлöны жö вотчынысö.

Кор Миша воис бипур дорас, Нина вöлі дасьтöма нин пызан: яйсö лэпталöма тасьтiö, вундалöма нянь, пуктöма сола чери да сулея. Миша шемöсмис:

— Чериыд мöй солассис нин?

— Тайö чериыс ком дорсьыд небыдджык, да öдйөджык и солассьö,— вочавидзис Нина, кисьтiс кык кружкаö шыд васö, перйис нопсьыс стöкан да мыччис Мишалы:— Восьты сулеясö да кистав. Тэ жö кавалер, пөтчуйт барышнятö. Стöканыс öти, да öтиысь и юам.

Миша кисьтiс винасö стöканас да мыччис Ниналы. Нина тотшнитіс стöканнас сулеяö да шуис:

— Ме юа Мишук вöсна, медым войыс миян лои шоныдджык да кыкнаннымлы шудаөн,— гуниктіс душ-мöдысь, кисьтiс винасö стöкан джынсьыс унджык да тшөктіс Мишалы юны пыдöсöдзыс. Сэсся ныла-зонма сёйисны шыд да чöсмасьыштiсны сола чериөн.

— Кынөмöй дундіс, пань тыр сёян оз төр,— пөрөдчис гатшөн Миша да малыштiс кынөмсö.

— Сідзкө, шойччыштам, а бөрас бара пуксьылам,— вөзйис Нина.— Тэ куйлышт, а ме вольсася. Шыд пыдөстө кисьт бекарө да ведранас ветлы вала. Өшөдам пуны дозмөртө аски кезлө.

— Но, час, ветла, сямөд тутур өзта да.

— Сямөд тутур кутшөмкө колас. Менам өд пөнарик эм.

Нина луйкысьыштіс ноп зептас да мыччис Мишалы пөнарик. Татшөмыд сөмын кок увсө и югзьөдіс, но конъясьөмысь позис видзчысьны. Миша босьтіс ведрасө да дозмөрсө и лэччис шор дөрө. Мыськис ваас яйсө, тэчис ведраас да бөр муніс чом дорас. Өшөдіс ведрасө мөтыр йылө, содтыштіс бипурас пес да пуксис турун вылас. Нина сэккості лөсьөдіс вольпасьсө да тшөтш пуксис Миша дөрө, сывйыштіс сійөс сьыліөдыс. Зон пөрөдіс Нинаөс да помся кутіс окавны.

— Колө чомъяс пырны, вильөдас өвадыс.

Найө колисны көмсө бипур дорас да пырисны чомъяс, тэрмасьмөн кулисны өта-мөд вывсьыс паськөмсө. Миша топыда сывйыштіс Нинаөс да юалис:

— Тэнад кодкө вөлі нин?

— Вөлі. А тэнад?

— Вөлі.

Ныла-зонма пөсявтөдзыс ворсөдчисны, сэсся пасьтасисны да петісны бипур дорас. Видзөдлісны шыдсө да лэччылісны шор дорас, пожйыштісны пөсялөм чужөмсө да кияссө. Бара сөйыштісны да юыштісны, шыд тыра ведрасө вештісны би весьтсьыс, тупкисны вевтөн, мед ном-гебйыс оз пыр, содтісны биас пессө. Нина тшөктіс Мишалы олыштны ывлаас, кытчөдз пө ог чукөст, да вайны бөрыннас сьөрссьыс яйтор, стөкан да сулея, а ачыс пырис чомъяс.

Регыд мысти Нина корис Мишаөс. Чом пельөсас ломалис сись. Нина куйліс дзик пасьтөм, а орччөн — дзоридзьяса прөстыня. Миша тупкис нылөс прөстынянас, пөрччысис улыс дөрөмгачөдзыс, водіс Нина бокө. Но ныв ачыс кулыштіс сы вылысь паськөмсө да шуис:

— Кисьт сизим грамм. Йирмөг кутіс босьтны. Тэ он жө шонты-а.

Войыс ныла-зонмалөн узьтөг и колис. Асьявылыс сөмын унмовсьылісны. Кор садьмисны, шондіыс вөр йылас нин вөлі өшйөма. Нина чепөльтіс Мишалысь нырсө да шөппнитіс:

— Мишук, чеччы, часьтад өд сөрман.

Но чеччөм пыдди зон топөдчис ныв дөрө. Найө недыр куйлыштісны на, сэсся петісны чомйысь, мыссисны шор дорас да пестісны бипур. Миша пысалис пуөм тарсө бедь йылө да пуктіс косьтыны бипур жар вылас. Кор яйыс банйис, гартыштіс газетө. Нина сэккості сюйис Миша нопйө мырпом тыра туиссө, пөткасө. Сола черисө тэчис клеёнка мешөкө да пуктіс аслас нопйө.

— Тшай юам да гортө мөдөдчам,— шуис Нина.— Аскомысь бара на волам нывъяскөд тшак вотны... Миша, төдан мый? Ме тайө войсө некор ог вунөд. А тэ?

— Ме ог жө. Сөмын дженьыд тай сійө вөлі...

— Гашкө, мөдысь на волам?

— Лэдзласны кө, радпырысь вола.

— Ме кө кора, лэдзасны. Батьлысь көть мый ог кор, ставсө сетас и ме ног вөчас.

— Тэ жö шуин, батыд командировкаын.

— Но и мый? Матыстчыла старшина дорад, и лэдзасны.

Гортас ныла-зонма воисны зэв мудзöсь. Миша пыртис нопъяс-сö сараяс да пыр жö мунис часьтас. Пыравліс старшина дорас юöртны воом йывсьыс. А старшинаыс казяліс сылысь мудз чу-жөмсö да пыр и ыстіс Мишаöс шойччыны. Комбат гöтыр дорысь салдатъясыс пö век шой кодъöсь воöны, абу баба, а Зьмей Горыныч...

* * *

Со и воис присяга лун. Салдатъяс асывсянныс пасьтасисны парадной формаö. Выль шынеляöсь, мича кителяöсь да картуза-öсь, яловöй сапöгаöсь да кучик тасмааöсь. Полковникыс сеталис салдат книжкаяс да присяга примитöм бöрас висьталис:

— Тиянлы уси шуд видзны чesьтсö сöветской салдат-победительысь...

Сёрöнджык Миша дорö матыстчис Кирилл Иванович да шуис сылы:

— Öнi тэ мунан мекöд. Сёрнитчам, мый вöчны тэкöд водзö. Тэныд татчö кольчöмлы эня-ныла паныдöсь. А ачyd мый шуан, окотитан он кольччынысö?

Миша восъаліс юрсö копыртöмөн, чöv оліс. Мый сійö вермис вочавидзны комбатлы? Нинöм.

Нина петіс керкасьыс налы воча, вежавидзöмөн чолöмасис Мишакöд да корис найöс пажнайтны. Сёйöм бöрас Кирилл Иванович да Миша петісны ывлаö куритчыны, и Нина вöтчис на бöрся. Недыр чöv олыштöм бöрын шыасис батыс дорö:

— Пап, ми Олякöд көсьям ветлыны турипув вотны. Мунам кык войколөн. Лэдзлы мянкöд Мишаöс: нюр вылад öнi верман паныдасьны ошкöд, и мелкашкаыд оз дорйы, колö карабин. Тайö кык луннас öд Мишаöс оз на нуны татысь?

— Миша, гашкö, татчö кольччас да?

— Ме шулі нин: сійöс кө татчö кольöдан, ме муна гортысь. Миша зэв шань зон, но гортас сійöс виччысьö невеста.

— Миша, ачyd мый шуан?

— Ме көсья мунны ёртъяскöд.

— Тиян делö... Сідзкö, звöнитла да тöдмала, кор лоас поездыс. Артмас кө, мед инö ветлас тиянкöд, и карабин сета.

Кирилл Иванович звöнитчыліс поезд кузя и штабсянныс вочавидзисны, вежон помöдзыс пö вагонъяссö оз сетны. И сійö шуис лэдзны Мишаöс ветлыны нылыскöд, лун куим на мунтöдзыс колис да.

Вотчыны мöдöдчисны нельöн. Вöзйысьöма тшöтш Олялөн Геня другыс. Босьтіны кык палатка, а нöшта карабин да мелкашка. Миша эськö шуліс, мый вылö пö мелкашкаыс, карабин нин эм да. Но Нина вочавидзис:

— Карабиныд гораа лыйö, а мянлы шумыс нинöмла. Огö жö кансерысь шыдтö кутöй пуны.

Кайигчöжыс Олялөн вомыс эз тупкысьлы. И чом дорас воигөн нин Нина чöвтис сылы:

— Тэ Геняыдкöд кольччышт. Вомыд оз пöдлассы да, ужынтöг колям. Став тарсö повзöдан.

Оля весиг дузгысыштис татшом шуомсыд, но век жö кольчис Генякöд. Нина уськöдис мелкашкасыс кык сьöд тарöс. Но нель вылад тайö вöли этша.

— На босьтлы мелкашкаöс да нöшта гөгöрт вöрсö шуйгала-дортыс,— вöзйис сийö Мишалы. — Сэни пув вöлышти да, гашкö, кыпöдан тарöс ли дозмöрöс. А ме найöс виччысьла: колö пес ваявны.

Миша пöрчис пестерсö, босьтис мелкашкасö да мунис кый-сыны. Нина колис öтнасöн. Сийö видлис пасьтавны пестерсö, но эз сяммы лэптыны пельпомöдзыс. А öд Мишаыс быттьö кокныда нуис. Нина малыштис пестерсö да весиг тракмунис, сьölöмыс кутис чеччавны. Збыль öмöй нö радейтчис Мишаас? А мый? Зонмыс сюсь, ыджыд тушаа, мичаник. И ылöдчынысö оз куж, ставсö чужöм вылас гижöма. Позьö эськö кольöдны татчö Мишаöс. Но мамыс налы овнысö оз сет, джагöдчыны дась деньга пондаыс да. «Ме öд радейта Мишаöс,— думнас шуалис аслыс Нина.— И кöсья лоны ськöд. Мый нö вöчны, мый вöчны? Татчö кольчас — мамöй менö торйöдас ськöд. Мöдлаö кö мунас, янсалам жö и. Мый кöть вöч».

Ныв синмысь гöгыльтчисны гырысь синва войтьяс. Нина эз чышказ найöс, а топöдис ас дорас пестерсö. И виччысьтöмысла тракмунис, кор кылис мыш сайсяныс чукöстöмсö:

— Нина. Мый нö танi öтнад пукалан? Мыйкö лоис? Горзам, горзам, а тэ он шыась.

— Ни-нинöм эз ло,— гусьöник чышкыштис синвасö Нина.— Миша мунис пöтка корсьны.

— Бöрдiн али мый? Мыйысь нö?— казялис нывьёртыслысь вазьöм чужöмсö Оля.

— Ме тэнö бöрдöмнас частöджык аддзывла да некор ог юась, мыйысь бöрдан. И тэ эн юась.

— Нина, прöстит. Ме эг кöсий тэнö дöзмöдны ни дзерöдны.

— Дöзмыныс нинöмысь. Шу Геняыдлы, мый пес колö ваявны. Да лыска пу лагтьяс. Куш му вылад узылыны лöö кöдзыд.

Миша локтис рöмдiгас нин озыр прöмысöн. Нывъяс пыр и пуксисны куштысьны, а Миша чишкалис куштöм пöткасö, перъялис сювсö, весалис дзульсö. Нина нин сэсся пуктис пуны.

Бипур дорад том йöзыдöн öдйö и колис рытыс. Кынöм дундытöдзыс чöсмасисны пöтка яйöн, быдторсö сёрнитисны, винасьыс гажмыштисны да. А сэсся, синныс нин пондiс куньсьыны да, разöдчисны палаткаясö. Оля Генякöд, Нина Мишакöд.

Мöд луннас чеччисны водз, босьтисны сьöрсыйс сёян да петисны туйö. Пувъяиныс вöлöма верст кык ылнаын. Воисны сэтчö да пырысьтöм-пыр уськöдчисны вотчыны. Чуманъясныс гырысь пувнад тырисны öдйö. Зiля вотчöмысла кынöмныс ёна и сюзис, да азыма сёйины нурсö. Пажнайтöм бöрас Геня корис сетлыны мелкашкасö:

— Ми Олякöд кöсьям водзöджык ветлыны пувсö видзöдлiгмоз. Гашкö, мöдысь на позяс волыны. Гашкö, дозмöр ли тар кö кыпöда. Ме öд кужа лыйсьыныд.

— Сöмын ылö эн мунöй,— öлöдис найöс Нина.— Вошанныд да, корсь тiянöс.

Нина кисьтис пувсö чуманъяссьыс пестерö да пондiс водзö вотчыны Мишакöд. Коркö кад чуманъясныс тырисны, и ныла-

зонма пуксисны пестер дорас шойччыштны. Нина некымынысь чукöstіс Олясö да Генясö, но воча некод эз шыась. И Миша шуис ветлыны налы паныд, карабинсö сьörсьыс босьтис да. Минут дас мысти кутіс кывны горзём шы. Нинаос повзёмысла пондіс тірöдны. Друг гымыштіс лыйём шы, сэсся нöшта. Нина-сянь неылын лэбыштіс Геня. Сы бöрся котöртіс Оля, но сконъ-ясис пу вужйö да усис. Нина уськөдчис сы дорö:

— Оля! Оля, мый лоис?

Оля видзöдіс Нина выlö йöй синмөн да сьöкыда ыпкис. Сэсся тшапкысис сылы сояс да пондіс шуавны:

— Сэні ош, сэні ош.

— Кöні Мишаыс? Сійö муніс тіянös корсьны.

— Ме сійös эг аддзыв. А кöні Геняыс? Сійö менö колис.

— Геняыд ме дорті төв ныр моз лыйыштіс. Пöди, гортас нин.

— А ошкыс кö нö татчань локтас? Пышйыны жö колö.

— Мишаос öд огö жö кольöй öтнассö. Лок эстчö вужля саяс дзебсьылам.

Нывъяс тэрыба мунісны вужля дорö да сайöдчисны сы улö. Регыд мысти тыдовтчис Миша. Нина пырысьтöм-пыр и чепöсийс сы дорö. Сэсся и Оля петіс вужля увсьыс.

— Кöні нö, Оля, кавалерыд?— юаліс Миша.— Ме дорті лэ-быштінныд, быттьö бордъяös. Кытчö шыбитінныд чуманъястö да мелкашкасö?

— Налы ош паныдасьöма да,— дорйис пöдругасö Нина.

— Паныдасьöма нин, буракö. Меным тай воча жö веськаліс. Ковмис лыйны.

— Сыö?

— Эг. Сынöдас.

— И повзис?

— Жежис тай-а, эз уськөдчы ме выlö.

— А ачыд повзин?

— Сьölөмöй дрöгнитліс жö...

Рытнас Оля эз кут лысьтны водны аслас палаткаас.

— Öти вонйö ог төрöй,— шуис Нина.— Мед Геняыд эз пышйы дай. Некод тэнö оз гусяв.

Миша пöрччис кöмсö, пырис вонъяс. Регыд мысти пырис и Нина. Миша öдйö унмовсис, пондіс нистыны. Мудзыс, буракö, талун бура дөнзьöма. Нина пасьтасис да вуджис Оля дорö. Сі-йö оз на вöлі узь. Став тушанас тіраліс полöмысла.

— Мый нö сэтшöма сырман?— Оляös лөнъöдöм ради шуис Нина.

— А ошкыс кö нö татчö локтас?

— Локтас кö, Миша орччөн.

— Ёна жö и сюсь тэнад Мишаыд. Ошкысь эз повзый. А Ге-ня кыdzi пышйис, ме йылысь эз и думышты, эновтіс. Вот трукстыд. А ме сійös сэтшöма радейті.

— Ачыд нö эн повзый? Эн кö крукась да усь, кöні эськö öні вöлін? Сэки тэ ачыд нинöм эн аддзы: синмыд плешкад ка-йöма.

— Сідз эськö да...

Асывнас медводз садъмис Миша, пасьтасис да петіс вонсьыс. Пестіс бипур, öшöдіс мöтыр йылö шыд ведра да чукöstіс нывъяс-

ös сейны. Нуръясьом бõрас найõ чукõртисны кõлуйсõ да мõдõд-
чисны гортас. Джын туяс паныдасисны военной паськõма йõз-
кõд. Вõлõмкõ, Геня ризõдõма гортõдзыс да висьталõма, вотчысь-
ясõс пõ сейис ош. Ниналõн батыс босьтас нель салдатõс да
нõшта Геняõс туйсõ петкõдлыны.

Кирилл Ивановичлы лои зэв нимкодъ, нылыс дзоньвидза да.
Ёна и топõдлїс ас дорас Нинасõ. А Оля дорõ матыстчис Геня:

— Олюк, тэ ловъя! Ме думайтї, ошкыс тэнõ сейис...

— Трус, предатель!— горõдїс Оля да кучкис зонлы бан бо-
кас. Геня шõйõвошлїс, а сэсся бергõдчис да шавксõдїс горт-
ланьыс.

Нывъяслысь пестеръяссõ водзõ кыскисны салдатъяс. Нина
да Оля õта-мõдсõ вежмõн висьтавлїсны Кирилл Ивановичлы
вõрса лõмторъяс йылысь, а Миша чõла восьлалїс на бõрся.
Сьõлõм вылас сылы вõлї деливõ, õд регыд ковмас мунны татысь
да янсõдчыны Нинакõд.

— Михаил,— виччысьтõг шыасис сы дорõ Кирилл Ивано-
вич.— Тõрыт меным юõртисны, аски пõ лоõ поездыд. Ковмас
талун лõсьõдчынытõ. Он кõ кольчы.

Миша нинõм эз вочавидз да водзõ чõла восьлалїс. Юрас
пондїсны бергавны Нинакõд коллялõм кадыс, сёрниясысь. Сылы
эз на кõйыссы янсõдчыны Нинакõд, но и кольчыны эз жõ
кыскы.

Горт дорас воõм бõрын Нина кыскылїс Мишаõс керка саяс,
сывйыштлїс да шуис, ме пõ талун рытнас тэ дорõ вола. И зон
мунїс казармаас чукõртны кõлуйсõ. Рытивбыд сэсся виччысис
Нинасõ. Но Нина эз и лок.

Миша войбыд эз вермы куньлыны синсõ. А водз асывнас
сїйõс да нõшта некымын салдатõс нуõдїсны поезд вылõ. Миша
и сэнї корсис синнас Нинаõс, чайтїс, кõtъ сэтчõ матыстчывлас
прõщайтчынысõ...

Поездыс саялїс нин, кор Нина локтїс станция вылõ. Сїйõ
помõдзыс кыскис, мõвпалїс, колõ-õ налы тайõ бõръя аддзысьлõ-
мыс. А сэсся век жõ чепõсйис гортсьыс да мунїс станциялань.
Но эз нин удит. Эз и удит шуны Мишалы, мый радейтõ сїйõс.





Комиясӧс дорйысьяс йылысь

Вежа Степан

Комиын Перымса епархия котыртӧм эз во сьӧлӧм вылас новгородсаяслы. 1385 воын найӧ ыстісны Степанлы паныд военной отряд, а отсӧгсӧ комияслы сетіс Устюгысь дружина, коді веніс новгородсаясӧс. А кор найӧ выльысь локтісны Коми муӧ, москваса князь Дмитрий Донской кокныда пасьвартіс найӧс. Комияслӧн сәки вӧліны и мукӧдпӧлӧс вӧрӧгъяс.

Тайӧ жӧ воын Перымса Степан воліс Новгородӧ дорйыны комиясӧс ушкуйникъясысь. «Ушкуйник» кывсӧ языковедъяс гӧгӧрвоӧдӧны «ушкуй» — пӧвъясысь вӧчӧм кузь пыж* — кывйысь артмӧмаӧн. Татшӧм пыжъяснас комиӧ волӧмаӧсь новгородса купечьяс. На пиысь унаӧн вочасӧн пӧрӧмаӧсь гусясысьсясӧ, мырддылӧмаӧсь коми кыйсысьсяслысь вӧрса прӧмыссӧ. Татшӧм могӧн найӧ воӧдчылӧмаӧсь не сӧмын Коми муӧ, но и Кама да Волга муясӧ, да шусьылӧмаӧсь саридзса пиратъясӧн.

«Степанлӧн Новгородӧ ветлан могыс,— кызди висьталӧма «Святители Пермские» небӧгын,— вӧлі корны Новгород карса вече вылын дугӧдны ушкуйникъяслысь усьласьӧмъяссӧ пармасыслӧн муяс вылӧ. Тайӧ медводдзаысь Новгородӧ волігӧн Степанлӧн эз вӧв некутшӧм тӧдса, коді эськӧ отсаліс сылы, да Степан чайтіс, мый сылы сьӧкыд лоӧ асланыс бергӧдны новгородса сходсӧ. Но сійӧ чуймис, кор сходыс сувтіс сы дор. Новгородсаяс бура тӧдісны сылысь бур вӧчӧмсӧ, Христос нога подвигъяссӧ. Новгородса владыка архиепископ Алексей, посадникъяс, бояра бура примитісны перымса епископӧс, вежа Софиясянь дона гӧсьтӧс. Вече шуис: могмӧдны Степанлысь корӧмъяссӧ, пуктыны пыдди сылысь элясьӧмъяссӧ, мыжаяссӧ эрдӧдны вечелӧн ёрд вылын, сәсса не пырны мукӧд ушкуйникъяслы Пермской епархиялӧн муяс вылӧ. И лэдзӧма вӧлі Степанӧс бур кывйӧн да козинъясӧн,— висьтавсьӧ летописьын»**.

* Коми кывчукӧр, 2000, 692 л.б.

** Святители Пермские. 2000, 28-29 л.б.

«Перымса Степан йылысь повесытын» гижысь Сергей Журавлёв висыталö Степанлөн новгородсаяскöд сёрни йылысь: «Кывзöй менö ас вöляөн олысь новгородса войтыр! Водзö выlö некор сэсся энö топöдöй-дзескöдöй Перымса муын олысь йöзöс, энö куштöй сатысь вör-васö. Вöчанныд кö тайöс, ковмас сэсся москваса князь водзын кыв кутны»*.

Тадзи шунысö Степанлөн вöлі позянлуныс, öд сэки Новгород воштис Коми муöс ас кийн кутöмсö. «Вологодско-Вымскöй летописын» та йылысь юöртöма: «Мöскуаса великий князь Дмитрий Донской могмöдис Степан Пермскийлысь корöмсö — ыстис ассыс ратникъяссö новгородса разбой вöчысь ушкуйникъяслы паныд. Совдор (Сольвычегодск) гөгöртасын пансис тыш. Ратникъяс венисны».

Та йылысь коми поэт Владимир Тимин гижö тадзи:

Лöддза-номъя...
Öнiя ног — июнь.
Совдор гөгöр жöдзöны ушкуйникъяс,
Чургöдöны асывланьö чунь:
Сэн — зыряна,
Нöшта лун-мöд уйны кö.
Волысанис зелякылö кöрт,
Сьöкыд кийн дзиртыштöны черъясныс.
Водзсась, парма войтыр, а эн бöрд,
А то ставсö мырддяласны-перъясны**.

Перымса Степан йылысь да сылөн кад йылысь гижлис уна коми гижысь. Со кöть Михаил Лебедевлөн «Повтöм зон» поэмаысь поэбö лыддыны, кызди комияс водзсасисны ушкуйникъяслы паныд:

Ёна лёкмис рöзбой пиян:
«Нельöд морт нин усис миян!»
Сьöлöм Ёкышлөн эз повззы:
Кöть пö олöм менам овсис,
Тöдны пондад öнi тi,
Кутшöм войтыр танi ми!»

Сэсся коми олöм йывсыйс гижысь кывкöрталö:

Татшöм вöли сэсся олöм,
Коми муö рöзбой волöм.
Татшöм вöли збой да ён
Ёкыш нима коми зон***.

Комияс важ кадсянь бура тöдисны да пыдди пунктисны найöс дорйысь Перымса Степанöс. 1960 воясö ме ветли Новгородö да аддзыли новгородса кремльын Россиялы сюрс во тырöмлы сувтöдöм бронза памятник. Эм тайö памятник вылас и Перымса Степанлөн мыгöрыс. Степанöс серпасалöма памятник вылас

* Сергей Журавлёв. *Повесть о Степане Пермском*. 1996, 29 лб.

** В.Тимин. *Мича Ёма*. 1996, 5 лб.

*** М.Лебедев. *Бöрйöм гижöдъяс*. 1940, 149 лб.

вежӧра да сибыд мортӧн, буретш сэтшӧмӧн, кутшӧмӧн петкӧдліс сійӧс «Пама» поэмаын медводдза коми поэт Иван Куратов:

Рам, и том, и мича чужӧма,
И бур кыв-вора Степан,
Бӧрйынысӧ енмыс кужӧма
Мортӧс, код оз янӧд тан
Бӧрйысьысьсӧ...*

Перымса Степан вылӧ видзӧдласыс эз вежсьы и ӧнія коми гижысьяслӧн. Босьтам кӧть на пиысь томджыксӧ, Александр Лужиговӧс:

Ёна водзын парма пиӧс
видзліс Енмыс, сисьлӧн биыс.
Эз на дзикӧдз косьмы-вижӧд
Храплӧн коми кывъя гижӧд.
Зарни пытшкӧ йӧртӧм Енмыс,
еджыд вичкояслӧн нэмыс
коми пӧвстын век на олӧ.
Сэки коми йӧзлы коліс
Храп кодъ мортыс, сылӧн лолыс.
Коми йӧзлы индысь-шуысь,
коми шог да тӧждлун нуысь**.

Но медся стӧча Перымса Степан йылысь гижис Геннадий Юшков «Вежа Степан» кывбурын:

Вежа Степан, медводдза епископ,
Комияслӧн вежӧрысь эз сыв.
Миян сӧрни дінӧ эз вӧв писка,
Мамсяныс на тӧдіс коми кыв.
Медводз тайӧн, тӧдӧмысь, и босьтіс,
Памакӧд кор паніс ассъыс вен.
Азбукатӧ вӧчис, школа восьтіс,
Уна пыдди вайис ӧти ен.
Пыртчигас, дерт, синваыс эз петлы,—
Мый эз жугӧд, мый эз сӧмын сот!
Но кор ковмис, Мӧскуаӧдз ветліс,
Кокньӧдны мед комияслы вот.
Сійӧ збылысь вӧлі кыз апостол,
Но эз вера сӧмын татчӧ вай.
Эг кӧ бырӧй кольӧм нэмъяс костас,
Эм и вежа Степанлӧн сэн пай***

Коми кывсӧ бура тӧдлісны, вылӧ донъялісны,
видзисны...

(П.Сорокин, Илля Вась, А.Микушев)

Коми му радейтысьяснас да коми йӧзӧс и налысь кывсӧ дорйысьяснас Перымса Степан бӧрын вӧліны и мукӧд йӧз,

* И.Куратов. *Художественной произведенияс. Т. 1, 1939, 288 л.б.*

** *Коми поэма — А.Лужигов. Енэжшӧрса ордым. 1994, 40 л.б.*

*** Г.Юшков. *Му выв олысь, 1991, 31 л.б.*

тшөтш и комиысь петöмаяс. Став мирыслы тöдсаён лоис Туръя сиктын чужлöм Питирим Александрович Сорокин, нималана социолог. Челядьдырйиыс бура сёрнитіс комиён. А сёрөнджык сійö уна гижис коми кыв да фольклор йылысь, И.Куратовлөн да К.Жаковлөн гижöдъяс йылысь. «Öнiя зырянаяс» очеркын сійö гижис, мый «унджык кывйыс зырянаяслөн тэчсöны öти-кык слогысь. Тайö кывйыс удж радейтысьлөн, кодлы некор больгыны да петкöдлыны быд пöлöс нюансыс. Тшöкыда кывлан, мый коми кывйыс пö гöль да жеб, но та вылö колö вочавидзны — коми кыв, мöдарö, зэв озыр лыднас. Сідз, Роговлөн словарын чукөрмöма, ог кө сорсы, квайтымын сюрс кывйöдз — тайö лыдыс быд сёрниын зэв ыджыд. Татшöм ылалöмыс подулавсьö, буракö, сійөн, мый коми кывъяс гусьөн моз пырöма уна роч кыв, мый серти и шуöны зырянскöй кывлөн гöльлун йылысь». И водзö Сорокин висьталö: «Унджыкысьсö зырянаяс — писькöс йöз, бура вермöны гөгөрвоны сійöс, мый налы кажитчö, мый лöсялö «практика» боксянь, мыйысь найöс нимтісны «войвывса американецъ-ясөн»*.

Очеркын П.Сорокин и ачыс бурысь гаралö коми фольклор: «Зырянаяслөн художественнöй творчествоыс тыдалö и налөн сыланкывъясын, йöзкостса важ висьтыясын, мойдъясын и сідз водзö». Колана сылөн сёрниыс и сы йылысь, көні олöны тайö тэчöмторъясыс, кор да кызди найöс висьталöны, сылöны, мойдöны. «Тöлын вöрса керкаясын рытпукъяс дырйи тайö мойдъясыс киссьöны помтöг. Налөн ыджыд юкöныс йöзöдöма нин К.Ф.Жаковөн, сылөн висьтыясын öти юкөнөн «В хвойных лесах» небöгын, көні öткымын мотив босьтöма йöзкостса творчествоысь (видзöд «Зырянские сказки», 1908 вося). Но и тайö сöмын неыджыд юкөн зыряна мойдъясысь...»

Сідзи жö П.Сорокин дорйис коми сыланкывъяссö да профессиональнöй творчествокöд налысь йитöдъяссö. П.Ф.Клочковлөн «Мыйла бöрдан, муса нылö?» сыланкыв йылысь сійö гижис: «Шуöны, мый тайö сыланкывсö пö гижöма кутшöмкö Клочков, но збыль-ö тайö тадзи, сьöкыд шуны. Тайö сыланкывсö сылöны йöз, но рифмаыс збыльысь висьталö, мый сійöс тэчöма торъя морт». Тані П.Сорокин висьталöма профессиональнöй да народнöй рифмаяс костын торъялöм йылысь.

П.Сорокин бöрын коми кыв да фольклор бурысь нимöдісны-кыпöдісны XX нэмса профессоряс В.И.Лыткин да А.К.Микушев. Найö ставсö вöчисны, медым комияс эз вунöдны батымамыслысь кывнысö, эз öтдортны сійöс асланыс олöмысь да водзö сöвмöдісны, видзисны сійöс.

Каникулъяс дырйи Илля Вась (В.И.Лыткин), Тотьмаса учительскöй семинарияын велöдчигөн, чукöртліс коми фольклор. Коми йöзлысь олöмсö тöдмалöм да йöзкостса поэзия сетісны сылы позянлун лöсьöдны медводдза гижöдъяс. Ачыс Илля Вась казътыліс, мый семинарияын велöдчигөн на сійö чукöртіс öти тетрадьö сё сайö кывбур. Тайö кывбуръяс пиысь миян

* П.Сорокин. *Этнографические этюды*. 1999, 106 л.б.

кадӧдз воис сӧмын кызь кӧкъямысыс. Нартитысьяслысь сатирической портретъяссӧ сетӧ «Аристократлы» (1915), «Озырлы» (1916) да мукӧд кывбуръясын. «Озырлы» кывбурын Илля Вась веськыда, ӧта-мӧдыслы паньд сувтӧдӧ озырӧс да коньӧрӧс:

**Ыджыд дявӧл, сюра сӧт,
Кыз рушкуыд тэнад пӧт,—
Нянь куд менам тыртӧм,
Ичӧт зептӧй куш,
Ва пельсаӧ пыртӧм
Сӧмын кушман руш.**

«Йӧй Иван» кывбурын сійӧ петкӧдлӧ помӧдз гӧльмӧм коми крестьянинӧс, кодлӧн важӧн нин абу керка ни карта, кӧм ни паськӧм да кодӧ ачыс нин сетчӧма йӧй туйӧ, кӧть некутшӧм вежӧр абу на воштӧма.

А со кызди поэт гижӧ велӧдчӧм йылысь «Велӧдчӧй, вокъясь!» (1915) кывбурын:

**Велӧдчан — аддзан,
Кызди код олӧ,
Велӧдчан — тӧдан,
Керны мый колӧ.**

Сарскӧй армияӧ 1916 воын, кызди тӧдса, мобилизуйтисны и асьсӧ поэтӧс. Гражданскӧй война пансьӧм бӧрын поэт служитис действующӧй Краснӧй Армияын взводса командирӧн, тышкасис белогвардеецъяслы паньд, а сӧсса Польскӧй фронт вылын — белополякъяскӧд. Гражданскӧй война помасьӧм бӧрын Илля Вась мыйкӧдыра уджаліс сӧмын на котыртӧм Коми небӧг лӧдзанинын. 1922 воын велӧдчис Москваса университетын, а 1925 восянь — Асывывьса народъяслӧн институтса аспирантураын. Аспирантураын сылы вӧлі сетӧма суйӧрсайса командировка Финляндияӧ (1926 во) да Венгрияӧ (1927—1928 вояс).

Велӧдны финн-йӧгра лингвистика, а сідзжӧ венгр да финн кывъяс Илля Вась заводитӧма Финляндияын, а сӧтчӧ мунтӧдз финн кывсӧ велӧдлӧма студенталигас на.

Будапештын сійӧ помаліс университет, а аспирантурасӧ лопомавны суйӧр сайысь локтӧм бӧрын. 1938 восянь Илля Вась уджаліс СССР ЦИК бердын национальностьяс научно-исследовательскӧй институтын и сійӧ жӧ кадӧ вӧлі МГУ-ын финн-йӧгра доцентӧн.

1933 воын сійӧс нинӧм абусьыс мыждісны да йӧртісны сутшкасьысь сутуга сайӧ, но и сӧтысь петӧм бӧрын сійӧ уджаліс наукаын да литератураын, эз сетчы лӧк олӧмыслы да шогыслы, уна кыв вылысь вуджӧдіс мирса поэзия. Ми вермам ӧні лыддьыны комиӧн сыӧн вуджӧдӧм гижӧджыс Пушкинлысь, Никитинлысь, Демьян Бедныйлысь, Лев Ошанинлысь, удмурт Кузубай Гердлысь, Ашальчи Окилысь, украинец Тарас Шевченколысь, латыш Райнислысь, финн Эриколысь, венгр Пе-

тефилысь, немец Гётелысь да Шиллерлысь. Уна странаын тӧдӧны и Илля Васьлысь гижӧдъяссӧ, научнӧй уджъяссӧ. Кыв туялан-велӧдан наукаын зіль уджалысьӧс, сійӧс бӧрйисны научнӧй обществасса почётнӧй членӧн Хельсинкиын, Будапештын, Гамбургын, Таллинын. Россияын наукаясын ыджыд вермӧмъяссӧ, литература сӧвмӧдӧмсӧ да 80 арӧс тырӧмсӧ ыджыд коми учёнӧйлысь да поэтлысь 1975 воын вӧлі пасйӧма народъяслӧн Дружба орденӧн. Оліс сійӧ 1981 вося августӧдз, а куліс 86 арӧс тыртігӧн.

1981 вося сентябр 3 лунӧ «Югид туй» газет йӧзӧдіс Геннадий Юшковлысь «Илля Васьлӧн кувсьӧм кузя» татшӧм кывбур:

Он нин аддзыв сійӧс тась,
Мывкыд сёрни улас инась.
Со и муніс Илля Вась
Нэмыс кезлӧ миян дінысь.
Эськӧ эз нин вӧв и том,
Медым тадзи шогӧ усьны:
Бытьӧ сотчис вӧрын чом,
Кытчӧ волевлім ми узыны,
Бытьӧ уна коми кыв
Пыді гуас сьӧрсьыс нуис.
Век мед лоас сылы сыв
Коляозъя чужан муыс.

Нэмъяс кезлӧ колис нимсӧ коми фольклор туялысь, паськыда тӧдса учёнӧй, профессор Анатолий Константинович Микушев. Сылысь уджъяссӧ вылӧ донъявліс Илля Вась (В.И.Лыткин).

«Коми песеннӧй творчество йылысь медводдза исследование» статьяын Илля Вась пасйис: «Неважӧн А.К.Микушев дорйис ассьыс докторскӧй диссертация. Сылӧн нимыс — «Коми ссылан фольклорлӧн артмӧм да кыптӧм» («Генезис и эволюция коми песенного фольклора»). Татшӧм диссертация! Шензянтор! Революцияӧдз кӧ кодкӧ кыпӧдіс сёрни коми песеннӧй фольклор да татшӧм диссертация гижӧм йылысь, татшӧм морт вылас эськӧ кутісны серавны. Сэки ӧд вӧлі шуӧны, комилӧн пӧ абу некутшӧм оригинальнӧй ссыланкыв ни некутшӧм фольклор»*.

А.Микушевлысь уджсӧ Илля Васьлӧн татшӧм донъялӧмыс эз, дерт, вӧв виччысьтӧмӧн. Сійӧ бура тӧдіс, мыйта кужанлун, вын, тӧдӧмлун лой пуктыны, медым аслыс да сылӧн отсасьысь-яслы вӧчны татшӧм уджсӧ. Фольклорист медводдзаыс вӧчис кывкӧртӧд, мый комияслӧн эм асланыс эпос**. Тайӧ кывкӧртӧд дор сувтіс уна учёнӧй. Великобританияысь Кембридж университетса доктор Джон Гордон Коутс Микушевлысь уджсӧ нимтіс «эпохальнӧй»***, мӧд кывъясӧн, ставнас кызбӧд нэмы лӧсяланаӧн.

* Илля Вась. Медся дона да муса. 1994, 185 л.б.

** Коми народнӧй эпос. 1987, 686 л.б.

*** В.Мартынов. Литераторы земли Коми. 2000, 110 л.б.

2012 воын петӧс А.К.Микушевлы сийӧм небӧг, лӧсьӧдӧма сийӧс учёнӧйлӧн чужӧмсяньыс 85 во тыригкежлӧ*. Учёнӧйяс да гижысьяс сәні казътылӧны, кыдзи Микушев отсаліс налы пырӧдчыны наукаӧ да литератураӧ. Аттьӧалӧны да бур кыв сы йылысь шуӧны филологияса докторъяс В.А.Латышева, В.В.Пахорукова, Е.А.Игушев, поэтъяс А.В.Некрасов, В.В.Тимин да уна мукӧд тӧдчана йӧз.

А.Микушевкӧд уджавліс Владимир Тимин, кодӧ лоис сәсся тӧдчана коми гижысьӧн. «Биармияса викинг» романсӧ сийӧ заводитӧ тадзи: «1966 вося урасьӧм (февраль) тӧлысь. Фольклор экспедицияын ми кыкӧнӧсь: фольклор туялысь Анатолий Константинович Микушев, бӧрынджык филологияса доктор, профессор, наукаын паськыда нималысь морт, да ме — фольклористикаӧ сӧмын на воӧм морт, таӧдз инженер СССР-са наукаяс Академиялӧн Коми филиалын. Помалӧ пединститут да пыр жӧ и вуджи фольклор юкӧдӧ, кытчӧ вӧлі важысянь нин кыскӧ».

Мый Тиминӧс важысянь кыскӧма фольклорӧ, тӧдчӧ и сылӧн «Сыланкывъяс чукӧртысьлӧн висът» нима кывбур серти, кодӧс сийӧ сийӧма сәкся веськӧдлысьлы — Анатолий Микушевлы**. Тадзи жӧ А.Микушев отсӧгӧн пырӧдчисны фольклорӧ да литератураӧ уна мукӧд тӧдчана учёнӧй да гижысь не сӧмын миян Коми муын, но и мукӧдлаын. Найӧ пыр кужӧны пӧся аттьӧавны А.Микушевӧс.



* Анатолий Константинович Микушев. *Статьи. Воспоминания. Письма.* 2012, 301 л.б.

** В.Тимин. *Мича Ёма*, 1996, 147 л.б.

Кыдзи чужис «Катшасинъяс» ссыланкыв

«Катшасинъяс» ссыланкыв (кывъясыс Серафим Поповлөн, шыладыс Александр Осиповлөн) пырö коми войтырлысь ссыланкывъяс видзысьлөн — «Асъя кыа» Коми Республикаса ссылан да йöктан государственной ансамбльлөн — зарни кудйö.

Тайö ссыланкывсö позьö кывны и медся ылi грездын, и республикаса самодеятельной котырын, и «Асъя кыа» ансамбльлөн концерт вылын. Кывзысьяс век нимкодяссьоны сыын воссьысь джуджыд мöвпнас да сьölöмкылöмнас. Сійöс кывзигөн син водзад пыр и сувтö помтöм-дортöм Коми муным, вөр-ваным. Менö важысянь вөрзёдö кывъясыслы шылад лöсялöмыс. Коми лов шысö пöльыштiс ссыланкывъяс Шойнатын чужлöм морт — Александр Георгиевич Осипов.

С.А.Попов да А.Г.Осипов кыкнанныс ветлисны Ыджыд Айму тыш вылö. И фронт вылын Рöдинанымöс дорйигөн ёна доймалисны. Серафим Алексеевич сьöкыда контузитчис, а Александр Осипов воштiс веськыд кисыс чуньяссö.

С.А.Попов чужлис 1912 вося декабр 26 лунö (выль ногөн — 1913 вося январ 7 лунö) Вöлöгда губерниясь Яренск уездса Зöвсьöрт сиктын, крестьянин семьяын. Батыс видзис гортас уна небöг, и С.Попов ичотсяныс радейтiс лыддысьны. Тöдiс наизусть Пушкинлысь, Некрасовлысь, Лермонтовлысь, Маяковскийлысь кывбуръяссö. 1934—1938 воясö служитiс Сöветскöй Армияын. 1941 вося юлын веськалис фронт вылö. 1943 воö сьöкыда контузитчис и сійöс ыстiсны гортас.

С.А.Попов пондiс уджавны «Коми комсомолец», «Вöрлэдзысь», «Красное знамя», «Югыд туй» газетъясын. Секретаралис да редакторалис «Войвыв кодзув» журналын. Гижис уна кывбур. Наын тыдовтчöны уджалысь йöз (вөр лэдзысь, геолог, шахтёр, пуръясьысь, рабочöй). Творчествонас поэт быттьö тшöтш пырöдчис Войвыв сöвмöдöм-вежöмö. Сьölöмсяныс гижис и войвывса вөр-ва йылысь.

С.А.Попов — СССР-са гижысь Котырö пырысь, РСФСР-са культураса заслуженной уджалысь, Коми АССР-са народной поэт, И.А.Куратов нима Государственной премия лауреат.

А.Г.Осипов бура тöдiс коми войтырлысь музыка культурасö. Буретш сійö, Москваын Россияса композитор Котырын уджалiгөн нин, гижис рецензияс Георгий Дехтяревлөн (сэки — Коми АССР-са ссылан да йöктан ансамбльлөн веськöдлысь да дирижёр) опера вылö да Я.С.Перепелицалөн «Яг-Морт» медводдза национальной балет вылö.

Кыдзи вермис чужны лолöдзыд йиджысь «Катшасинъяс» ссыланкывйыс? Кывъясыс и шыладыс восьтöны джуджыд сьölöмкылöмъяс, ас войтыр да чужан му дорö ыджыд муслун.

Со мый висьталіс меным ӧтчѳд ачыс Серафим Алексеевич:
«Ми мӧдім Александр Осиповкӧд мян вокъяс дорӧ — Перым-
Коми автономнӧй кытшӧ, Кудымкарӧ. Асывводзянныс первой
асфальтӧд, сэсся муалӧм туйӧд дыркодь нин мунім лунвылӧ.
Ӧшинь сайын вирдалісны сиктъяс, вӧр ылтасъяс. Сись кодъ
кыдзъяс вежсьылісны пожӧма ягъясӧн, козъяинӧн. Менӧ вугрӧд-
ліс. Но виччысьтӧг машина пондіс несъявны да ланьтіс туй
шӧрас. Орччӧн вӧлі катшасинъясӧн тырӧм луд да нейджыд ю.
Ми чеччим «козликысь» кок веськӧдны. Миянӧс шензьӧдіс Ен-
мӧн койӧм дзоридзъяслӧн еджыдыс, кывйӧн висьтавны позьтӧм
мичлуныс. Ме некымынысь шуи «катшасинъяс, катшасинъяс»,
юрам кыськӧ виччысьтӧг воис рифмуйтӧм строфа:

**Коркӧ узыланнѳд он, катшасинъяс,
Мыйла восьсаӧсь пыр тіян синъяс?
Менӧ пыр сӧмын ті дінӧ нуӧ,
Лыдтӧм дзоридзӧн тыр Коми муӧ.
Катшасинъяс,
Катшасинъяс,
Мыйла восьсаӧсь пыр тіян синъяс?»**

«ГАЗонсӧ» шоперӧн дзоньталігкості ме гижѳ медводдза да
мӧд куплетсӧ. Кудымкарӧдз артмис дзонь кывбур, и Перым-
Коми автономнӧй кытшын Александр Осипов гижис тайӧ
кывъяс вылас шылад, аддзылӧмторйыс сьӧлӧмас мӧрчӧма жӧ
да».

* * *

Колис уна во. Син водзам ӧнӧдз на сулалӧ нейджыд тушаа,
косіник Серафим Алексеевич Попов. Ыджыд поэт. Поэт-фронто-
вик. Дум вылӧ усьлӧ, кыдзи ми тшӧкыда паныдасьлывлім Юби-
лейнӧй (ӧні — Стефановскӧй) площадьъ вылын удж вылӧ муніга-
ным: ме филармонияӧ, а сійӧ Печать керкаӧ. Век сувтовкерлім,
видзаасьлім да варовитлім. Ме окотапырысь кывзылі Серафим
Алексеевичӧс, а корсюрӧ сійӧ и кывбуръяссӧ на лыддывліс.
Тайӧ менам некор оз вун.

Комиӧдіс Алёна Шомысова.





Василий ЧУПРОВ

Коркө изъваса гижысь Альбина Ануфриева йӧзӧдлӧ «Майбыр» небӧгас нималана бурдӧдысь Тандзе Марья йылысь висътъяс.

И со уна во мысти том гижысь, изъваса жӧ, гижӧдъяснас бара бергӧдчӧ Тандзе Марья динӧ. Сійӧс, таладор югидсьыс мунӧм бӧрын нин, ас ногыс бурӧн казътылӧ.

Изъваса Ванга

Август вӧлі, а талун мыйлако вывтӧ нин жар, тӧв пушкӧ-пӧльтӧ — зэр ли, мый ли вайӧ. Пуяс вылын петкӧдчыны нин заводитӧмаӧсь кольквиж, гӧрд, чайвиж рӧма коръяс, юр весьтын мукӧддырйи тыдовтчыласны нин водз мунысь лӧбач кельӧбъяс. Ньӧжйӧник пуксьӧ ар... Талун мӧдӧдчи шойна вылӧ дед-бабӧс казътывны. Босьтӧ сьӧрсьым казътӧдтор да мунӧ. Быдтор йылысь мӧвпалӧгӧн эг и казъявлы, сикт помӧдз нин восьӧма. Шойна вылӧ миян туйыд кузь. Улыс шойнаӧдз вои да пасъяси сэн сулалысь вӧрӧталы, сӧсся чӧв-лӧнь тувччалӧ гуяс косттӧ. Чӧвтӧ пернапас тӧдса мылькъяс вылӧ да мунӧ Вылыс шойна вылӧ, сэн буретш и, кыз му-мати улас, куйлӧны менам мада дед-бабӧ. Улыс шойна да Вылыс шойна сӧ торйӧдӧ нюрсянь лӧтччысь ичӧтик Косъӧль. Сяльгӧ-ворсӧ сійӧ, шыладыс сӧтшӧм мелӧ тайӧ жар лунас!..

Баб-дед гуяс дорын дыр сулалӧ. Казътӧ найӧс бур кылӧн, термосӧ босьтӧм чай юи. Чӧскыд и чайыд сынӧд вылас. Сӧсся мӧдӧдчыны нин кутӧ, и друг юрӧ воис мӧвп ветлыны Тандзе Марья гу вылӧ: важӧн нин эг вӧвлы...

Тандзе Марьялӧн гуыс ӧна торъялӧ мукӧд гуысыс. Важ шойна вылын пӧрӧм да сьӧдӧдӧм крестъяс да стӧлбъяс костын Марья баблӧн гуыс бура тыдалӧ. Енӧж рӧма югидлӧз пернаыс ылысянь сибӧдӧ ас дорас. Матыстчи гу дорӧ, свеж чветъяс тыдалӧны, вӧрӧта бердас быдмысь туруныс таяссьӧма, буракӧ, неважӧн кодкӧ вӧлӧма, кӧть эськӧ тайӧ нывбабаыслӧн гу дорӧ век вольтылӧны.

Гу вылас уна сись: мукӧдыс муӧдзыс сотчӧмаӧсь да ляскысьӧмаӧсь сы бердӧ, мукӧдыс джынвийӧдз сотчӧмаӧсь, а некымын

сись эськө ӱзйылӱмаӱсь жӱ, но вына тӱв ныр улас, буракӱ, ку-
сӱмаӱсь. Видзӱдлӱ фото вылас, а вӱлӱмкӱ, Тандзе Марьялӱн
неважӱн на нимлун вӱлӱма. Пукси губокса лабич вӱлӱ, да
юрӱ сӱдз и воисны Тандзе Марья йылысь мӱвпӱяс...

Дас вит, а гашкӱ, и унджык во сайӱ лӱблӱ... Сӱки детсадӱ
на ветлӱ. Ёртӱяскӱд ворсам, чирзам, коркӱ и тышкасьны удит-
лам. А джадж вывсянь миян вӱлӱ видзӱдӱ баб: ёсь синӱяса,
вийгем* тушаа, сарапана... Сьӱда-еджыда фотокарточкаыс Ён
ӱбраз кодъ миян детсадын. Сӱки эг на гӱгӱрвоӱ, кодӱ тайӱ. Сӱ-
йӱ и стракыд миян вӱлӱ, кӱть эськӱ немтор лӱксӱ некор эз
вӱчлы. Полӱм ёна... Синӱяссьыс полӱм торйӱн: ёна нин ёсьӱсь.
Гырысьмим да гӱгӱрвоим, кодӱ карточка вылас. Керкалӱн кӱ-
зьяка! Тандзе Марья!.. Изьваын меднималана бурдӱдчысь, код-
лӱн славаыс ӱнӱдз нималӱ...

Кузь вӱлӱма олӱмыс Рочева Мария Фӱдоровналӱн, ӱкмысдас
квайт арӱсӱдз олӱма. Чужлӱма паськыд тундраын, но пӱшти
став олӱмсӱ сӱйӱ коллялӱма Гамын. Гамса медозыр кӱр видзысь
Тандзе Филь сайӱ мунлӱма. Верӱссяньыс и кольӱма сылы Тан-
дзе нимыс.

Олӱмаӱсь кык судта, либӱ кыдзи миян Изьваын висьталӱны,
выла-ула керкаын, Вылыс Гамын. Керкаыс ӱнӱдз сулалӱ: сӱнӱ
детсад. Верӱсыс водз кувсьӱма, уна челядӱн кольӱма Марья
баб. Сӱсся и сьӱкыд пӱраыс воӱма: кулакалӱмаӱсь озыра олысь
аньӱс. Тӱдӱсны ӱд эськӱ, кодӱс кулакалӱны да! Но мый сӱсся,
тадзи, буракӱ, колӱма вӱлӱ да... Мырддисны Тандзе Марьялысь
и керкасӱ. Вӱчлӱсны детдом, и санаторий лӱсьӱдлӱсны. А Марья
баблы ковмис керкаысь керкаӱ ветлыны, корсьны оланӱн. Уна-
лаын овлӱс сӱйӱ: ӱнӱ Анна ордын, Мада Вань дорын, Тихон
Раиса керкаын. Аслас Сюлюкӱд ветлӱсны. (Сюлю — Тандзе
Марьялӱн быдтӱм немка ныв). Но кӱть кӱнӱ абу овлӱма Марья
баб, сӱйӱ век бурдӱдӱма йӱзӱс. Уналаысь волӱмаӱсь сы дорӱ:
Печора, Уса да Изьва юяс пӱлӱн сулалысь пӱшти став сикт-
грездсьыс, да весиг Москваысь да мӱд карьясысь. Кужлӱма
Тандзе Марья бурдӱдны йӱзӱс. Унаӱс кок йылас сувтӱдӱма,
уналы олӱм вӱлӱ лача сетӱма...

Киыс лы тӱчны велавлӱма томсянь на: тундраад быдмӱма
сӱйӱ да томсянь на кӱрсӱ бурдӱдлӱма. И уна турун тӱдӱма. Ту-
рунӱяснад тшӱтш кужӱма бурдӱдчыны аныд. Мырпом кортӱ
и иван-чайтӱ, да и мукӱд турунтӱ заптылӱма... Олӱм чӱжнас
уналы отсалӱма и ӱнӱ на отсалӱ.

ӱти сиктса том мортлӱн ёна коскыс висьӱма. Сьӱкыд уджыс
тай сюрӱ сикт-грездад олӱгӱн: пес-ва нокуд уна... Кывлӱма
йӱзсянь, мый Тандзе Марья ёна отсалӱ и ӱнӱ, кувсьӱм бӱрас.
Шуӱны, муыс пӱ гу вывсьыс тӱдтӱм вын сетӱ. Локтас том
мортыд Марья баб гу дорӱ, казьяс бур кылӱн сӱйӱс да зы-
рыштчас коснас Тандзе Марья гувывса крестӱ. Некымын лун
мысти висьӱмыс лӱдзас. Сӱ пасибӱ шуӱ Тандзе Марьялы тайӱ
мортыс!

Нывбабаяс висьталӱны, мый Тандзе Марья отсалӱ и налы,
кодӱ дыр кад оз вермы чужтыны кага. Но торйӱн нин ыджыд
отсӱг сетӱ Марья нимаяслы.

* Вийгем (иж.) — статья.

Тандзе Марья вёлёма зэв тшапитчысь, уджач, топыд этша нывбаба. Унаён сысь и полёмаось. Весиг еретничаён шулёма-ось. Но кыз нё морт, коді сы мыйта йёзыслы бурсё вёчома, еретничаён вермас лоны? Эз, эз еретничаён вёв Тандзе Марья, а вёлі сійё сэтшөм мортөн, коді кужис да вермис ас нога велөдны лёк вёчысьёс либё сэтшөм йёзсё, кодъяс сылы паныд мунлісны.

Пыдди пуктёны гамсаяс да мукөд сикт-грездын олысьяс Изьваса Вангаёс. Төдöны сы йылысь, и челядьныслы висьталöны. Гам школаын тшöкыда мунлöны чужан му туялысьяслөн конференцияс, да уна доклад нин лои лöсьöдöма тайö мортыс йылысь, но абу на ставсö туялёма. Сыктывкарса канму университетлөн Фольклор туялан шöринын эм куимсёйсь унджык бурдöдчысь-тöдысь йылысь текст. Изьваса музейын сы йылысь пасйöдыс век öшалö стөнд вылас, и быд ветлысь-мунысь чуймö тайö мортыслөн олöмөн... Оз на вунöд изьватас Тандзе Марьяёс: öдвакö аддзысьяс мöд татшöм мортыс, да оз на и аддзысь!..

Дыр пукалі гу дорас, мөвпалі... Крест вывсьыс казялі, чеп öшалö. Бара на кодкö корö Тандзе Марьялысь дзоньвидзалунли, шуд ли, лача ли... Гөгöрті Марья баблысь гусö, чөвті пернапас, кисьтышті шыдöс, пасъяси... Мөдöдчи мунны. Сöмын удиті петны вөрöта сайысь, кызди гу дорö жбыркнитіс ичöтик пыста. Чатрасис, юрсö тшапа дөвкйöдліс, сөсся кокаліс гу вылысь шыдöссö да лöсьыда сьылыштіс...



ПЫДДИ ПУКТАНА АВТОРЪЯС!

Редакцияö гижöдъяснытö ыстігөн быть колö юöртны:

1. Ассыныд ним, вич, ов; кор да көні чужлöмныд (лун, төлысь, во).
2. Паспорт юöръяс: номер, серия, кор да көні сетісны, гортса адрес (прописка серти).
3. Индивидуальной налогöвöй номер — ИНН (кодлөн эм).
4. Страховöй свидетельство номер.

Тайöс юöрттöг редакция гонорар оз вешты.

*Журналын йöзöдтöм гижöдъяс
редакция оз рецензируют и авторыслы найöс оз мöдöд.
Редакция оз век во öти кывйö авторъяскöд.*

Комп. набор и верстка **Н.Кузнецова.** Корректор **Н.Габова.**

Адрес редакции: 167982, ГСП-2, г. Сыктывкар, ул. Карла Маркса, д. 229, Дом печати, каб. 202.
Телефоны редакции: 24-47-52 (гл. редактор), 24-51-52 (общ. отд./факс), 24-46-36 (бухгалтерия).
E-mail: kodzuv@mail.ru; Сайт: voyvyvkodzuv.smikomi.ru

Подписано к печати 15.01.2013. Формат 70х108^{1/16}. Печать офсетная. Усл. печ. л. 7; усл. кр.-отт. 8,4; учётно-изд. л. 7,54. Тираж 769. Заказ № 197. Регистр. *ПИ № ФС 3 - 0226* от 20.12.2006 г. выдано Беломорским управлением Федеральной службы по надзору за соблюдением законодательства в сфере массовых коммуникаций и охране культурного наследия. Публикация материалов, направленных на освещение реализации социально значимых проектов, осуществляется при государственной поддержке в форме субсидии Агентством Республики Коми по печати и массовым коммуникациям. Отпечатано в ООО «Коми республиканская типография», 167610, г. Сыктывкар, ул. В.Савина, д. 81. Цена свободная.